



# **KA RI JONG NGI**

# **MYNWEI BAD MYNTA**

**(Ka jingkyrsiew ia ki para Ri)**



**Rangbah Spiton Kharakor**



**Lum bad pynbit pynbiang da u P.R. Shabong**







# **KA RI JONG NGI MYNWEI BAD MYNTA**

**(Ka jingkyrsiew ia ki para Ri)**

**Rangbah Spiton Kharakor**

**(Lum bad pynbit pynbiang)**

**P.R. Shabong**

**2020**

Īa ka hok long trai la tyngkai

© P.R. Shabong

*U Editor bad Publisher kim kit khlieh ĩa kino kino ki  
jingthoh ba la thoh ha kane ka kot. Kino kino kiba kwah  
ĩoh jingshai ki dei ban ĩakynduh ĩa u Nongthoh.*

La pynmih da ka:

**Wans Bros Publication**  
Lumkshaid, Lower Mawprem  
Shillong - 793002

**COLLEGE**  
Ka Sienshon Banyngkong - 2020 - 1000 kopi

Layout designed - P. Tangsang

*La pynphriang da ka:*

**Wans Bros**

&

**Ri Khasi Book Agency**  
**Mawkhar Main Road**



**K**ine ki long ki jingthoh ba la dep pynmih teng ha ki kot Khubor Khasi bapher bapher ha ki sngi ba la leit noh. Ka don de kawei ka Radio Talk ba la pynlait paidbah bad pynsawa lyngba ka All India Radio, Shillong.

Nga pynpaw ïa ka jingsngewnguh ïa i Rangbah Pynwandurlang Shabong, iba la kitkhia bad sngew ieit bad lum lang ïa ki haduh ban da pynmih ha ka dur jong ka kot. U myllung ba don nam ka ri jong ngi u Babu Sosa Tham, u ju ong bad thoh ba “Jingshai ngi wad sawdong pyrthei, hynrei jingshai ka ri ngim tip ei ei.”

Khublei.

**Rangbah Spiton Kharakor**

Dated : Nongksehrim, Shillong,  
September 15, 2019

# KA AI KSAI

---

***“Lada phi ioh ia ka roi ka kiew bad ka spah ka  
phew ha la ka Ri hynrei phi duh pat ia ka snap  
kyrpang bad jinglong trai ia la ka khyndew -  
hato phi don jingkyrmen ia ka pateng?”***

Kane ka kot ka long ka jinglum thup hajuh ia ki jingthoh Artikel bapher bapher jong u Nongthoh ba la pynmih ha ki kot khubor. Da ka jingsngew kit khlieh ba ioh lehse kiba kum kine ki jingthoh bakordor kin shu bijai ei bad shah bam khñiang, kumta la kut jingmut ryngkat ka jingmynjur jong u Nongthoh ban pynmih pyrthei ha ka dur ka kot.

## **Shaphang kaei kane ka kot ka kren**

Ñiuma u paid ka Ri u la shu lap miet tang ha ki tamasa bad ki jingtrei ba pynmyllen jong ka sorkar. Phewse ki mat ban im ka jaidbynriew la buhrieh bad pyrshang ban khynñiat sha ki dongdit bym lah shemphang. Namar kata u Nongthoh um banse ban pyrta sangsot bad kren halor ki jingshisha ia ki jingleh arsap ki Nongsynshar da kaba thoh ha ki kot khubor.

Ki artylli ki shlem synshar (M.L.A, KHADC) ki la shala ki rukom trei kam. Ka dawbah ka mih namar dei mangi hi u paidbah bym ju pynshongdor bha ba ia u soh ba ngi la tip u bym thiang hynrei ngi kheit bad ong uba thiang. Dei hangne keiñ ba ki ong la jyilei ki Nongmihkhmat hynrei ngi kyrduh pat ki Nongthaw aiñ.

Nangta shuh shuh u Nongthoh u kren ruh shaphang ki jingma kiba ap jingkhang ha kane ka Ri jong ngi nalog kiwei pat ki phang.



Haba phi pule ia ka kot, da pynleit jingmut bha namar kum ka jaitbynriew, ngi kloï ban kynmaw bad stet pat ban klet. Lada u Paid ka Ri u sngap ia u Myllung Soso Tham naduh 1936 khlem artatien ka Ri jong ngi kan jyn da long da kumwei pat kata, ka jingshngaiñ bad jingsan ha ka rukom kaba dei. Kyrmen da kaba phi pule ia kane ka kot kan wanrah ka jingkhie im bad jingeh rngiew biang.

Nangne sha khmat la donkam ba ngin kynmaw kyndiang kum ka jaitbynriew, leh tang ia kaba DEI ym ju bit ban LEHBHA (Do Right not do good). Kynmaw ba kane ka Ri kaba u Blei u la bhah kyrpang ia ngi ym dei ban ailad ba kiwei kin wan tuh noh ia ka hok jong ngi.

Nga ai ka jingkitbok ia I Ma Spiton Kharakor (ba ju iakhot ieit Mama) ba in ioh ia ka met bakoit bakhiah khnang ba in lah ban iai kysiew ia ka jaitbynriew ba la shah shoh jadu.

Ngam lah khlem da pynpaw ka jingnguh bad ka burom bakhraw ia u Trai uba la kyrshan bor ia nga lyngba ka jingkoit jingkhiah ba nga lah ban pynmih pyrthei ia kane ka kot. Ka jingkhublei ka leit ruh sha I Bah Haman Mawleiñ iba la leh shitom ban pynioh ia ki katto katne ki jingthoh ba na ki sla U Mawphor, kumjuh ruh ia ki khun u Editor Rupang kiba la pynioh ia ki Artikel ba ngam don.

Khublei Shibun



**P.R. Shabong**  
**(Compiler & Editor)**

# KI SKER

|                                                                                  |     |
|----------------------------------------------------------------------------------|-----|
| 1. Ka Shillong ka shnong dkhar kaba heh tam<br>ha ka bri u Hynñiewtrep.....      | 1   |
| 2. Ka Meghalaya Legislative Assembly ne<br>Ka Meghalaya Chamber of Commerce..... | 13  |
| 3. Ka ĩewduh.....                                                                | 19  |
| 4. U Lum Diengĭei (Radio Talk) .....                                             | 25  |
| 5. Ka Upper Shillong ha ki sngi ba la leit noh.                                  | 32  |
| 6. Ka Meghalaya Compulsory Registration of<br>Marriage Act, 2011 .....           | 40  |
| 7. Ki Kur ki Jait u Khun Khasi .....                                             | 51  |
| 8. Ka Meghalaya ka thmu pynduhbor ĩa ki<br>District Council.....                 | 58  |
| 9. Ji-Hajur Jo-Hukum.....                                                        | 62  |
| 10. Jingma ki ap sawdong ki ker ĩa ngi .....                                     | 68  |
| 11. Na Langpih sha Khanduli - Aĭu ngin leh<br>namar ka ri?.....                  | 76  |
| 12. Ka Shad Lakhempong ka Valentine's Day<br>ka Ri Bhoi .....                    | 83  |
| 13. Hana te shisha! Ngi dei kiba ieit dkhar<br>palat?.....                       | 90  |
| 14. U Syiem Wickliffe.....                                                       | 97  |
| 15. Ka thma China - India 1962.....                                              | 109 |
| 16. Ka Ri India, ka District Council bad ma ngi                                  | 117 |
| 17. U Maw-Sum-Syiem (Panbari) .....                                              | 124 |
| 18. Ka Jingtep u Rev Thomas Jones ha Calcutta                                    | 126 |

# KA SHILLONG KA SHNONG DKHAR KABA HEH TAM HA KA BRI U HYNÑIEWTREP

*Mawphor, 12, 14 & 15 tarik Risaw (October), 2008*

**K**a Sor Shillong ka long mynta ka shnong Dkhar kaba heh tam ha ka Bri u Hynñiew Trep. Hynrei, ym tang ka Shillong kaba la kylla Ri Dkhar, dang dei sa kiwei pat ki shnong de kum ha Khliehriat East Jaiñtia Hills, Ri Bhoi District, West Khasi Hills nalog ka East Khasi hills kiba la kylla ki shnong Dkhar mynta. Balei ngi ong, ba ka Shillong ka dei ka shnong Dkhar, ka long namar ba la bun paid ki dkhar. Ki trai Shnong, trai muluk ki la kylla rit paid ne Minority ha la ka jong ka Shnong ha la ri. Hynrei ma ngi ki trai shnong pat, ngim pat phohsniew ba ngi la duh ña ka Shillong mynta. Ña ka spah ka phew, ki jaka ki puta hagdeng ka sor Shillong ba ha khmat Surok bah, la bat lut da ki dkhar.

U Lt. Colonel J.C Haughton u Agent jong u Governor General of India u la shimti ña ka shibynta jong ka Shillong na u Melay Sing Rajah u Syiem jong ka Hima Myllem ha ka 18 tarik u December 1863. U Pa'iem Myllem u la aiti ña ka khyndew naduh ka wah Pomdngiem hajan St. Anthony's College sha Mihngi haduh ka wah Lakadeng sha Sepngi ka ñew Mawlong ha ka them ñewduh. Na shaphang Shatei, ka sdang na ka wah Umkhras najan Polo bad na shaphang shathie ka suh sha Palton Bazar, Lukier Road haduh wah Umshyrpi. U Syiem u la aiti sha ka Sorkar Bilat naduh ka 10 tarik u December 1863.

Nangta pat, u pud u sieh bad u kam ña ka wah Umshyrpi na ka jingkieng doi-doi mynnor kaba poi

sha ka Umlong Cantonment ne ka '101' Military area haduh marjan ka kynton 3<sup>rd</sup> Mile Upper Shillong. Nangto, ka siat pat shaduh ka Farm Upper Shillong haduh Umdiengpun ne Hynñiew Mer mynta. Kine ki jaka ki la kylla long ki jaka sorkar hapoh ka Civil Administration bad ka Military Lands bad Cantonment naduh ka snem 1863.

U Bah Nongkhlawrangi, u la aiwai (leasehold) haduh 99 snem ia ka Police Bazar sha ka Sorkar Bilat na ka bynta ka Kur naduh ka snem 1863. U Don Kurkalang na ka bynta ka kur bad uwei u rangbah Kur Kharkongor, ki la aiwai (leasehold) ia kiwei pat ki jaka bad ki thain ba la kdew haneng. Ka jingiakut aiwai ka la palat ia ka 99 snem, hynrei ka Sorkar kam shym la pynphai sha ki trai jaka. Ka Sorkar ka bat ha lade bad ka aiwai bad die sha ki dkhar khlem ka jingmynjur jong ki trai jaka kum ki jait nongkhlaw, Kurkalang bad Kharkongor.

Ha ka snem 1866, la wanrah ia ka Nongbah ka United Khasi bad Jaiñtia Hills na Sohra sha Shillong. Nangta la pynlong ia ka Shillong kum ka Headquarter jong u Chief Commissioner Province of Assam ha ka snem 1874. Ka Shillong kaba long ka nongbah jong ka Meghalaya naduh ka snem 1972.

Shibun bah ki jaidbynriew na kylleng ka Ri India bad ka pyrtnei ki la wan iaboi sha sor Shillong naduh ka snem 1863 ter ter. U Rev. John Roberts u la thoh ia ka jingrwai "RI KHASI RI KHASI" ha ka kot Khasi Third Reader ha shuwa ka snem 1895. Ha ka dkhot ba hynriew ha ka piej 80 jong katei ka kot, la thoh kumne:-

*"La wan ruh u Phareng, la kiw u Dykhar,  
Ka suk ka Ri Khasi, ka'n shai ruh kydar;  
Ka'n phet ka jingbieit, jingdum ka'm don shuh,  
Ki syntiw ka jingtip kin phuh"*

Shisha, ngi la shong suk ha ki por synshar phareng. U Dkhar u kling ruh um nud ban leh heh mynnor, namar u dang dei u shah synshar bad u khun u raïot sorkar Bilat. Kyndit u Phareng u la ieh khunswet ia ka Ri Khasi, bad u la phet jynduh na India naduh ka 15 tarik u August 1947. Wai-ly-wai la king ka janor shano yn poi bad shaei ka lawei ka jaidbynriew jong ngi. Ki Hima Khasi State ki la laitluid na ki Phareng katkum ka Indian Independence Act, 1946 ba la pass da ka British Parliament. U Sir Akbar Hydari u Governor ka Assam u la pynbor ia ki syiem Khasi ba kin pyniasoh bad ka Ri India. Ban ieng ha la ki jait ki rit bor than. Sa kawei ki sheptieng palat ia ka Islamic Pakistan jong u Mahammed Ali Jinnah ki Muslim League.

U Syiem Wickliffe u Syiem Khynnah jong ka Hima Nongstoiñ um treh ban kohnguh ia katei ka jingshah pynbor. Ka Hima Nongstoiñ hapoh u Syiem Sib Sing u la soi ia ka instrument of Accession ha ka 19 tarik u March 1948 bad u khlem soi ia ka Instrument of Merger bad ka Ri India. U Syiem Wickliffe u la mih jynduh na Nongstoiñ naduh u bnai March 1948 khlem wan phai shuh haduh ban da khlad noh, ha ka 21.10.1988 sha shilliang ka Hat Bagli ha ka Hima Nongstoiñ bad u *Khlieh duh* jong ka boundary contonment kaba la *pynbeit pud* hapdeng ka India bad Pakistan ha ka snem 1947-48, dei u *Cyril Raddiate* bad u la pynlong ka iing sah u Syiem Wickliffe sha ka Pakistan (Mynta Bangladesh)

Hadien katei, ki nongialam kum u syiem kur Lyngdoh, ki Wahadadar ki la ia kynduh lang bunsien ha ka iing Khasi National Dorbar bad ki la rai ba kim mon satia ban leit iasoh bad ka Ri Assam. Ha ka jingiathep vote, ka liang u Syiem Sirendro Syiem

Jirang ka la ioh 46 votes la 40 votes. Ki kwah ban ioh rung ha ka First Schedule jong ka Indian Constitution ryngkat ka article 370 ba ioh ki Jammu bad Kashmir mynta. Kine shym la dawa ia ka sixth Schedule.

Katei ka rai jong ka State Constitution Making Durbar ka la long ha ka 21 tarik u July 1949. Ia ka Khasi States Constitution Making Durbar la ithuh da ka Constituent Assembly of India. Pynban katei ka jingrai ha ka K.S.C.M.D. ka la kylla mulot. Ka daw ka long ba kim don la u jong u Nongmihkhmat ba kyrpang ha ka Constituent Assembly of India. U Mr. G.S. Guha u nongmih khmat jong ki Hima Khasi, u mih khmat lang ia ka Manipur State bad Tripura State de. Une u briew um shym la kren wat tang shi kyntien ia ka rai ne ka Resolution ba la pass da ka Khasi Constitution Making Durbar.

Hadien katei ka jingjia, ki rangbah jong ngi ki la hiar mardor sha Delhi bad la leit iakynduh ia u Dr. B.R. Ambedkar uba long u Chairman jong ka Drafting Committee ka Constituent Assembly of India ha u bnai November 1949. Ka por ba ki poi ka dei ha ka por ba la pule ha ka Third Reading bad ka la slem palat. Ki Members na ka Assam Province ki la talaiñ balaiñ balia ktien ba leh hynmen palat. La pynrung ia ki Khasi States shapoh Assam khlem ka mon u paidbah. Ki nongialam kiba la leit Delhi na ka liang ka Federation of Khasi States ki dei u Syiem Khyrim u Olim Sing uba long ruh u President jong ka Federation, u Dr. Homiwell Lyngdoh, Kong Mavis Dunn, Jor Manik Syiem bad u Rangbah O.H. Rease.

Ynda ka ri Khasi ka la hap sha ka Jylla Assam ha ka snem 1950, ki dkhar ki la seng pynheh ia ki shnong dkhar ha Shillong. La mih ka New Colony ha Laitumkhrah, ka Motinagar ha Lumpyngngad, ka

Bishnupur ha Kench's Trace ha ka kyrting u Chief Minister Bishnu Ram Medhi ka Assam kata wat haba u dang im. Ka tang shu pynbna ka Prime Minister Indira Gandhi ban pyniakhlad ia ki ri lum na ka Assam ha ka 13 tarik u January 1967, ki dkhar ha Shillong ki la khah pisa da ka jingbitar.

Ki dkhar Shillong hapoh ka lama "Shillong Citizens Committee", ki la hiar leit Delhi hapoh ka jingialam u Mr. Kiron Paul Chaudhury ha u bnai January 1967. Ki la leit dawa ba lada wan ka Hill State, te ia ka sor Shillong dei ban pynhap ha ka dur jong ka Union Territory. Ki dkhar kiba la ia leit lang bad u Mr. Kiron Paul Chaudhury ki long u Prof. Kapila Chatterjee. Lala Ram bad u R.N. Barua. Kiwei kiba la ia donkti ha ka jingiasoi ia katei ka memorandum ki long u Major S.N. Dutt, Smt. Kalpana Gupta, Dhruba Joshi, Prof B. Dutta bad u J. Bawri.

Ka Meghalaya Hill State ka la wan urlong kum ka jylla ba pura naduh ka 21 tarik u January 1972. Ngim lah ban klet ia ka umsyep umsyar ba la noh synniang u Rangbah Hoover Hynniewta naduh ka snem 1957, Prof. G.G. Swell, Thoedore Cajee, Edwingson Bareh, Capt. W.A. Sangma, Hopingstone Lyngdoh bad kiwei kiwei de ki rangbah nongialam ryngkat bad ki paidbah naduh 1957 haduh 1972.

Kawei na ki mat iakren ha sor Shillong mynta ka dei shaphang ka Shillong Municipal's Board Election 2008. Don kiba la kyrkieh eh ban pynlong noh kham kloi ia ka election. Kiwei pat ki syier ia kaei ka ban jia hadien ka election. Na ki lad lum jingtip ba la ioh, ki paid nongshong shnong (population) ha ka Shillong Municipality katkum ka Census 2001, ki don baroh shi lak 32 hajar phra spah 67 ngut ne (1,32,867 ngut). La phiah ia ka Shillong Municipality ha ki 27

tylli ki Wards, kiba kynthup hapoh 12 tylli jong ki dong jong ka sor Shillong.

**Ka jingbun briew ha ka Shillong Municipality  
Census - 2001**

| Sl. No. | Kyrteng ki Municipal Wards      | Khasi & kiwei ki Schedule Tribe | Ki Dkhar           | Total                |
|---------|---------------------------------|---------------------------------|--------------------|----------------------|
| 1       | Laitummkhrah No.1,2,3, & 4      | 9,379 ngut                      | 11,894 ngut        | 21,273 ngut          |
| 2       | Malki No. 1 & 2                 | 8, 932 ngut                     | 1,975 ngut         | 10,907 ngut          |
| 3       | European Wards No. 7 & 8.       | 1,492 ngut                      | 7,522 ngut         | 9,014 ngut           |
| 4       | Police Bazar No. 9              | 18 ngut                         | 1,511 ngut         | 1,529 ngut           |
| 5       | Jail Road No. 10 & 11           | 3,287 ngut                      | 6,237 ngut         | 9,524 ngut           |
| 6       | Mawkhar No. 12 & 13             | 7,408 ngut                      | 792 ngut           | 8,200 ngut           |
| 7       | Jalaw No. 14, 15 & 16           | 10,900 ngut                     | 215 ngut           | 11,115 ngut          |
| 8       | South East Mawkhar No. 17 & 18. | 5,142 ngut                      | 3,422 ngut         | 8,564 ngut           |
| 9       | Mawprem No. 19, 20, & 21        | 10,827 ngut                     | 15,556 ngut        | 26,383 ngut          |
| 10      | Kench's Trace No. 22 & 23       | 2,041 ngut                      | 5,251 ngut         | 7,292 ngut           |
| 11      | Laban No. 24 & 25               | 2,694 ngut                      | 4,946 ngut         | 7,640 ngut           |
| 12      | Lumparing No. 26 & 27           | 5,489 ngut                      | 5,937 ngut         | 11,426 ngut          |
|         | <b>Grand Total</b>              | <b>67,609 ngut</b>              | <b>65,288 ngut</b> | <b>1,32,867 ngut</b> |



## KA BYNTA KABA AR

Ki shnong kiba hap shabar na ka Shillong Municipality ki kynthup ia kine ki shnong :-

### **Ki Shnong                      Ka jingbun briew (Census - 2001)**

|                        |   |             |
|------------------------|---|-------------|
| 1. Shillong Cantonment | - | 12,396 ngut |
| 2. Mawlai              | - | 38,303 ngut |
| 3. Nongthymmai         | - | 34,292 ngut |
| 4. Pynthorumkhrah      | - | 22,115 ngut |
| 5. Nongmynsong         | - | 11,371 ngut |
| 6. Madanrting          | - | 16,318 ngut |

---

|              |          |                      |
|--------------|----------|----------------------|
| <b>Total</b> | <b>-</b> | <b>1,34,795 ngut</b> |
|--------------|----------|----------------------|

---

Katkum ka Census 2001, ka Shillong Municipality ka don briew haduh shilak, 32 hajar bad 867 ngut ne (1,32,867). Ki jaka kiba hap shabar na ka Shillong Municipality ne kata ka Shillong Conglomeration areas ka don haduh shi lak, 34 hajar bad 795 ngut ne (1, 34, 795) ngut. Kumta ka jingbun briew ha ka Greater Shillong katkum ka Census 2001 ka don ki nongshong shnong haduh 2 lak, 67 hajar bad 662 ngut ne (2,67,662 ngut).

Na katei, ki Khasi bad kiwei ki riewlum ki don shi lak, 53 hajar bad 425 ngut ne (1,53,425 ngut). Ka jingthoh census banyngkong eh ha ka nongbah Shillong ka dei ha ka snem 1872. Ka jingdon briew ha kane ka Census 1872 ha Shillong ki don baroh haduh shi hajar lai spah bad 63 ngut ne 1,363 ngut.

Katkum ka Amended Constitution (STS) Order (Amendment) Act, of 1987 (ACT 43 of 1987). Kine ki jaitbynriew harum ki long mynta ki trai muluk, ki trai ri bad ki trai jaka kat kum katei ka Order ha ka Jylla Meghalaya. Ki lah ban thied jaka katba ki mon ha ka nongbah Shillong bad ha ki jaka nongkyndong jong ka Meghalaya. Ka kyrteng ki Scheduled Tribes ka Meghalaya ka long katkum ka Scheduled Castes and Scheduled Tribes Order (Amendment) Act, 1976, No. 108 la pyntrei kam naduh ka 27 tarik u July 1977. Kane ka long katkum ka shithi na ka Sorkar India No. BC. 12016/64/76-SCT. V dt. 27.7.77.

### **Ka kyrteng ki Scheduled Tribes ha ka Jylla Meghalaya**

1. Chakma 2. Dimasa (Kachari) 3. Garo 4. Hajong 5. Hmar 6. Khasi, Jaiñtia, Synteng, Pnar, War, Bhoi, Lyngngam. (Da kane ka Order la dep phiah ña ki paid Khasi haduh hynñiew tylli ki jaitbynriew ba ñapher). 7. Ki Kuki ki kynthup haduh 37 tylli ki Sub-tribes. 8. lakher 9. Man (Tai speaking). 10. Kino kino ki Mizo ne ki Lushai tribes. 11. Kino kino ki jaitbynriew Naga 12. Pawi 13. Synteng 14. Boro Kacharies 15. Rabha ne Rava.

Kitei ki jaitbynriew riwulum bad kiwei ki riwthor ki la sngewtraï ña ka Shillong bad ka Meghalaya. Tangba, u Khasi te um lah ban leit rung sha ka Jylla Manipur. Mizoram, Nagaland bad Arunachal Pradesh lymda la ñoh jingbit. Ma ki te, kim treh kdup ña ngi, hynrei ka Meghalaya ka pdiang sngewbha ña baroh. Haba kitei ki jaitbynriew ki la sngewtraï, ka la mih ka jingleh trai. Kumta ka thma ñaleh mar kynti longtraï ha ka nongbah Shillong ka la khie ha ka snem 1979. U Chief Minister ka Meghalaya u Rangbah Brington

Buhai Lyngdoh u la lah ban tem ia ka ding kaba klang da ka sap nongialam jong u.

Ki samla jong ka Meghalaya Student's Union ki la i shyrkhei ia ki jingjia bad ka jingiaiwani tyllap ki heh paid na ri dkhar. Kumta ki la pynlong ia ka khang shnong ha ka sor Jowai ha ka shi tarik u May 1980, bad ha sor Shillong ki la khang shnong bad pynlong ka Bandh ha ka 4 tarik u May 1980. La khyrdep lut ia ki dukan ha Police Bazar bad ha kiwei ki bynta jong ka sor.

U Phareng te u la phet jynduh ha ka snem 1947, bad ki dkhar ki la nang wan krih kum ki dkhiew bad nang kiew shi ia kiew. La bthei sa kawei pat ka jingiaikhie BEH MYNDER ha ka snem 1987. U samla rangbah Bull N. Lyngdoh ha kito ki por u la ieng khlem riej ha kaba iada ia ka jaitbynriew. Dei hadien kane ka jingjia, ba ki samla Khasi ki la sdang trei ia ka kam ri masi ha ki rudnong jong ka sor Shillong.

Kumba ka long mynta, ka sor Shillong ka long ka shnong dkhar kaba heh tam ha kane ka ri. Napdeng ki 12 tylli ki dong hapoh ka Shillong Municipal ngi shem ba ki dong Khasi ki long tang saw tylli, kata tang ha Malki, Mawkhar, Jaiaw bad South East Mawkhar kum ka Qualapatty bad kiwei. Ha Police Bazar lei-lei, la don tang 18 ngut ki riwulum kaba kynthup ia ki Khasi de. Ngilong ki nongwei hapdeng jong ka sor Police Bazar, ha kaba ym lah shuh ban iohi ia ki Khasi wat lada khmih da ki iit dorbin ruh.

Napdeng ki dkhar, ngi shem ba ki khar kynthei Punjabi ki la ia roi paid ha Shillong haduh ba la ima ban khmih. Ym don samla thei Khasi lait noh tang iwei ar hangne hangtai. Kano kano ka jaitbynriew kaba ym don kynthei shuh, ka mut la wai bad la kut ki

sngi jong ka. Kine ki khar kynthei Punjabi ha Shillong ki kren Khasi tiak tiak kum u sim moina. Ki 'thei Punjabi ki la iehnoh ïa ka pien sari ba ka long rynjaiñ palat. Ki la ïa tynneng ïa ka phong patlun salwar-kameez-chaddar kum ki kynthei Kabuli wallah na bar ri. Ki la iehnoh ïa la ka jingriam tynrai (identity) da kaba pyrthuh bud ïa ka riam ki kynthei Kabuli jong ka ri Afghanistan ban kham long modern, hana.

Ngi, ngi long kiba ieit dkhar kiba ieit para riwulum haduh katta katta. Lada ki dkhar ki kwah ban seng kam khaii ban leh business ki sorkar District Council jong ngi, ki long kiba kloï la ha Shillong ne Jowai ban ai ïa ki Non-Tribal Trading Licence ïa ki. Kumjuh ruh ka sorkar jylla, ka ju long kaba smat ban leit shaw ïa ki mahajon heh spah. Khmih mynta ha ki Industrial Estates ha Umïam Barapani, ha Lumshnong Jaiñtia Hills bad ha Byrnihat ba don ka Industrial Estate bad ka Export Promotional Industrial Park ne E.P.I.P mano ba ïoh jingmyntoi hangto? Kine ki karkhana ki dei ki lad joldi-aw ban heh ka buhai shnong ki mynder sha ka ri jong ngi.

Ki No-objection Certificate ne N.O.C. ki long kiba suk ban ïoh. Ka single window system ban ai jingbit ka sorkar ha kaba plie karkhana mawshun ne cement, dewiong bad Hydro Electric Power lah ban shu pashat tang da i rongser bad kiba don ka bor ki lah ban ther la-ki la-ka. *"Natchh (shad) koro Company mama, joldi aye mama, khuslai mot mama, poisa milangnga, Aaj nei, Kal nei, Pichhe bohut milangnga"*. (Lada die lut ïa ka nongmei nongpa, ka jaka ka puta, die lut ïa ka kynthei, te shano kata ka ri bad ka jaitbynriew bad ki longdien kin ïoh im ha kiwei pat ki sngi).

U Syiem Jehangir jong ki Mughul hyndai u la ai licence jingbit ïa ki Phareng ne ki English ban wan

seng kam khaïi ha ka ri India ha ka snem 1615 A.D. Khadduh ynda la biang ka por, ki Phareng ki la leh politik bad ki la knieh ïa ka jingsynshar na ki Syiem Mughul. U Syiem Mughul ba khadduh u dei u Bahadur Shah II uba long u khun ksiew jong u Syiem Aurangzeb u la shah rem ha ka thma. U la shah pynryngkang par sha Rangon jong ka Burma ne Myanmar mynta. Kane ka dei ha ka snem 1857 hadien ba la wai ka thma ha-ram-ni-mok ne ka Sepoy Mutiny.

Haba ïapur khana shaphang ki “Mynder ha Shillong”, ngim lah ban klet ïa i poetry na u Khulom jong u rangbah na Ri War Tyrna u Bah Adajio Bynnud (U Mawphor 23 tarik u July 2004). U Myllung u la thoh kumne :-

## I

*“Mynder ha Shillong u la nang kiew skong,  
U stet ban kharoi kum ki kain pyrjong:  
Kine ki ïoh trei bun jait ki jait kam,  
Khasi u nang hiar sha jingduk ba tasam.*

## II

*Bunsien i’u mynder ngi ieit bad kren khroh,  
Ngim tip pat ïa ngi, kine ki ñiewpoh;  
Ba ngi nang ktien dkhar, katno ngi sarong,  
Ma ki nangne, ki ïoh ksai nyngkong.*

## III

*Bunsien ngi ju khot ban ai kam i’u nongwei,  
I’u Khasi pat ba duk ngim ju sngewsynei;  
Dei hangne keiñ ngi i, ba mih jingkylli,  
Lashai haei keiñ, kan sa jia ïa ngi.*

#### IV

*Jingud jong ka ri, da ka sur ba sngew swai,  
Balei keĩñ ma ngi, ngi dang thiah;  
Ale ko riewshlur, keĩñ noh wat phohsniew,  
To ieng ban iada ia la ka jaitbynriew”.*

Ngi la iohi ia ki jingma ia ka Sor Shillong ha baroh ki liang. Ki Sorkar ki leit bad ki wan hynrei ki jingsuhsat sohkyrdot ha Shillong ki iai sah kumjuh. Ka Sorkar u Dr. Don Dethwelson Lapang ha Meghalaya ka la leit, bad ka Sorkar u Dr. Donkupar ka dang don. U trai ri um don jaka shuh hapteng ka sor Shillong. U la shah khynñiat sharud nong.

To kam lei-lei, ngin thom ia kine baroh lada ngi long kiba snar bad kiba ia long tylli kawei. Kaba kongsan eh ka long ban ym duh jingkyrmen. Ngin thom ia ki dieng pyngkiang da ka mynsiem rangbah, haba ngi heh bad eh ka mynsien ngin jop hi khadduh.



# KA MEGHALAYA LEGISLATIVE ASSEMBLY NE KA MEGHALAYA CHAMBER OF COMMERCE

*Mawphor, 16 tarik Rymphang (Feb), 2013*

**K**a Meghalaya Legislative Assembly ka long ka ĩing Dorbar kaba heh tam ha Meghalaya. Ka Meghalaya kam don satia ĩa ka ĩing Dorbar Upper House kumba don ha ki jylla ba kham heh ha ka Ri India. Katkum ka Constitution, ka ri India ka bud ĩa ka jingsynshar paidbah ne Democracy. Kumta u paidbah u ju leit thep vote ban pynthymmai ĩa ki nongmihkhmat la ka dei sha ka Indian Parliament ne ka Lok Sabha ne sha ka Meghalaya Legislative Assembly ne sha ki Dorbar Autonomous District Council man la ka shisien san snem.

Arbnai shuwa ba kano kano ka Election paidbah kan long, u paidbah u kylla long *V.I.P.* ne *Very Important Persons*, ba ki nongĭaleh Election ki rah kti ki wiat samrkhie ĩa ki *electorate* ne nongthep vote. U paidbah u kylla long u *hero*, tangba shisien ba la dep ĩoh *result election* u paidbah u kylla long u *zero* noh ha khmat ki shakri paidbah ba ki hi ki jied bad thung syiem ĩa ki kum ki blei khyndew san snem lynter. Ngi ki paidbah ngi jied ĩa ki *MLA*, bad ki pat ki jied ĩa u *Chief Minister* ne u *Leader of Opposition* katkum ka jingbun briew ne khyndiat *MLA* jong ki. Dei ki paidbah kiba pynlong ĩa ka sorkar bad dei u paidbah uba tieng ban aimon ĩa kine ki shakri paidbah. Kane ka long ka Democracy ha Meghalaya bad India mynta.

Ka 23 tarik u February 2013 ka dei ka sngi thep vote ha ka jylla Meghalaya. Lada ka Meghalaya ka kynthup tang ĩa kawei ka jaidbynriew ne artylli ki

jaidbynriew kam da don jingma ei ei. Ka jingma ka long ba hangne ki Khar Hindu ki Khar Musulman ba wan buhai shnong ha Meghalaya ki la kylla long ki heh paid mynta bad u Hynñiewtrep u la kylla rit paid. Nalor nangta ngi long kiba saphret, kiba ïapait tang shu wan ka Election. Kulmar khlieh ki heh MLA ynda la shah jied ha u paidbah jong ngi u bym ju ai majority ïa kano kano ka party ha Meghalaya. Ha New Delhi ruh ka don ka Sorkar khleh khawlang UPA bad ha Shillong pat ka don ka sorkar MUA. Ki mih tang ki sorkar khleh jaktung bad sa mih ki Sorkar ja khawot. Lada ym bam ruh ym long, bad lada bam ruh ïoh pangkpoh ei. Ka jingbun briew ha Meghalaya katkum ka Census 2011 don kumba Arphew Khyndai Lak Hynriew Phew Saw Hajar bad Hynñiew Ngut ki paid nongshong shnong. **Ki nongthep vote pat ki don mynta 14 lak 88 hajar 719 ngut haduh u January 2013** ban jied ïa ki **60 ngut ki** MLA na ka bynta ka Election MLA **2013**.

Ha ka American Congress kaba ki ong ka “House of Representatives)” don haduh **435 ngut ki MPs** kiba wan mih khmat na ki 50 tylli ki States jong ka USA. Shi bynta na ki lai bynta, kata haduh **145 ngut ki dei ki Lawyers** ne ki riw said aiñ ha ka Dorbar. Nangta bud sa ki Economists, ki Universities Teachers kiba don ha ka American Congress. Hynrei hangne ha Meghalaya, ki *Contractors*, ki *dealers* ki *Construction Magnates* ki ïa mareh race ban ïoh long Nongmihkhmat sha ka *Meghalaya Legislative Assembly*. Toi ha ka jingshisha ki dei ban leit rung dkhoh ha ka *Meghalaya Chamber of Commerce* ban pynheh ïa ka kam seng kam seng jam jong ki.

Katba dang don ha Assam don tang san ngut ki MLA na ka United Khasi & Jaintia Hills. Ki MLA ha kito ki por ki long ki riw rangbah suda. Ym don ho



ki rangbah ban shu snoh bah ruma rutit tang ban ioh  
ia ka bor. Uba ialeh MLA ha kito ki por ym don pisa  
tyngka bad um ju pynlut tyngka ban ialeh election.  
Ki units EITU. APHLC ne Congress ha la ki shnong  
ki shnong ki bei ia ka jinglut na ki dkhot ka party  
politics jong ki. Ki paidbah ki synñiang ha ki sngi  
thep vote, ki synñiang pisa ban iadih sngewbha para  
maki. U Candidate um ju pynlut pisa ei ei. Dei na  
kata ka daw ba lah ban pynmih ia ki MLA bakhraw  
jingmut ba don jingkitkhlieh bym ju bam tyngka.

Mynta pat u Candidate ialeh MLA u khroh bad  
bhoh tyngka shihajar shi vote napoh napoh bym don  
ba tip ki briew ha ka jingpynbam tyngka. Shihajar  
tyngka na ka bynta san snem ne **1825 sngi** ka mut  
uba bam tyngka u ioh **tang shi tyngka phraphew**  
**pisa shi sngi** ba u sa thep vote ha uba ai tyngka  
ia u. Haba bishar ba ka jingialeh Election ha u bnai  
February 2013 **ka long pynban ka kynja Industry ba**  
**shyrkhei tam.**

Ym dei tang u paidbhur bam tyngka hynrei ki  
“corporate Company la ka dei ka Super Star Cement  
Company ne ka Junior Topcem Company bad kiwei  
kiwei ki la leit ai donation ban pynjop ia ki. Kitei  
ki Company ki bei tyngka ia ki Candidates da ka  
jingthmu ban ioh permit ne licence ynda la jop ki  
MLA ban bat ia ka sorkar. U paidbah u sngewkmen  
ba uba ki thep vote u jop elekshon. Sa katno tam ki  
Company kiba la theh tyngka da ki lak kin ioh nong  
haba thaw ia ka sorkar thymmai. Kumjuh ruh ki lah  
ban pynpra ia ka sorkar lada kim iahap jingmut ia ki  
MLA thymmai.

Ka Meghalaya Autonomous State ka la sdang  
treikam naduh 1970 bad ka Meghalaya ka la kynjoh  
sha ka 43 snem mynta. Ym don jingroi haei haei ruh



em, lait sa tang ki jingdheng kali la kum bym don sorkar ha ka Nongbah Shillong. Ka Sorkar kam nud ban pynheh surok wat ha ki National Highways No. 40 bad 44 ba ïaid hapdeng ka Nongbah Shilllong. Ha ka jingshisha ka 44<sup>th</sup> Amendment jong ka Constitution ka aibor ïa ka Sorkar ban shim khyndew na ka bynta ka jingmyntoi jong u paidbah. Hynrei ka Sorkar ka leh mutlop ha kane ka liang. Dang shen u Chief Minister Mukul Sangma bad u Governor R.S. Mooshary haba ki leit sha shnong Tura bad Bodo Land ha Assam ki leit da ka Helicopter ha ka jinglut ba 92 lak na ka tyeongka Sorkar ha ki san bnai.

Ha ka por ka Sorkar u Rangbah D.D. Pugh u la phah ïa u Rangbah Martin N. Majaw ban leit pan jaka na ka Ministry of Defence ban tei ïa ka Office PHE ha Madan Tataw ha Mawphlang na New Delhi. Shisien pan u Rangbah Martin Narayan Majaw uba long u Revenue Minister ka Meghalaya ha kito ki por, u Myntri ka Sorkar India jong ka Defence, **u Jag Jivan Ram** u la mynjur bad kohnguh ban ai jaka. Mynta pat, ka sorkar Meghalaya kam don jingsngew lehraïñ ba kam don la ka ïing Assembly naduh ka snem 2001. Ka Madan Kirkit Laban ne Garrisson Ground ka kham heh ban ïa ka ïing Assembly ha Police Bazar. Balei mo kim lah ban leit pan na u Defence Minister ka India, U Mr. Antony ha kito ki snem.

Ka Sorkar Mizoram ka la ïoh ïa ka Len shipai Assam Rifle hapdeng Aizawl ban pynlong Secretariat hangto. Kumjuh ruh ka Sorkar Manipur ka la ïoh ïa ka Kangla Fort hapdeng Imphal kaba ju long ka ïingsyiem Manipur hyndai kaba don ha ka kti jong ki Shipai. Ngì sngew phylla ba balei ka Sorkar Meghalaya ka kwah ban knieh ïa ka Tara Ghar kaba long ka ïing ba ju sah nyngkong u Captain W.A. Sangma bad kiwei

kiwei ki Chief Minister ka Meghalaya kaba don hajan Nanpolok.

Kumba ka paw ka Meghalaya Legislative Assembly ka i long pynban kum ka Meghalaya Chamber of Commerce ban pyrkhat ia ka khaïi pateng. Ngi iohi ba ki Ministers jong ngi ki long ki kynja Business Executive bad u Chief Minister pat u long kum u Chief Executive jong ka Meghalaya Chamber of Commerce. Haba ym pat long MLA ne Ministers, ki nongïalam jong ngi ki dang raikhoh bong khning bad ki kti ki kjat kum ki dieng shynraiñ. Hynrei ki tang shu ioh bat kam shakri paidbah ki la ibha khmut bha khmat bad la heh ka kpoh. Hynrei kane kam ju jia ia ki nongïalam ka Ri India naduh u Mahatma Gandhi, u Jawaharlal Nehru, u Vallabhai Patel ne u Lal Bahadur Shastri. U Gandhi, u Nehru bad u Patel ki leit pule leit shong skul sha Ri Bilat ban ioh ia ka Degree ha ka liang ka skul aiñ ne Law na England. U Nehru lei lei haba u leit skul sha Bilat u ju phah sait jaiñ sha ka Nongbah Paris. Hynrei hadien pat ynda ki la treikam paidbah, ki la ai lut ia ka jingdon jingem ka spah ka phew sha ki paidbah. Mynshuwa katba kim pat trei kam paidbah ki dang bha met. Hynrei ynda ki la trei kam paidbah ki raikhoh ki rit, ki im duk bad im jynjar shitom kumba im u paidbah. U Lal Bahadur Shastri lei lei u long uba duk bad um don iing la jong ei ei, wat hadien ba u long u Minister ka India bad long Prime Minister hadien ba la khlad u Nehru. U la khlad noh ha ka snem 1966 khlem da lah ban pynthaw iing ia la ka tnga bad ki khun.

Hynrei ha Meghalaya pat ngi long da khongpong. Katba ym pat trei kam paidbah ki dang rit bad raikhoh. Hynrei ynda la trei kam paidbah ki sngaid ki bhabriew ki i khleiñ bad ki i plung ka met ka phad.

Tang shu jop MLA ki leit kai bar ri kheri kheri. Tip  
mano ba pynsiew bai liengsuiñ ãa ki? Hato ki siew hi,  
ne pynsiew ka sorkar ne pynsiew ki kynja Company ba  
ki ai *contract* ha ki kam sorkar. Katba ki nongĩalam ki  
nang riewspah haba ki trei kam paidbah. ngi lap pat  
ba ki paidbah ha Meghalaya ki nang duk nang shitom  
bad ki **Below Poverty Lines (BPL)** ki nang bun bad  
ki don mynta haduh **18 lak 52 hajar bad 644 ngut**  
ne **66 percent** na ka jingdon briew katkum ka **census**  
**2011 kaba don 29 lak 64 hajar bad 7 ngut.**

Ka Ri India ka la pynmih ãa ki Statesman kum  
u Mahatma Gandhi, u Jawaharlal Nehru, u Vallabhai  
Patel, u Subhas Chandra Bose bad u Lal Bahadur  
Shastri. Kine ki riewkhrav kim ju pyrkhat ãa ka Next  
Election hynrei ki pyrkhat ãa ka jaidbynriew na ka  
bynta ka Next Generation. Ngi sngew shngaiñ ba ka  
Ri jong ngi ruh ha ki por ba la leit noh ka la pynmih  
ãa ki statemens, ki nongĩalam kum u **Pa'iem Tirot**  
**Sing, u Woh Kiang Nangbah, u Syiem Wickliffe -**  
**Phuh B.E. u Engineer ba nyngkong** napdeng jong  
ngi uba la long u Syiem Khynnah ka Hima Nongstoiñ  
ha ki snem 1937-48. Ngim lah ban klet ruh de sa ãa  
uweu u Statesman jong ka jaidbynriew bad ka kyrteng  
jong u ka long u **Rangbah Hoover Hynniewta, Ex-MP**  
jong ngi.



# KA İEWDUH



*Rupang, 12 tarik Nailar (Aug), 2014*

**K**a ĩewduh ka long ka ĩew kaba khraw tam ha ka ri Ku Hynñiewtrep. La seng ĩa kane ka ĩew naduh ka por ba ki Rumnong ki la ri la sumar ĩa ki jait Syiem Shyllong ha Nongkseh rim. Ha kata ka por la don kawei ka ĩew ha Nongkseh rim kaba ki khot kyrteng ka ĩewrynghep. Don ar tylli ki jingĩathuh shaphang ka jingpynkynriah ĩa ka ĩewrynghep sha ĩewduh. Kawei ka long ba ki Syiem Shyllong kim treh ban leit kiew shuh sha ka ĩewrynghep hadien ka thanglieh thangĩong kaba ar ha Nongkseh rim. Kawei pat ka khana ka long ba ka ĩewrynghep ka rit than bad kim lah ban bsa ĩa ki jait Syiem Shyllong. Kumta ki la rah noh ĩa ka ĩew Rynghhep sha ĩewduh hadien ba la kohnguh ka *khan shut*, kaba ki pan hukum na U Blei Trai Nongthaw. La leh ĩa kane ha ka por ba long Syiem u hynmen jong u Bormanik I uba kyrteng u Ksan Shyllong.

Ka ĩewduh ka ju long ĩew shisien man ka phra sngi. Ka Lyngka ka long ka sngi nyngkong jong ka taiew bad ka long ruh ka sngi shong sngi hyndai. Ka ktien ĩewduh ka mut ka sngi ĩew khadduh jong ka taiew. ĩa kane ka sngi la ju ñiew kyntang da kiba bun ki Hynñiewtrep, bad kim ju sdang kam thymmai, pynwai ne pynkut kam ha ka sngi ĩewduh, ĩoh rem ne sngewsih ka blei longiew ha ĩewduh. Ka ĩewduh ka la nang heh katba nang ĩaid ki por bad ki palat shnong ki ju wanrah lpa ĩa ki mar die naduh ka Pamtiah ha ka sngi ba hynriew. Kumta sa mih de sa ka ĩew Pamtiah hadien. Ka nongbah Assam ka la wan phai biang na Dacca sha Shillong ha ka snem 1912 bad ka sor Shillong ka la roi briew shi katdei. Kumta ka

Shillong Municipal ka la seng ĩa ka ĩew Mulong harum ka basa dohkha. Mynta ka ĩewduh Shillong ka ju long ĩew man ka sngi bad ki nongleit siew sha ĩew ki hap tyngngian tang shu rung ha ka.

Hyndai, la tip ĩa ka ĩewduh kum ka ĩew Blei namar la seng ĩa ka da ka niam. Ki nongleit siew leit tda ki da khreh da khrum, da leh khuid ĩa lade haba ki leit ĩewduh mynshwa. Ki nongdie ruh ki die hok ĩa ka mar ne ka tiar jong ki. Ka Hima Shyllong ka ju pynlong Pomblang ĩewduh shisien shisnem ha kaba ki Bakhraw Batri, ki Syiem ki kmie bad ki khun ki hajar ha ka hima ki ĩoh bynta. Ki Rumnong ki long ki Sohblei ha ka Pomblang ĩewduh namar dei ma ki kiba ju pyndep ĩa u Blang ĩewrynghep ha Nongkseh rim hyndai. Mynta dei ma ki hi kiba pynbiang ĩa u 'lang ĩewduh ha ka Pomblang ĩewduh ha Smit, Hima Khyrim.

Ka Raid Mylliem ruh ka ju leh niam ha ĩewduh Shyllong, ha kaba u Lyngdoh Mylliem uba dei shikur bad ki jait Marbañiang lem bad ki Bakhraw (Sohtun, Nongkhlaw, Kharkongor bad Kurkalang) ĩa kiba ju khot ruh ki San Kur ki ju leh niam ha ĩing Lyngdoh ĩewduh bad Lum Shyllong man ka snem. Mynta la khot kyrteng ne tip ĩa kane ka leh niam kum ka Niam ki San Kur & Khadwei kur ka Raid Mylliem jong ka Hima Mylliem. Ki nongshong ĩew ki ju siew arshah ĩa ka bai basa ha ĩewduh, haba ka Raid ka pynlong ĩa ka niam ainguh ha U Trai Nongbuh Nongpynlong ban heh ka dwar ka lynti bad ban suk ki khun ki hajar.

Hyndai haba ka Hima Khyrim bad Mylliem ki dang ĩalong kawei hapoh ka Hima Shyllong ki ju kñia blang, sniang, bad ki shim dkhot ar ar dkhot na u :-

(1) Klong snam, (2) Dohnud, (3) Thaplap, (4) Khyllai, (5) U Tor, (6) U Lam-jew (7) Ka 'nirbah, (8) Ka 'nirlang, (9) Ka trai ba kut ki snir. Baroh lang ki long

khadphra dkhhot. Hynrei mynta ka Raid Myllem ka shim tang khyndai dkhhot haba ka leh niam.

La ju pynlong ĩa ka sngi leh niam ha ĩewduh tang shisngi ha ka sngi ĩewrynghep, bad kata ruh haba la mih bnai. Haba kñia ki pyndonkam :

- i) Uwei u syiar ryngkuh bad uwei u blang ĩewduh,
- ii) Uwei u syiar ryngkuh bad uwei u blang Shyllong,
- iii) Uwei u sniang- u Suitñia longraid.
- iv) Kawei ka syiar kynthei bad kawei ka blang kynthei, ka Blei ĩew, ka bym pat pun khun.

Ĩa ki blang la ju peit ha u tor, ynda la pyrsad lyer bad sa shim khyndai dkhhot, ĩa u sniang ki ju peit ha u lir jong u dohnud bad ki shim khyndai dkhhot. ĩa ki syiar la ju peit ha ka snier ĩa ka thoh ka tar. Ki blang ki dei ban long kiba lieh bha rynieng bad bha reng. ĩa u sniang pat ki pyndonkam da uba ĩong tlem bad ki syiar ki dei ban long la kumno kumno kiba lam saw.

U Syiem Mile Singh ryngkat u Sunen na ka bynta u Dor Singh Kharkongor u Rangbah Kur ki Kharkongor bad u Beh Nongkhlaw na ka bynta ka Kur Nongkhlaw ki la aiti ĩa ka khyndew naduh Wah Pomdngiem haduh Wahlakadeng ha them ĩewduh ha ka snem 1863 sha u Officiating Commissioner jong ka Assam. Hynrei u Syiem Mile Singh ryngkat ki Bakhraw ki bat ĩa ka bor hima halor ka ĩewduh, bad kim shah ĩano ĩano ban ktah kti ĩa ki Mawbyinna ha khlieh ĩewduh namar ba ki dei ki matti jong ki barim bajah.

Ka krypteng ĩewduh ka don ha ki lai tylli ki shnong ba pher jong ka ri kum ka ĩewduh Shyllong, ĩewduh Lyngkyrdem bad ka ĩewduh Smit. Ka Niam Hima Shyllong ka long kaba la slem bah bad ju leh niam ĩa ka da ki longsan ka Hima ryngkat ki khun ki hajar. U

Syiem synshar u ju aiti ha uno uno u para jait Syiem Shyllong hi, lada um pom da lade ia ki blang knia na kano kano ka daw. Don ka jingĩathuh pateng ba ka niam ainguh ha u 'lei Shyllong ka la long teng ha Laitlyngkot iew Shyllong ha ki sngi barim. Ki mawniam ki don mynshwa ha basa doh. Nangta la khreh tei ia ka iengsad ha WAHRISHOT (mynba la wan rah ia ki rishot iengsad) ha Raid Mylliem (mynta ka dei ka Raid Nongkynrih) ha ka jaka phang mihngi ka iing Inspection Bungalow (P.W.D) ha Laitlyngkot. Hynrei ki la pynsangeh noh hadien na ki katto katne ki daw. La thung ruh ia u mawkyrhong ne mawbynna jong ki jait Sohtun uba radbah shibun ha iew Shyllong Laitlyngkot bad uba ar ka jingjrang hadien u mawbynna Nartiang. Une u mawkyrhong u la ngat noh ha u jumai bah 1897.

Haduh ka por u Bormanik II, la iathuh, ba ka Pomblang Hima Shyllong ka long tang ha iewduh Shyllong *hi bad pynshad hima* ha basa saiwul-basa pusari mynta. Hynrei na ka daw jong ka thma ym lah shuh ban pyndep niam ha katei ka jaka. Ki Phareng kim ai lad ban ialum paid ha iewduh, kumta u Singmanik II u hap ban pyndep ia ka niam Pomblang *namar bym bit ban pynduh ia ka. U Singmanik II* u la rah shikham u 'dewsaw iewduh bad u la leh niam ha Lyngkyrdem. Kumta la pynkyntang iewduh sa ha ka bri ki jait Khongsti ha iewduh Lyngkyrdem. Ka Niam Hima ka iaid thik thik khlem don jingthut ei ei wat la ka thma ka neh jyn saw snem tam (1829-33).

U Saiñmanik uba ki khot ruh u Shanmanik u la shimti ia ka kam Syiem Hima Shyllong hadien ka jingiap ba sngew sangsot jong u Bormanik II ha ka snem 1833. Nangta u Saiñmanik u synshar kumba phra snem ei ei. Ka iingsad Hima Shyllong ha Mylliem kam shym don khun shynrang satia hadien ka jingiap



u Saiñmanik. Kumta ka niam ainguh ha u 'Lei Shyllong bad Pomblang iewduh ka ïai sah ha ka iing u Singmanik II ha Lyngkyrdem. U Syiem Klur Singh u la pynlong ïa ka Pomblang Hima sa ha Smit. Sa shisien pat la pynkyntang Lum iewduh hangto ruh hadien ba ki la shim shikham u 'dewsaw na ka Pomblang iewduh ha Smit de. Ka Raid San Shnong, ki Basan Nongkseh bad Basan Nongumlong jong ka Hima Myllem bad ka Hima Nongkrem ki ju ïashim bynta lang ha ka niam ainguh ïa U Trai Nongthaw.

Ka iewduh Shyllong ka don ki mawbynna ha ka jaka ba khot 'iew-dieng-kaiñ' bad la thung ïa ki naduh ka por u Syiem Mied, U Kyrshap bad u Bormanik II. Kine ki mawbynna wat la ki dang don mynta hynrei ngim lah iöhi shuh ïa ki namar la kah da ki sem iew. Kan ithiang shibun lada don ka 'per syntiew ne park ha katei ka lyngkhot khyndew sawdong ki mawbynna.

Shwa ka snem 1863 ki shnong ba marjan bad ka iewduh ki long ka Nongkseh rim, Mawprem bad Mawkhar. Ka Nongkseh rim ka don hapteng ka sdad Wah Umiam-Khwan bad ka Wah Umshyrpi-Umkhrah ha ka Raid ki Sawkur Nongkseh (Rumnong, Thangkhiew, Nengnong bad Lyngdoh Nongkseh). Ka Mawprem ka don hapteng ka Nongkseh rim bad ka iewduh. Kane ka dei ka 'ri raid. La tei hyndai ïa ka kut ki Syiem ha khlieh Mawprem da kaba thung maw prem-rem-rem ha ka khyndew iingmane ki Nepali Presbyterian mynta. Ka Mawkhar ka don shatei na iewduh. Ka sdang naduh ka Wah Umsohsun - I Wahlakadeng haduh ka wah Umkhrah. La pynñaid ïa kane ka khyndew da ka Hima Myllem hapoh u Syiem bad ka Dorbar. U Syiem Kmuñ Manik u la thaw ïa ka iing Dorbar ka Hima ha kane ka shnong.

Ka iëwduh, naduh ba sdang ka ju bsa ia ka iingsyiem, u Syiem bad ia ki jingdonkam ka Niam Hima ha u lei Shyllong. U Syiem synshar u long u nongpyniaid ia ka iëw ryngkat ki Bakhraw ka Hima. Ki nongshong basa ha iëwduh ki siew ia ka khrong iëw ne ka khajna da ki sbai bad mynta da ka pisa. U trai hima haba u leit siew sha iëwduh kham mynshwa um ju siew bai khrong ne bairung iëw. Hynrei u bar hima u hap ban siew ia ka bai dan shwa ban rung ha iëw. Kumta ka don ka jingithuh ia u trai hima bad u bar hima.

Don tang khyndiat ki basa heh ha iëwduh mynshuwa bad kiba bun ki long tang ki sem dara, ba la shu ker *'da trap kynhong*. Hynrei, mynta la mih bun rukom ki basa bun mala ha iëwduh. Man ka sngi ki nongthied ki sop ha ka naduh dang step haduh ban da dum ngaiñ, bad ki laiphew bynriew ki iaboi ha ka. Toi, kam dei ka iëw luri lura hynrei ka iëw don riti. Haba iathuh shaphang ka iëwduh, la thoh ha ka kot kaba ai kyrteng Khasi and Jaintia Hills District bad kiwei ba la pynmih da u B.C. Allen na Shillong ha u October (Risaw) 1905 (Sla 96) bad u la ong kumne :-

*"The Bazar at Yeodo, the present burra hat, was largely attended as it was connected with the religion of the Khasis. The place was said to be a sacred one and solemn sacrifices were offered there and dances held. On these occasions the people attending the bazaar had the privilege of paying double the ordinary toll."* Ha ka ktien Khasi ka jingmut ka long *"ba ka iëw ha Yeodo (iëwduh), ka iëw heh ba mynta ka long kaba bun briew bha namar ka don ka jingiasnoh bad ka niam ki Khasi. Kane ka jaka, la ong ka dei kaba kyntang bad ki ju pynlong ki jingknia jingkhriam ba i shongkun ryngkat ki jingshad de. Ha kum kitei ki khep ki nongleit iëw ki ioh ka lad ban siew burom arshah na kaba ki ju siew ia ka baikhrong iëw."*

# U LUM DIENGĖI (Radio Talk)



10 tarik Jymmang (May), 2015

## *Khublei ia phi baroh,*

Ha kane ka por, nga kwah ban iasyllok lem bad phi shaphang u LumdiengĖi, bad kaei ka khana ba ngi ioh na une u Lum. Ka kynjang jong une u lum DiengĖi ka long 1851 meters na ka sla duriaw Bay of Bangal. U kham lyngkot 113 metres na ka kliar u Lum Shyllong uba jrong 1964 metre. Kiwei pat ki lum kiba don ha ka juh ka jylli ha kane ka thaiñ ki long u Lum Sohpetbneng uba jrong 1350 metres, bad sa uwei pat u lum u dei u lum Mawpatkor uba jrong haduh 1687 metres. Kitei ki lum sawtylli ki don la ka jong ka parom, kaba ialam ia ngi sha ki jingmut jingpyrkhat sha ka hyndai bah jong ki sngi barim u Hynñiewtrep.

Ha kane ka por nga kynmaw biang ia ki sngi ki por, ha kaba nga la leit iuh kjat nyngkong ia u Lum DiengĖi. Kata ka dei ha ka 5 tarik u December 1982, kaba la palat 28 snem tam ei ei mynta, katno ka la long kaba sngewtynnad haba ngi shong kali naduh Shillong haduh Mawlaingut bad nangto pat de, ngi sa kiew artad sha u Lum jong ki khanatang jong u mynbarim bajah da kaba iaaid kjat. Kumta tang shu poi top ha kliar jong u Lum, ngi hiar arsut khyndiat ha kawei ka thliew kaba heh bad kaba iar. Nangta de ka long kaba jylliew lhung bad ba la mih da u khah suda hangta. Ia kata ka thliew kaba iar ki ong ka dei ka tynrai jong kata ka DiengĖi hyndai. Na kliar u Lum DiengĖi haba ngi pynshang ia la ki khmat,

ngi iohi ia ka thain Ri Bhoi kaba itynnad bha. Hynrei haba nga leit biang sa shisien sha une u juh u lum ha ka snem 2000 nga shem ba katei ka thliew ka la nangdam nangdam da ka jingtuid ka khyndew nalor.

Ha ka rngi bad ha lyndet jong ki ranap lum jong u Lum Diengiei ki don haduh 14 tylli ki shnong ba mynbarim bajah jong ka thain Shiliang Um. Kata ka kyrteng jong kita ki shnong ki long (1) Lawmei (2) Kreit (3) Mawlaiteng (4) Maw-ri-pih (5) Mawlum (6) Phansawrang (7) Mawlaingut (8) Nongmadan (9) Nongpathaw (10) Mawmih (11) Nongsaw-iung. Shaphang sepngi na u Lum Diengiei don ka (12) Dewsaw (13) Kynroh (14) Krang. Ha ki kjat u Lum Diengiei shaphang mihngi ka don ka wah Umiam-Khwan kaba mih na kawei ka jaka kaba ki ong, ka 'Langkyrtiang'. Na katei ka tyllong um kaba don ha ka thain Nongthliew, la mih artylli ki wah bah kawei kumba nga dang iathuh myntan, kata ka dei ka wah Umiam Khwan ba poi sha Damsite bad kaba ar pat, ka tuid sha Sepngi ka dei ka Wah Khri.

Haba ngi iakren shaphang u Lum Diengiei ne u Lum Sohpetbneng, kan bha shi katdei ban tip, uei u Khasi kum ka jaitbynriew? - Ka jubab ka long ba ngi ki Khasi, ngi dei ki khun ki ksiew bad ki para ki pyrsa jong uta u Hynñiewskum Hynñiewtrep. Katkum ki khana niam na u Sohpetbneng, ngi ngeit ba ngi wan sah sha kane ka pyrthei na bneng. Ka kyrteng kaba ngi sngewtynnad ban ai ia lade kum ka jaitbynriew ka long, 'U Khun Khasi Khara' ne ki khun ki ksiew u Hynñiewskum Hynñiewtrep. Ka jingkylli ka mih uei uta u Hynñiewskum Hynñiewtrep? Ka jubab ka long, ba u dei uta uba long shi bynta na kata ka jaidbynriew kaba la ai kyrteng ia lade 'Khadhynriewskum, Khadhynriewtrep.

Shano pat kita ki Khyndaiskum Khyndaitrep ki don? Kum ki Hynñiewskum Hynñiewtrep, ngi ngeit ba kita ki Khyndaiskum Khyndaitrep ki la ĩap, bad kiba ĩa bam kwai ha dwar U Blei. Te ka mut aũu pat kita ki Barim Bajah? Ka jubab ka long ba ki kdew ĩa ki kpa bad ki kmie tymmen jong ngi naduh ki Hynñiewskum Hynñiewtrep haduh ki Khyndaiskum Khyndaitrep. Te u khun Khasi Khara kumba u long mynta u dei ne em u Hynñiewskum Hynñiewtrep paka? Ka jubab ka long 'EM' bad ym dei kumta? Hynrei ki don ruh kiwei kiwei pat ki jaitbynriew ĩa kiba la pynkha da ki kpa Khasi, tangba la pynkylla Khasi ĩa ki.

Ki leh kumno ban pynlong Khasi ĩa ki? Ka jubab ka long ba ki ai jait ai khong thymmai lyngba ka **"Tang jait"** bad ki wanrah ĩa ki hapoh ka Riti, Dustur bad ka Niam Khasi. Kiba kum kiei kita? Kiba kum kita ki dei ki para kur para kha jong ngi ha kylleng ka Ri, kiba ai jait 'Dkhar' ĩa lade, lane kito kiba ka kyrteng jong ki ka lam da ka tien 'Khar' na khmat. Te ngi ju ai kyrteng kumno ĩa ka Ri jong ngi? Ki ju ong ka dei ka Bri u Hynñiewtrep ne ka 'Ri shongpdeng pyrthei'. U Lum Sohpetbneng uba long ka thymmei ka Jaitbynriew u don ha u Latitude ba 25.1 bad 26.5 degree bad u Longitude pat u dei 92.52 mihngi na khliar jong u Lum Sohpetbneng.

Hato, dang don shuh kano kano ka kyrteng kaba ki ai ĩa ka? Ka don kata ka long ka 'Ka Ri ĩuh kjat ki blei ne 'ka Ri Umsnam u Ñi u Kong. Balei ba la khot ĩa ka kumta? La khot ĩa ka kumta, namar u Ñi u Kong u la dei ban thei da ka snam, ha kaba rah wait rah stieh hyndai ha kaba ki la ĩada ĩa ka na ka bynta ban ĩoh bat ĩa ka, kum la ka jong ka hok kynti.

Don ne em kiba dawa trai pat ĩa ka? Ka jubab ka long ba baroh shi katta ka long ba ym don. Hynrei

mynta la bun kiba kam trai, namar ba jynsur palat ka aiñ iada khyndew ha Meghalaya bad bun tylli ki shnong Khasi ki la nangjah nangjah kum ka shnong Lad Rymbai, Byrnihat-Khanapara bad ka Nongbah Shillong hi ka la kylla Ri Dkhar mynta.

To ngin kdat noh shaphang u Lum Diengiei. Ka juk Diengiei ka wan hadien ka juk Sohpetbneng. Dang don mynta kiba dang sngewthuh bakla ia u Sohpetbneng ne ka Jingkieng ksiar uba jrong bad kot haduh bneng. Hynrei ka Diengiei pat ka jrong tang haduh shiteng suiñ kaba la kah dum ym tang ia kane ka Ri jong ngi hynrei ia ka pyrthei ruh lyngba ki sla barben jong ka. Ka jingkyllon jong u dieng halor u Lum Sohpetbneng ka mut kaei? Ka jubab ka long ba ka jingkieng Ksiar kaba pun lynti ia u briew bad U Blei ka la dkut noh. Nangta kaei pat kaba jia hadien kata? Ka aiom Ksiar ka la wai ne kut noh bad ki sngi jong ka 'Ksaw ka kpong ki la leit, bad la sdang pat ki sngi jong ka Diengiei. Te kaei ka jingmut jong kata? Ngilap ia ka jingshai ba ju don ha u Hynñiewskum Hynñiewtrep la kah dum noh kum ka jaitbynriew ki la hap tare haba dum bad ka bym tip shuh la ka jong ka lynti bad la ka jong ka daw.

Kumta ka Diengiei ka la nang jrong nang jrong bad ki sla dieng jong ka, ki la kaweh iei shi iei. Ym long shuh ka thung ka tep, kaba lah ban poi sha ka iap thngan bad ka pyrthei u Hynñiewskum Hynñiewtrep ka lah ban wai noh. U la sah sa tang ha ka Lyngngoh bad ka lynga jingmut. Te kumta ki la pynlong ka Dorbar ha khmat u Shynrang briew u dei ban iamih ha ka Dorbar. Ki la iarai ban pom noh shisyndon ia ka Diengiei. Kumta ha ka sngi kaba bud ki la iasei ia ka wait, u sdie ban pom noh. Hynrei ba ka la heh palat kumta kim lah ban pynkyllon tang hapoh shi

sngi. Ki ïeh noh bad ha ka sngi kaba bud ki lap ba kata ka dieng ba ki pom, ka la dap doh biang. Kumta shi kumta bad katba nangpom ïa ka Diengïei, hynrei ka nang ïai heh bad ka sngaid bad khlem lah ban pynkyllon ïa ka.

Khatduh ka Phreit ka la wan ïathuh ba dei u Khla uba bishni ïa u bynriew ba um kwah ba kata ka Dieng kan dkut. Man ka miet u Khla u ju wan jliah da u thylliej ïa ka jaka ba pom. Te kata ka Dieng ka dap doh biang mynstep. U Bynriew u la kylli na ka Phreit ba un leh kumno? Ka Phreit ka la ong ba lada u bynriew u kular ban ai bam ïa ka na u soh nyngkong na kaba u rep, te kan ai ïa ki buit kumno yn leh? U bynriew u la mynjur. Ka ong ïa u briew ba u dei ban pynap da ki sdie kiba nep ha ka jaka ba ki daiñ. Te u Khla u la phot u thylliej haba u jliah, te u la dkut bad phlei snam u thylliej. Kumta la lah ban pynkyllon ïa ka Diengïei.

Kumta u khunbynriew u la ïoh biang ïa ka jingshai. Kaei kane ka Diengïei? La ka dei ka dieng ba mih na u Lum Mihding (volcano) hyndai ne ka dieng shisha? Tangba kawei ka jingshisha ka long ba ki Mei Kulong Pa Kulong jong ngi ki ïathuh ba ka dei ka dieng. Katno ka rta jong kata ka Diengïei hyndai? Katto katne snem mynshuwa ka Geological survey of India ka la lap ïa ki shyieng ki shruh jong u mrad 'Dinosaur' ba la duh jait ha ki thaiñ jong ka Ranikor ha West Khasi Hills. Ki ïathuh ba uta u mrad Dinosaur u la im bad ïaid ha kane ka Ri Khasi kumba 65 Milian snem mynshuwa. Sngap keiñ ka jingrim bad ka jingslem jong kane ka Bri jong u Hynñiewtrep.

Ki dieng ki siej bad ki khlaw ki btap slem slem ki ju pynlong ïa kita ki Sedimentary Rocks. Ha ka ktien Khasi ka mut ki maw syrtap syrtap maw. Te suki

ynda la slem bah ki kylla long ki dewiong, mawshun, bad kiwei de ki jait mar poh khyndew da ka jingbeh ka lyer, u slap bad kiwei kiwei. Mynta wat la ngim lah iohi shuh ia kata ka Diengiei hynrei ki thied jong ka ki dang paw bad suhthied ha kylleng ka Ri. La iohi bad lap ia ki thied Diengiei haduh mynta ba ki dang don bad paw ha ki thain jong ka Laitlyngkot bad ha ka Surok ban leit sha ka shnong Dienglieng harum jong ka shnong Smit.

Haba iakren ia u Lum Diengiei, ngi lap ba ka don ka khana kaba iajan bad ka Krem Lamet Krem Latang. Ha u Diengiei ngi ong la kah dum ka Sngi. Hynrei ha ka Krem Lamet Krem Latang la kah dum syndon tiw. Shuwa ia kata, ka la don ka shad ha ka lypung shad. La wan iashad ki bried bad ki mrad ki mreng kumjuh. U Bnai bad ka Sngi ki la wan iashad lang shipara. Hynrei ka khmat ba kynriang jong ki nongpeit kai ba tharai sniew, ka la pynlong ia ka Sngi ba kan leit rieh soit sha ka Krem Lamet Krem Latang. Ka pyrthei ka la dum iong ngit. Kaei kaba u Hynniewskum u Hynniewtrep u lap ha ki sngi jong ka Krem Lamet Krem Latang, ba ka jingim jong u kam don jingmut shuh. Ka pyrthei sawdong jong u ka long kaba thylli bad kaba shu suda lut kat shaba phai.

U la khot ia ka Dorbar kumno yn leh? U la phah iasaid sha ka Syiem da u Kohkarang ruh ym long, da u Hati ruh ym long. Ha kaba lai, lai sien lai wat la phah da u Syiar Lymboit Lymbiang, bad tang shu kynih ma u lai sien, ka Syiem Sngi ka wan ai jingshai sha ka Pyrthei? Dei hangta mo ba u wan u Syiar? Ka jubab ka long Hoooid. U Hynniewskum Hynniewtrep u la pyndonkam ia u Syiar tang kum ka lad ba un iakren bad U Blei lyngba ki dak ki shin katkum ka jingjapan. Hato, kan long kaba shisha ne em ba u Syiar u kit ryngdang u bah ryndang ia ka pap ka



sang u khunbynriew? Ka jubab ka long EM; kam don kaba kum kata ha ka ka Niam Khasi.

Kyntang iawai, ngi shem ba ka Diengiei kam don shuh mynta halor u Lum Diengiei. Hynrei ka thain Shiliang Um Lumdiengiei ki pynieng ia ka hok ia ka ksaw ka kpong. Ki jait Pathawdih ki ju leit ai leh niam da u Blang Diengiei na ka liang u Lumdiengiei ha ka lehniam shisien shisnem ha ka Hima Khyrim ha U Blei Shyllong.



# KA UPPER SHILLONG HA KI SNGI BA LA LEIT NOH

*Rupang, 29 tarik Jylliew (June), 2015*

Ka Upper Shillong ka long ka shnong kaba don shathie na ka wah Umshyrpi bad sha sepngi na ka Wah Umjasai. Ka don marjan bad u Lum Shillong harud ka Surok National Highway No. 40 jong ka Shillong Dawki-Tamabil bad surok Sohra, Mawsynram bad Nongstoiñ. Ki Shnong kiba don ha ka thaiñ Upper Shillong ki long (1) Lummawbah (5) Nongkseh (3) Umlýngka (4) Nongumlong (5) Laimer (6) Sawmer (7) Sanmer (8) Mawklot (9) Nongpyiur (10) Umdiengpun ne Hynñiewmer.

Ki shnong ba kham rim napdeng kitei ka dei ka Nongkseh, Umlýngka, Nongumlong, Mawklot, Nongpyiur bad Umdiengpun. Ki kyrteng thymmai kum ka Laimer, Sawmer, Sanmer ki long ki shnong kiba dang shu mih ynda la shna ña ka surok ñaid kali kulai, ñaid kali motor sha Sohra. Ki trai bri trai jaka naduh Lai mer shaneng haduh Sanmer ki dei ki kur Kharkongor, Thawmuit, Kharbudnah bad jait Nongkhlaw.

Ha ki snem 1861ter ter ka sorkar Phareng ka la thied jaka ha Armer bad Sanmer, Hynriew Mer bad Hynñiew Mer Upper Shillong ha kaba la shna ña ka *Umlong Cantonment* ha Armer. Ha kane ka len shipai u trei kam u Heh duh jong ka Indian Army u Lt. General uba ki ong u dei u General Officer Commanding ka dong shatei lam mihngi jong ka India. ña ka Headquarter jong u la tip da ka kyrteng "101'. Haduh ka snem 1947 shwa ba ki phareng kin mih na India, la tip ña katei ka jaka trei u heh shipai G.O.C. kum ka **Braemer Estate**".



Ka Indian Air Force ka don ka Headquarter ha Hynñiewmer. U khlieh duh ka Eastern Air Command u dei u Air Vice Marshal bad u pynñaid kam ña ki Liengsuiñ ñaleh thma nangne na Upper Shillong. Katba lah ban kynmaw katei ka Headquarter ki Air Force ka sdang trei kam naduh ka snem 1964 ei ei, kata hadien ba ka Ri India ka la shah hiar thma ha ki China ha u October 1962. La tei ña ka Upper Shillong Helipad jong ki Military ha ka snem 1963.

Haba la pynlong ña ka Shillong kum ka Nongbah ka Ri Assam ha ka snem 1874, ka Upper Shillong ka la sdang na ki shnong kiba rit kiba dang khyndiat briew bad ki la nang heh nang heh suki suki. U Viceroy jong ka Ri India u Lord Northbrook u la wan khmih ña ka Shillong ha katei ka juh ka snem 1874, da kaba shong da ka jhad naduh Calcutta lyngba ka Wah Padma bad ka Wah Brahmaputra. U la hiar nyngkong ha Guahati, nangta u la wan sha Shillong da ka surok G.S. Road haduh Shillong. Ym tang katta, u la wan jngoh ña ka thaiñ Upper Shillong de. U la ai jingmut ba khnang ban pynitynnad ña kato ka thaiñ naduh Armer haduh Pomlum dei ban shim jaka noh da ka Sorkar. Ki bor sorkar Assam ki la leh ña kata mardor. La shimti noh shi bynta ña ka jaka jong ki briew bad la thaw ña ka law sorkari ne kita ki Govt. Protected forests naduh Laitkor, Riat Laban Upper Shillong haduh Pomlum na ki ranab ba marjan bad u lum Shillong. Ngim lah ban tip lada ym dei ba wan jngoh u Viceroy ka Ri India sha Shillong, ka Upper Shillong ka lah ban ñoh ña ka burom kum ka jaka ba itynnad ha kaba ki 'er iwbihi kin ñai suhsieng ban ring mynsiem ña ka oxygen na ki law diengkseh jong ka.

Haba ka Sorkar phareng ka la ñoh jaka ha Upper Shillong ka la nang kwah shuh shuh haduh u kliar

lum Shillong syndon. Īa kane, u Rajah Melay Sing ka Hima Myllem (Kñi tymmen jong u Pa'iem Latho Manik Syiem) um shym la shah satia ne kohnguh. U la ong ba u Lum Shyllong u dei u Lum Niam, kumta ym lah ban don ne long trai khyndew dano dano ruh. U la sait ĩa la ki jong ki kti, ba um lah ban die ĩa u lum niam jong ka Jaidbynriew sha ki kti jong ka Sorkar Phareng (la sot na ka kot "From Residency to Raj Bhawvan - A History of the Shillong Government house") ha ka lynnong "Acquisition of Land" ne jingshim jaka ka Sorkar, page 25-26.

Ki Sngi bad ki por ki la nang ĩaid ha ki shalyntem jong ka por. Ka Upper Shillong ruh ka la nang ĩai kylla dur katkum ki juk. Ha ka por synshar phareng ki sahep bad ki mem ki juh ban shong ban sah ha Upper Shillong kum ka jaka ba pyngngad. La ĩathuh ba don haduh 14 tylli ki ĩing bangla naduh Laimer haduh Sawmer shiteng ba sah ki phareng.

1. Ka ĩing Bangla Rong Jyrngam kaba dei ka jong u Sahep Gilfelen ba don ha Nongkseha syndah ĩing I Kong Alvareen Lyngdoh. Ha kane ka ĩing la wan sah pyngngad sah sumar pang shipor u Sir Syed Muhammad Saadulla U Prime Minister ba nyngkong jong ka Assam ha ka snem 1937 bad 1943 haduh 1946. Kane ka ĩing ka dang sah kumta haduh mynta.
2. Ka ĩing Bangla jong u Sahep John Edmund Haffield uba dei u trai jong ka "Chesnut Lodge" ba don bun ki diengsohot Phareng. La sin kyrteng ĩa une u shep Irish kum u Sahep Pyngkding, namar u long uba sngaid. Ha kane ka ĩing bad ka jaka jong u la ĩeng mynta ka St. Paul's Seminary ha 3<sup>rd</sup> Mer.

3. U Sahep Melish u dei u trai jong ka Farm dieng soh uba shongkha ïa I Kong Niak Nongkhlaw. Kane ka Farm ka la duh noh mynta. La tip ïa ka mynta kum ka Riatsohkhlur ba la dep die lyngkhot lyngkhot sha ki Khar Nepali bad katto katne ngut ki Khasi de.
4. Ka Meath Home ka dei hapoh ka jingsumar u Haidu Sahep na Calcutta. Man la ka lyiur u ju wan ïalam kai ïa ki khun Sahep khun mem na ri Dkhar ban pynsah hangne ha ïing haduh ka snem 1946-47 ei ei. Ki Nongtrei jong ka Meath Home ki sah ha ka jaka ba don ka Bormanik College namar ka dei ka jaka jong ka Meath Home. Katba ki syiem Tripura kim pat tei ïa ka "Tripura Castle" ha Cleave Colony, la ong, ki la ju sah ha katei ka Meath Home. Ha kane ka jaka ki don ki kor ki bor ba thew ïa ka jingsdang bad jingïaid lynti u Khmi ne u Khynñiuh jumai jong ka Ophis "India Meteorological Department" ha 3<sup>rd</sup> Mile.
5. Ka ïing Bangla jong u Sahep Robert Edmund Haffield ha 3<sup>rd</sup> Mile ka sah kumjuh kumba ka long. ïa une u Sahep Irish ki sin u Sahep raikhoh bad u shongkha bad i Kong Kriksibon Kharkongor. U long uwei na ki sahep ba kham don kham em jong ka Upper Shillong.
6. Ka ïing Sahep Nepal mynshuwa ka dei ka jong uwei u sahep ba ju shna ïa ki pleit ne plate lyngba ka ïing factory jong u. U ai kyrteng ïa ka ïing da ka "Wilton Hall". Hadien la thied da uwei u Syiem khynnah ka Nepal kaba u ju leit u ju wan bad u sah shipor ar por bad ka Mahadei kliar jong u. Ki ong ka khun jong u ka la die noh ïa ka Bangla bad jaka puta sha ka Office jong ka Indian Institute

of Geomagnetism bad ka leit sah noh ïa lade sha Calcutta.

7. Ka ïing Bangla jong u Sahep Mawatt la ai kyrteng da ka "Pine Ridge". La die mynta ïa kane ka Bangla sha ki Khasi.
8. U Sahep Berkeley u trei kum u Sahep Bishar Magistrate bad u dei u Trai jong ka "Raj bari". U shong marwei bad um don khun don kti. Ki ong u la thoh WILL lut ka Spah ka phew bad jingdon jingem sha ki nongtrei ïing jong u. Kawei ka jait syiem kynthai, Manipuri kaba ïoh lok sahep bad ka la sah ha katei ka ïing. ïa u khun jong ka la sin kyrteng da u Raj Kumar. Ka kyrteng ba pura jong u ka long u Mr. Edward Lawrence McCulloch. Une u Sahep u la khlad noh ha ka snem 1958. U dei u kparad jong i Kong Jenifer Diengdoh.
9. Ka "Evergreen Cottage" ka dei ka ïing bangla kaba don ha Sawmer shiteng. Mynshwa ka dei ka ïing jong ka Mrs. Townsen, bad hadien pat la leit sah sa u Bahu William ha katei ka ïing. U World Renowned Naturalist u Sahep E.P Gee u sahep shong khynraw u la sah marwei ha katei ka ïing bangla haduh ka snem 1966-67 ei ei. U la lum ïa ki syntiew ki skud bad la thung ha katei ka Bangla. U la shondur na jan bha wat ïa u khla katba u dang ang shyntur khlem jingsheptieng ei ei. Shipor la shim wai ïa katei ka ïing da ka Ophis MeSEB ban siew bill Electric ha ka thaiñ Upper Shillong.
10. Ka don sa kawei ka ïing Bangla kaba don jngai na ka surok bah ha syndah ka 'lawsorkari kaba la jer kyrteng da ka "Rose Cottage, kaba la tei ïa kato ka ïing bangla kaba heh naduh ka snem 1929. Hangne ju shong ju sah u Sahep John Batram Ram haduh

ki sngi ba un da khlad na ka pyrthei. Ki nong Sawmer ki sin ĩa u kum u Sahep Rem, uba ju sngewtynnad ban shong kulai dang step dang step naduh Sawmer haduh 'Law Jynriew haneng *Fire Brigade* Laitumkhrah, lyngba ka *lynti kodom kulai* ne ka Bridle's Path ka lynti ĩaid kulai". I kmie jong I Rangbah Manoi i Kong Rose Mary Mawlong i sah mynta ha kane ka Bangla u Sahep Rem hyndai.

11. U Sahep dih smuk ba ri syiar ha Sawmer shiteng u dei u Mr. Carother. Une u sahep u shong kha ĩa ka Kharkuli kaba na Silchar Barak Valley jong ka Assam. Ynda la ĩap utei u sahep, kane ka lok ka la leit phai sha la shnong bad ka die noh ĩa ka ĩing bad ki jingdon jingem jong u.
12. U Mr. Blake jong ka Ri Scotland u la tei ĩa ka ĩing Bangla ha Sawmer shiteng. U la ĩapoi kha bad I Kong Nelsi Kharshiĩing. U la die noh ĩa ka bangla ĩing ha ki Syiem Charkari jong ka Uttar Pradesh. Jait ba dei ki Syiem te ki im bad leh kmen sadhai bad ki ri ĩa ki ksew da ki dorjon. Mynta sah sa tang jingkyrmaw. Kine ki Syiem ki la die ĩa ka, bad la thied da uwei u Khasi badon baem na Shillong.
13. U Sahep Ernes Montgomery Wood u la long uwei na ki sahep ba paw khmat ba ju sah ha Upper Shillong bad la ki khun ki kti ha "Sunny Side". Une u Sahep u la ĩapoi kha bad I Kong Mini Swer bad ĩoh hynriew ngut ki khun ki kti. Kawei ka dei ka kynthei bad san ngut ki shynrang. Ki la die noh ĩa ka ĩing jong ki sha ka Catholic Mission ha ka snem 1953. U khun rangbah jong ki u dei u Brigadier Ronald Earnest Wood Swer. Une u la rung kum u Military Officer ha ka Indian Army. Ha ki snem 1943-45 u la leit thma sha ka Ri

Burma pyrshah ia ki Japan. U la bat ia ka kyrdan Brigadier jong ka Assam Regimental Centre haduh ba un da shong thait. Haduh mynta dei tang ma u marwei napdeng ki Khasi uba la ioh bat ia ka Rank kaba saw ha ka Military order jong ka Indian Army ban ialam ia ki shipai ia ka Brigade baroh kawei kum u Brigadier jong ka.

U Brigadier R.E.W. Swer u la iapoi kha bad ka mem French Phareng. U la khlad noh ha ka snem 1984 ha Ri France.

14. U Mr. Hall u long sa uwei u sahep, ba ki nong Sawmer ki dang kynmaw ieit ia u, kum u Sahep Upper Shillong ba don ka maiñ Sahep. Une u la iapoi kha bad I Kong Kre. Ha kane ka bangla jong u la wan sah khadduh sa u Sahep R.F. Twist uba ju trei kum u Garden Tea Manger sha Ri Dkhar haduh ki por synshar phareng. Une u dei u Sahep European uba la sah khadduh bad im ha Upper Shillong haduh ka sngi ka jingkhlad noh jong u ha ka snem 2007. La tep ia u ha u lum jingtep 'Law diengmet jong ka Sawmer.


Haba ngi ialap khana ia ka Upper Shillong ha ki sngi ba la leit noh, ngim sngewdei ban klet ia ka Nur-um kaba tuid shar shar naduh Sangmeiñ haduh ka Farm thung soh u Sahep Melish bad Kong Niak Nongkhlaw ha Riat Sohkhlor kaba tuid lyngba ka Farm Hynriewmer sha Sanmer, Sawmer, tuid lyngba ka Phyllaw Syntiew ha Meath Home (Laimer) haduh Farm thung soh.

La ai kyrteing ia katei ka Nur-um kum ka Upper Shillong Aqueduct ba la tei ia ka naduh ka snem 1938-39 ei ei. U Sahep Edward Lawrence Mcculloch u ju khmih bha ia katei ka Aqueduct tad haduh ba un da khlad noh ha ka snem 1958. Ka la long ka jingmyntoi



ha kito ki por ban saitjaiñ sait nep, thung jingthung bad ri jingri da ka jingdon katei ka Aqueduct. Lai snem hadien ba la khlad u Sahep Mcculloch kata ha ka snem 1961, katei ka nur-um ka sdang duh noh bad kam shym poi um shuh sha Laimer.

Ka Upper Shillong ka la ñaid lyngba ki jingsuk bad jingpalei ha ki sngi ba la leit noh. Kawei ka jingsyier ña ka Upper Shillong ka long ka jingkhapngiah kali naduh Umshyrpi haduh 101 haduh Laimer man ka sngi. Sa tang arsnem ka surok National Highway na Tura-Nongstoiñ kan poi haduh Hynñiew Mer. Te ka jingkhapngiah kali kan lah ban poi shaduh Lai Mer haduh Umshyrpi man ka sngi.



# “KA MEGHALAYA COMPULSORY REGISTRATION OF MARRIAGE ACT, 2011”

*Mawphor, 25 tarik Nailur (Sept), 2015*

**K**a Sorkar Meghalaya ka la pynmih paidbah ia ka jingpynbna ha ka 12 tarik u September, 2011 ba ka thma ban pynlong aiñ ia katei kaba la kdew haneng, katkum ka Notification No. ERTS (R) 7/2011/20 lyngba ka Ophis u Commissioner bad Secretary jong ka Department jong ka Excise Registration Taxation bad Stamps Department. La iohi ia ka lyngba ka Website jong ka Sorkar ba la shon ha ka ktien phareng ne English. Ka jingkylli ka mih ba katno phew spah ngut kiba don ia ka Computer ryngkat bad ka Internet Connection ha ka Jylla jong ngi kiba lah ban sngewthuh ia ka ktien English.

Ha lehse ka Sorkar ka thmu bad phah register *“Iathoh tang ia kito kiba thmu shongkurim kiba sngewthuh bad nangkren ia ka ktien phareng, ia kiwei pat ym donkam ban tip wat la ka ktien Khasi bad Garo ki long ka ktien Sorkar bynrap ne Associate Official language jong ka Sorkar Meghalaya, ne phi ia ong kumno para ri?”*

Ñiuma, na ka bynta ka jingmyntoi ki rang bad ki thei samla kiba thmu ban iakyntiew kurim te katei ka Compulsory Registration of Marriage Act 2011 ka long kaba donkam ban tip bniah ynda la pynjari da ka Dorbar thaw aiñ ka Meghalaya, kumba ka Supreme Court of India lyngba ka hukum jong ka, ka la pynmih ha ka 14 tarik u February 2006 ha ka transfer petition (C) No. 291 jong ka snem 2005, ka la pynmih ia ki hukum sha ki Jylla jong ka Ri India.

Hangta ka la bthah iā kine ki Sorkar Jylla ban pynsted iā ka “*kyrwoh iathoh*” ba dei ban da register, haba ka sorkar kham mynshuwa ka la thaw iā ka Meghalaya Special Marriage Rules 2006. Ka Meghalaya Indian Christian Marriage Rules, 2006 ka Meghalaya Moslem Marriage and Divorces Registration Rules 2006 bad ka Meghalaya Hindu Marriage Rule, 2006 bad kumta ka sorkar Meghalaya katkum kitei ki hukum haneng, mynta ka thmu ban thaw iā ka Meghalaya Compulsory Registration of Marriage Act 2011.

Kumta ka Sorkar ka sngew donkam mynta ban khot sngewbha iā ki paidbah ba kin iā ai bad pyni jingmut lem napdeng ki paidbah jong ka Jylla bad pynpoi hapoh ka 30 sngi naduh ba la pynmih iā kane ka hukum, kata ka mut bad ka sngi khatduh ban pynpoi iā ka jingthoh sha ka sorkar ka dei hapoh ka 12 tarik u October 2011.

Sa shiwat de, ka Sorkar Jylla ka da kwah eh khamtam ban ioh iā ka jingai jingmut jingsngewpyrshah/ka jingsngew/ka jingbatai ne ka jingpynshai halor kane ka “*Draft Bill*”. Ki paidbah kin sngewbha ban pynpaw iā ki jingsngew jong ki lyngba ki jingthoh. Ki dei ban pynpoi sha ka Ophis jong u Under Secretary jong ka Meghalaya Excise Registration Taxation Department, Main Secretariat Building, Room No. 510 ha kano kano ka sngi ba long Ophis.

### **Ki jingbuh kyndon jong ka Aiñ**

Ka jingpynbor ha kaba pynskhem iā ka Aiñ shongkurim. Nangta de ba dei ban pyntreikam noh iā ka ha baroh kawei ka jylla. Yn sa pynjari lyngba ka Dorbar Thaw aiñ ka Meghalaya ha kane ka jingdap ba hynriew phew ar snem jong ka Republic of India kumne harum:-

## **1. Ka kyrteŋg, jingtreikam bad ka jingsdang treikam ka aiñ**

- (1) Īa kane ka aiñ yn jer kyrteŋg ĩa ka kum ka Meghalaya Compulsory Registration of Marriage Act, 2011
- (2) Kan treikam ha baroh kawei ka Jylla Meghalaya.
- (3) Kan sdang treikam naduh kano kano ka tarik ne sngi, ba ka Sorkar Meghalaya kan pynjari ĩa ka lyngba ka jingpynbna paidbah ban sa shim lyngba official Gazette jong ka Sorkar Meghalaya.

## **2. Ka Jingpynshai ha ki ktien**

Ha kane ka Act, lyngba ka jingthmu ka long da kumwei pat, ka donkam :-

- (a) “Act” ka mut ka Meghalaya Compulsory Registration of Marriage Act, 2011.
- (b) “*Marriage*” ka kynthup ĩa baroh ki jingshongkurim ba la ĩakut bad ĩateh hapdeng ki briew na kano kano ka jait ka kynja, ka jaidbynriew ne ka niam bad ka jingĩathoh shongkurim ba la ĩateh kyrnit katkum ka dustur, ka rukom leh ne ka khana pateng ba ju don, bad ka kynthup ruh ĩa ka jingĩashongkurim biang
- (c) “*Memorandum*” ka mut ka jingthoh ba ĩarap ban kynmaw ĩa ka kam shongkurim ba la kdew ha ka section 5 jong ka Act.
- (d) “*Prescribed*” ka mut ka jingbthah ne buh rule ha kane ka Act.
- (e) “*Register*” ka mut ka jingthoh register ĩa ka jingĩathoh shongkurim katkum ka Act.

- (g) "*Registrar General of Marriage*" ka mut u Secretary jong ka Sorkar Meghalaya ha ka ophis Excise. Registration Taxation bad stamps Department, ex-officio.
- (h) "*State Government*" ka mut ka sorkar jong ka Jylla Meghalaya.
- (i) "*To contract a marriage*" ka mut ka jingpynhiar synjat ne iateh jutang ha ka shongkha shongman ha kano kano ka rukom ne ka dustur.

### **Man ba kyntiew kurim dei ban pynskhem da ka jingthoh**

- 3. Naduh ka sngi ba la iabuh ia ka tarik ha kaba pyntreikam katkum ki sub-section (3) jong ka section.
  - 1) Kano kano ka jingiaashongkha ha ka Jylla la pynbor ba dei ban kyntiew ha ka registrer jong ka sorkar katkum ka section 5.

### **Ka Jingthung ia ki Registrars Marriage**

- 4. Ka Sorkar Jylla kan hap thung, la ka jong ka kyrteng jong u ne ia ki, katba ka sngewdonkam, ba kin hap bat ia ki kam Registrars na ka bynta kano kano ka shnong ne thain kaba hap pynthikna janai.

### **Memorandum of Marriage (Ka jingiathoh kynmaw ia ka jingiaashongkurim)**

- 5. (1) Ki mamla ha ka jingiakyntiew kurim katkum ka section 3 ki dei ban pynkhreh da ka kot iateh jutang katkum ka form ba la pynkhreh lypa. Ki dei ban phah bad pynpoi sha u Registrar jong ka shnong ne thain hapoh laiphew sngi hadien ba la dep iakyntiewkurim.

- (2) Īa kane ka kot kynmaw ne memorandum dei ban sei da ka kynthei ne u shynrang nongleit kurim ba la soi da ki arngut ki nongsakhi na baroh arliang.
- (3) Katei ka memorandum ka dei ban don de ryngkat ka bai siew ba yn buh da ka dor.
- (4) U Registrar u hap ban buh tikna da ka register ĩa kino kino ki jingĭakyntiewkurim ba la pynkhreh da ki norm ba tikna. U tang shu ĩoh ĩa kino kino ki memorandum u hap ban kyntiew ha ka register. Nangta de, u hap ruh ban thaw ar tylli ki kot kaba ha ka juh ka copy bad sa phah ruh sha u Registrar General of Marriage.

**Memorandum of Marriage submitted after 30 days. (Ka kot thoh kynmaw ĩa ka jingkyntiew kurim ba la phah hadien ka 30 sngi)**

6. (1) Ka kot thoh kynmaw ĩa kano kano ka jingkyntiew kurim dei ban pynpoi sha u Registrar kam pher watla palat laiphew sngi ruh kaba la paw ha ka sub-Section 1 jong ka Section 5. La jar katta ruh, katei ka memorandum ka dei ban long da ka form ba da dei ban soi katkum ba la buh dor da ka sorkar. Tang shu ĩohi ĩa kata ka kot, u Registrar un pynrung ha ka Register sorkar bad phah sa shi copy sha u Registrar General katkum ba la kdew ha ka section 5.
- (2) Ym don ei ei ruh katkum ba la thoh ha ka sub-section (1) ba lah ban treikam ne ban pynlait na ka jingkitkhlieh ka aiñ ka riti jong uno uno u briew. Lada u leh klet khnang ne um salia ban phah ĩa ka memorandum hapoh ka por ba la buh katkum ka sub-section (10 jong ka

section 5 un ngat ha ka jingpynshitom lyngba  
ka section 14.

**Marriage Certificate to be given to the couple  
(Ka kot iathoh kyntiew kurim ban ai ha ki  
nongiatoh shongkurim)**

7. (1) U Registrar mar synioh ia ka kot iathoh shongkurim ba la pynbiang nadong shadong, un hap ai kumto khlem da buh dor ei ei ruh, u dei ban ai sha ki nongiatoh ia ka Certificate ba la dep register katkum ka form ba la mang lypa. U hap ruh ban da soi bad un da soi ruh bad ka seal jong u.
- (2) Kum ka "Certificate" ba la ai da u Registrar ka long ka nongmuna jingsakhi da ka aiñ ia ka jingiateh jutang shongkha shongman.

**Registrar to keep registrars in the prescribed form. (U nongbat ia ki kot ki sla un buh ia ki kot iathoh katkum ka form ba dei)**

8. (1) Uno uno u Registrar un pynbiang bad tyngkai ia ki kot Register of Marriage jong ka thain jong u kaba u dei khmih.
- (2) U Registrar-General u hap shon bad sam sha ki Registrar na ka por sha ka por ia ki kot ki sla katkum ka form ba la pynbiang kyrpang.

**Search of Registration. (Ka jingtohkit ne rwad ia ka Register)**

9. (1) Kum ka jingpyndem ha kano kano ka hukum ba la thaw da ka sorkar na ka bynta ka bai siew dor da uno uno u brieve.

(a) Ba ka bai siew dor na ka bynta ban wad ia ki kot ki sla ha kaba kyntiew ha ka Register of Marriage bad

(b) Ban ioh copy na ka Register.

- (2) Baroh ki jingioh copy lyngba ka Sub-Section (1) dei ban da soi kyrteng da u Registrar. Kane ka dei ban long katkum ka sakhi ka sabut ha kano kano ka Kashari na ka bynta ban ioh ia ka jingshisha katkum ka aiñ ha ka liang ka jingkyntiew kurim.

**Register to be open for public inspection (Ka jingpynbha ia ka ban ioh khmih paidbah lyngba ka Register)**

10. (1) Kane ka jing rejister ba la pynmih katkum ka Act, dei ban pyni paidbah katto katne por khnang ba ki paidbah kin ioh jingtip. Lada don ka jingdawa copy ia ka, te u Registrar u lah ban ai copy lyngba ka jingsiew dor katkum ba la buh dor ia ka.

**Register to send periodically returns to the Registrar General for compilation (U Register un hap phah pat na ka por sha ka por ia ki jingkyntiew kurim sha u Registrar General khnang ban lum lang ia ki ban buh tyngkai ha ka Bui Sorkar).**

11. Uno uno u Registrar u dei ban phah sha u Registrar General ne uno uno u ophisar ba la ai bor ma u na ka por sha ka por. U hap ban pynbiang ia ki kot ki sla ba pynrung kyrteng ia ka marriage registration katkum ka Register ha ka ophis u Registrar.



**Non-Registration not to invalidate marriage  
(Ka jingbym pat register kam mut ka jingbym  
ithuh ia ka shongkha shongman).**

12. Kino kino ki jingialong shitnga bym pat register kim don shuh ia ka hok ha shuwa ba kane ka aiñ kan treikam. Ym lah ban khein be-aiñ ne kylla mulot ka shongkha shongman bym shym register ha kane ka aiñ, namar kane ka aiñ kam pat don mynshuwa.

**Penalty for failing to register to register  
a Marriage (Ka jingpynshitom lada khlem  
pynithuh ia ka shongkha shongman lyngba ka  
aiñ Register of Marriage).**

13. Lada uno uno u Registrar, u bym register ia ki jingiaithoh shongkurim katkum ka kyndon 5 ne section 6 un shah pynsaja kaba jlan haduh lai bnai ne shah daiñ kuna kaba haduh san spah ne baroh ar ki jait jingshah pynshitom.

**Penalty for neglecting to comply with  
the provision of Section 4:5 and 6 or for  
making false statement in Memorandum (Ka  
jingpynshitom lada leh bym khein leh bym  
salia ia ka kyndon 4, 5 bad 6. Ne ai ki jingtip  
thok ia ka jubab jingthoh pynkynmaw)**

14. Uno uno u briew uba-

- (a) Leh khnang kum kumba leh klet ne lah bym suidñiew ban register ia ka jingshongkurim” kaba don ha ka kyndon 3 jong ka Act, ne
- (b) Leh khnang, bym suidñiew ban phah jingtip sha ka Sorkar katkum ka kyndon 5 ne 6; .

- (c) Ka jingai jingtip shet shukor ki bym iahap satia, kiba u da tip khnang ba ki long ki bym larkam.

Kumta haba la dep bishar yn pynshitom ia u da kaba set hapoh along haduh hynriew bnai ne shah daiñ kuna kaba shong dor haduh shi hajar tyngka, ne baroh lang ki jingshah pynshitom.

**Penalty for secreting destroying or altering Register (Ka jingpynshitom ia ka jingbuhrieh pynduh kyndam ne pynkylla khongpong ha ka jingthoh Register).**

15. Uno uno u briew uba pynduh pynjot ne leh arsap, ne leh bym hok pynkylla ia ka register ki lah ban shah pynshitom da kaba shah set haduh hynriew bnai bad shah daiñ kuna.

**Offences under this Act Summarily triable by a Magistrate (Ka jingleh palat katkum ka Act, kin shah bishar ha u Nongbishar).**

16. Ka jingleh palat katkum ka Act kin shah tian bishar ha u Judicial Magistrate First Class. Kane kan long katkum ka aiñ Code of Criminal procedure 1973.

**Cognizance of Offence under the Act (Ka jingpyntip katkum ka Act)**

17. Ka iing Kashari kan ym tian bishar katkum ka Act, lynda la ujur da ka jingthoh sha u Registrar jong ka thaiñ ne da uno uno u ophisar ba la aibor Registrar - General of Marriage kaba u sngewbit.

## **Registrar to be public servant (U Registrar u dei ban long u shakri paidbah)**

18. Uno uno u Registrar u dei ban long u shakri paidbah ba la batai katkum ka kyndon 21 jong ka Indian Penal Code 186 G (No. XIV. of 1860).

## **Protection for action taken in good faith (Ka jingäada da ka mynsiem ba shisha)**

19. Ym lah ban mudui, pynshitom ne ai mukotduma pyrshah ia ka sorkar jylla, ia u Registrar General of Marriage ne ia u Registrar ne ia uno uno u briew uba trei da ka kam katkum ka Act. Namar ki iatrei ia ka kam da ka mynsiem kaba khuid bad suba ka jingmut ha kaba pyntreikam ia ka Act katkum ki kyndon ba la buh.

## **Power to make rules (Ka bor ban shna ia ki kyndon hukum)**

20.(1) Ka Sorkar jylla da ka jingpynbna ha ka Meghalaya Gazette, kan shna ia ki kyndon aiñ na ka bynta ban pyntreikam ia ka Act.

(2) Da kaba leh kyrpang khlem leh shiliang khmat iano iano kan shna ia ki kyndon aiñ baroh kumne harum:-

(a) Ka kamram bad ka bor treikam bad ka bor treikam u Registrar General of Marriage and the Registrars.

(b) Ki forms bad ka rukom aiñ jong ka Memorandum ki dei lang katkum ka kyndon 5 bad 6 ha kaba dei ban pyndap bad pynbiang bha ia ki jingthoh.

- (c) Ki registrar bad records dei ban buh bha hapoh ka jingkhmih ba phikir ïa kitei ki registers bad records.
- (d) Ka bai siew dor ka dei ban long katkum ka Act.
- (3) Baroh ki rul ne hukum ha kane ka kyndon kloi katba lah yn sa tyrwa ha ka ïing dorbar thaw aiñ jong ka Meghalaya.

**Application of other laws not burried (Ki jingkyrpad ba ïadei bad kiwei pat ki aiñ ym shym khang).**

Da kaba pyllait noh ne da kumwei pat ki kyndon ha ka Act, ka long ka jingpynlang bad ym dei ka jingthmu ba pyntlot ïa kiwei pat ki aiñ kiba don mynta.



# KI KUR KI JAIT U KHUN KHASI

*Rupang, 15 tarik İaïong (April), 2016*

Ki khun ki ksiew u Hynñiewtrep Hynñiew Skum ki long kiba riewspah ha ka liang ki kur ki jait. Kine ki jait ki khong ki wan da ka daw bad la pynskhem İa ki da ka niam tynrai u Hynñiewtrep. Ngi ngeit ba ki kur ki jait ki mih na ka İawbei tynrai kaba long ka kmie nyngkong jong kawei pa kawei ka kur ha ka jaitbynriew Hynñiewtrep. U shongkha ba nyngkong eh jong ka kur la khot kyrteng u Thawlang bad İa u long kñi nyngkong la ong u Suitnia.

Ngi burom İa ka longkur ka longkha, bad la bynshet İa ka kamram ka longkmie, u longkñi bad u longkpa ha ka rukom longİing longsem jong ngi pateng la pateng. Ki kynthei Hynñiewtrep ki ri İa ka jait ka khong ka kmie bad kñi tymmen naduh nyngkong ka sngi. Ki dei ki longkmie ha ki khun ki kti bad ki longkha ha ki khun ki para shynrang ne hynmen shynrang jong ki. U Rangbah Hynñiewtrep u long u longkñi ha ki pyrsa para ha İingkur ha kaba ka spah ka phew bad ka synshar İing ka synshar kur ka don hangta.

Ki kur ki jait u Hynñiewtrep ki İai heh kur lyngba ki kynthei na ki jait, ki kpoh bad ki İing. Bunsien ngi lap ba ka kur kaba heh jait ka don bun tylli ki shnat kur ha ki jait ba İapher. Kane ka long na ka daw ka jingkyndriah shnong ne İing bad la tip noh İa ki da kawei pat ka kyrteng jait. Hynrei katba dang tip İa ka snam kur, kata ba İamih na kajuh ka İawbei tynrai, ka mynsiem ieit kur ka synshar ha ki. Shikur ki long shidoh shisnam bad ka 'lei longkur long jait ka kdup İa ki.

Kum ka nuksa ki jait Khar Sawkpoh kum ki Kharngapkynta, Kharphanbuh, Kharsawian, Kharwanlang, Puindiawang (Hima Nongspung) bad ki jait Dkhar ha ka Ilaka Daloi Nartiang ki iadei shikur. Nangta de ki jait Majaw, Basaïawmoit, Lyngdoh Peinlang, Lyngwi, Khongji, Hynñiewta, Sangkli, Langi, Muktieh, Be, Kurbah bad Rapsang Marbisu ki iadei shikur. Shuh shuh, ki jait syiem Sutnga ki iadei kur bad ki jait Kurkalang, Muliar, Mynso Shangpung, Nongspung, Nongsteng, Pakem, Pajuh, Pyrtuh Shangpung, Sutnga, Syiemiong Nongspung, Syiemlieh - Nongkhlaw, Syiemlieh Nongspung, Syiem Nongshai, Syiemsat, Syiem Umsaw Nongbri.

Ka jait ka khong u Khasi ka long ka bynta kaba kongsan tam ha ka jingim jong ngi. Lyngba ka jait ka khong, ngi pynithuh ia lade ha ka kur. Dei na ka kur, ba ngi wan mih long bynriew lyngba ka iawbei bad u Thalang pateng la pateng. Lyngba ka jait ka khong, ka iai lum bad ka teh ia ka snam kur. Shisien ba ka kynthei Khasi ka ioh khyllah jait bad la ai jait sha u tnga ka duh noh ka jinglong jaidbynriew. U shynrang Khasi pat lada u poi kha bad ki kynthei dkhar, um ju ring jait sha lade. Kaei kaba ki ju leh ka long ba u kyntang jait thymmai ban pynroi pyniar ia la ka jaidbynriew.

Ngì lap ba bun ki jait ki khong kiba iadei kur sa bad kiwei pat ki jait. Bad don ruh ki jait kiba long kur beit tang marwei khlem don jingïadei ei ei bad kiwei pat ki jait, namar na ka jingsngew jan hyndai ba ki la dep *ïashoh doh kur noh* bad haba long kumta kim lah shuh ban *ïashongkha shongman* hapdeng kata ka jait bad kata kata ka jait kaba la dep iateh kur mynnor.

Nangta na kawei ka por sha kawei pat katba ka kur ka nang bun paid, ki ju pynlong ia ka Dorbar

kur. Ki ju thung kyrpang ĩa u Rangbah kur uba dei u kynja Longkñi ban sneng ban kraw ĩa ki para pyrsa, u ban beh u ban rap ha ka shitom ka shipa. U Rangbah kur u korbar ĩa la ka kur. Nangta don sa u Rangbah ĩing u ban khmih kyrpang ĩa kiba dang ĩadei na kajuh ka kpoh ne ka ĩing hapoh ka kur. Ha kane ka rukom ba u Khasi u phah ĩa ki Rangbah kur ha kaba mih khmat sha ki Dorbar Hima kum ki jait Marweiñ ha ka Hima Nongstoiñ, ki jait Kharshiĩing ha ka Hima Mawphlang, ki jait Nongrum ha ka Hima Sohra bad ki jait Marbañiang sha ka Hima Shyllong bad mynta pat sha ka Hima Mylliem.

Ngi ĩohi shynna ba na ka jait ka ĩalam sha ka jinglong trai hima, ka jinglong trai raid, ka jinglong trai shnong bad ka jinglong trai ĩing. Kane pat ka ĩalam sha ka jingĩaĩoh bynta ha ka spah ka phew ĩa ka nongmei nongpa bad ka nongtymmen jong ka ĩing ne ka kur jongno jongno. U Khasi hyndai um ju pyrkhat eh ĩa ka shimet hynrei u pyrkhat ieit ruh ĩa ka jingĩabit lang ki hynmen ki para kynthei shynrang kiba long kiba ha ĩing ha sem jong u. Shisien kha bloit ĩa u sha pyrthei u la dei u Socialist na ka bynta ka ĩing ka kur ha ka imlang ka sahlang ha ka shnong ka thaw.

Ma ngi ki khun ki ksiew u Hynñiewtrep Hynñiew skum, ngi dei ki paid u Khyndai Bah Ryntieh ba ai jait sha ka liang kmie ym dei sha ka kynthei. Namar lada ngi ai jait shisha sha ka kynthei, ngi hap ai jait noh sha ka tnga ngi tang shu shongkha shongman. Ñiuma, ka kynthei dkhar ne ka kynthei mem te shisha ka ai jait sha u shynrang. Nyngkong ka ai jait sha u Kpa, hadien pat ka sa ai jait sha u tnga. Lada jia ba ĩap noh u tnga ne ka ĩapyllait tnga noh bad hadien ka sa ĩoh briew noh da uwei pat, ngi lap ba ka jait ka khong jong ka ruh ka kylla katkum ki por.

---

Ngi shem ba kane ka jingai jait jong ngi sha ka liang kmie ka long kaba kyrpang bad kaba da pher shisha na kiwei pat. Ka long kum ki **Rules of the Road** ha ki surok bah ñaid kali jong ka pyrthei. Baroh ki ri ki ñaid lynti sha ka liang ka diang hynrei u American te u ñaid sha kamon. Lada ka pyrthei ka thaw ña ki kali **Right hand drive** hynrei u American te u thaw ña ki kali - **Left hand drive**. Ngim lah ban-beiñ ña u American ba um ñabud ña ka pyrthei ba kin dei kiba tlot ne kiba shiteng jabieng. Ngi lap pynban ba dei u American uba poi nyngkong sha u bnai ha ka **20 tarik u July 1969** kaba la pynlyngngoh ña ka pyrthei baroh kawei.

Kumta kane ka jingshim jait u Khasi ka don la ka jong ka dor. Lyngba jong ka kheĩn kur kheĩn kha,ngi tip kiei ki kur, kino pat ki kha ki man bad nangta ngi sa nang kumno ban ñakam bahaĩng. Ngi tip ban burom ña i Meikha, i Ñiakha, i Pasan, i Pakhynnah. Nangta pat ino i Mama, i Meina, i Meisan bad kumta ter ter. La ker ña ka lyngwiar dpei u Khasi da ka jingĩatip ban ñakam bahaĩng. Mynta pat to ngin ña puson pat, kaei ka kamram jong ka Longkmie ka Longkha bad u Longkñi u Longkpa.

Ka kynthei Khasi ka dei ka Longkmie ña la ki khun bad ka shimti ña ka Longkha ha ki khun ki kti jong ki hynmen bad ki para shynrang jong ka. Ki, ki long ki Khunkha ha ki kur ki jait jong u Kpa. Ha u Khasi ban thut ka longkmie dang lah ban pynbeit hynrei ban thut ki Longkha ne nongkha ka long kaba hab duriap bunsien. Ka Meikha ka Ñiakha ka juh ieit katta katta ña la ki khunkha. Kumjuh ruh u shynrang Khasi u long u Longkpa ha ñingkhun bad u longkñi ha ñingkur. Ka kam kum u longkpa ka long ba un pynroi un pynheh pynsan un bsa un btiah ña la ki khun ki



kti. Sha iingkur u long u trai iing uba hap ban korbar ban sneng ban pyniaid ha kaba ka kamai iingkur kan roi kan khie ha ka spah bad baroh ki jingdon jong ka. Kumta shi kumta hap ban iai bud ia kane ka jing kitkhlieh ha iingkur da ki pyrsa shynrang ynda la khyllait ki kni ka iing.

Lada don shisha ki jingiaid lait na kitei ki jingseng, jingsneng bad ki Aiñ u Barim, te ngi la hap ban ksan rngiew biang ban ieng ka daw ha kaba pynbeit pat ia ka iing kaba jot. Toi katkum na ki dak ki shin, ngi shem ba ka jaitbynriew Khasi ka long kaba dap pura ha ka bor met bor phad bad ha ka bor pyrkhat. Don bun ki jaitbynriew ha sla ka pyrthei kiba la don teng bad synshar ia ka pyrthei hynrei mynta ki la duh jait noh. Ia ka khana pateng shaphang jong ki la shu sah sa tang ha ki History. Kawei na ki jaitbynriew ba la duh jait ka long ki Syiem Egypt kaba ka jingkhraw ka nam, ka synshar khadar bad ka spah ka phew la sakhi da ki mot Pyramid mynta. Kitei ki jait Syiem Egypt ki bynnud ia la ki jingdon jingem bad ka lak ka putit jong ki ba kan phet shawei lyngba ka shongkha shongman. Te kumta ki iashong kha shongman jan haduh katta katta wat haba dang dei shi kynja bahaing ruh. Kumta kane ka jait Syiem Egypt ka la jah noh, ka la iap duh namar ka pynkheĩn ia ka aiñ shongkha shongman kata shu najuh hajuh.

Ngi ki Khasi te shuwa ban iashongkha, ngi da iakheĩn iadiah thik pa thik. Shikur ngim bit, shipara kha ngim bit wat tang ban pyrkhat ruh. Kumta ngi iohi ba ka snam Khasi ka long kaba khuid ba sa mih ki khraw pyrkhat ki proh jabieng ha ka jaitbynriew jong ngi. Ym ju shem koit ia ki anna antu, kiba dkoh ha ka met ka phad jong ngi.

Ka la don ka jingjia ba kham phylla shisien ha kawei ka por ha kawei ka dewlynnong kaba don ha ka duriaw Atlantic ba shathie. La iathuh, ba ka la don ka jingkhynñih jumai ha ka dewlynnong *Tristan Da Cunha* kaba don hapdeng ka Capetown jong ka South Africa bad ka Buenos Aires jong ka Argentina ha ka snem 1960. La leit shaw ia ki paidbah kiba la hap khop ha ka jynjar da ki shipai America bad la pynsah noh ia ki ha U.S.A. Hynrei ia ka jingjia ba sngewsangsot ka long ba baroh kito kiba lait im ki don ka jingpang matlah kaba ki byrie ban peit. Hadien ba la wad, ki shem ba ka snam ba iapoikha hapdeng jong ki ka long kaba jngut bha ki ruh ki ia shongkha shi kur na juh ha juh kum ki Syiem Egypt.

Mynta ha katei ka dewlynnong ki don ka jingbun briew sa tang arspah phra phew ngut bad kita ruh ki long kiba hiar pateng ym dei shuh na katei ka jait bynriew trai ri hynrei ki dei na ki khun shipai Bilat. Kane ka dewlynnong ka long kaba kynjah tam kaba long tang marwei. Ka jingheh jong ka ka long 104 Sq.kms. Ka ioh ia ka kyrteng jong ka na uwei u Rangbah shipai duriaw jong ka ri Portugal uba kyrteng u Tristan Da Cunha uba la shem ia ka ha ka snem 1506 A.D.

Ha kine ki por mynta, ngi shem ba bun ki briew ki la ia ai jait ai khong kulmar haduh bym ithuh ithaw shuh ha kane ka ri. Imat ia ka kyrteng Kur kim kheiñ snep shuh ban pynlong 'business' ban heh ka iew ka hat. Ha kiba bun ki khep ngi iohi ba ki khynnah dkhar haba u kpa bad ka kmie jong ki ki dei ki dkhar paka, hynrei ki ialeh iap ialeh im ban ioh ia ka *Khasi Scheduled Tribe Certificate* na ka bynta ki "Quota Meghalaya" ha ki kyrdan pule ne

business jong ki. U Babu Soso Tham u pynkynmaw  
ia ka jaitbynriew



*"Kine ki Kur, ki Kha, ki man,  
Ki tip ka dur kumno kan wan;  
Ki don ka sang ki tip ka Ma,  
Ioh pom pyrthat, ioh dait u khla,  
U bym khein sang, u nongaiksuid,  
Ki beh na shnong ki khi lai nuid".*



# KA MEGHALAYA KA THMU PYNDUHBOR ĪA KI DISTRICT COUNCIL

*Rupang, 8 tarik Jymmang (May), 2016*

Ka jingkwah jong ka Sorkar Meghalaya ban pynlong Īa ka Meghalaya Community Participation Bill 2010, ki dei ki jingthmu barieh ban knieh Īa ka bor treikam ki sorkar District Council ha ki jaka ba don ki Municipal. Ha ka jingiohi ka Sorkar Meghalaya ba mynta ka lap imat ba u paidbah jong ka Meghalaya um ju ĩashim bynta ha ki election paidbah man ki san snem. Kumta la kyrpad Īa ka, "Community Participation Bill 2010", ba u paidbah un ĩaiuh baroh baroh ban jied nongmihkhmat sha ki dorbar Municipal ne aũ re. Lada u paidbah un ĩaknieh long Nongmihkhmat sha ki Dorbar dong, dorbar shnong, dorbar Municipal election da ka *secret ballot* bad *direct election* phi tip aũ kan jia? Ka jingjia kan sa jia bad ka ĩapeit matdong kan sdang na u khiew ja bad kan kut ha ka jot ka pei bad ka pait ka pra. Ngĩ iohi ba ka pait ka Jaidbynriew man ka *election Act bad Municipal election* te san sien ha ka san snem yn long election bad nang pynpait ĩa ka jaidbynriew barit paid jong ngĩ da ka *election paidbah*.

Shisien ba ki nongĩaleh election ki leit pah, kular bad phawar development, u paidbah u la lamwir bad um tip briew shuh. Ka jingĩaleh election mynta ka long ka kam ĩakhalai bad ka kam khaĩ ba khraw tam. U Candidate uba jop te u la khur bad uba rem te la man mrad bad kylla duk tasam. Hynrei kane kam ju long kumta ha ki por barim.

Ha ki por ĩaleh laitluid ka ri India, kiba bun ki paidbah ka India kim tip kaei kata ka synshar

paidbah ne Democracy. U President ka Indian National Congress u Subhas Chandra Bose, ki ong u la pynbna sha ki paidbah ha ka Poona (Pune) session jong ka India National Congress snem 1938, ba to leit sha Khasi Hills ha Assam ha kato ka por ba phin tip kaei ka *Democracy*? ia u Syiem bad Myntri la jied da ki kur bad mynjur da ka Dorbar Hima. Ia u Tymmen Shnong ne Rangbah shnong la jied da ka Dorbar Shnong shi tylli. Niar ban lap kan don ka jingialeh ne jingknieh long Rangbah Shnong. Ha kane ka *democracy* jong ngi dei tang u trai shnong ba lah ban long Rangbah Shnong. Dei tang u trai Raid ne Ilaka ba lah ban long Syiem Raid ne Doloi, bad dei tang u trai hima ba bit ban long Syiem ne nongsynshar. La pynskhem ia kane da ka Sixth Schedule.

Ha ka *Democracy* jong ngi, u bar Hima u Bar Jylla bad u raïot um lah ban long nongmihkhmat ha ka ri jong ngi. Ka jingthmu ban pynlong election Municipal ne Community Participation Act 2010, kan plie ia ka jingkhong ba ki nongwan buhai shnong bar jylla kin bat ia u lakam long nongsynshar. Ka *Govt. Notification* ba la pynmih ha ka snem 1973, ka kren shai ba ki jaka kiba hap ha ka Shillong Municipality kin long shabar na ka Khasi Hills, kaba mut ba kim hap shuh ha ka Khasi Hills District Council. Kane ka mut ba Ki dkhar kim donkam shuh ia ka NOC bad ka Trading License na ka KHADC haba ki wan trei kam khaïi.

Lada khmih ia ka aiñ kam lah ban long, ba kumno yn don ki Ward Commissioners bad ki MDC ha kajuh ka por bad ha kajuh ka jaka. Kan long ka jingpynkheïñ ia ka aiñ ne ka *Constitution anomaly*. Ha ki District Council ki don ki *Town Committies* kum ha Nongstoiñ, Sohïong, Mawkyrwat. Ka JNNURM ka dei ban iarap tyngka ia ki ruh de, bad balei ka thmu ban iarap tang ia ki jaka Municipal.


Ka Sorkar Meghalaya mynta ka thmu pynlong election ha Garo Hills kum ha Tura, Williamnagar, Resubelpara bad Baghmara. Ym slem ka lah ruh ban pynlong ha Shillong bad Jowai. Lada kan long kumta te, ki MDC ha Shillong kum ha Jaiaw, Mawkhaw, Laban, Mawprem, Malki, Laitumkhrah bad ha Jowai, kum ha Jowai North bad Jowai South hi lah ban duh noh ia ki shuki MDC jong ki. Ngi sngewphylla ba ka sorkar District Council ne MDC ki shu sngap bad kim uxor pyrshah sha u Governor ia kane ka jingthmu knieh bor synshar ka sorkar Meghalaya na ki District Council.

Ka jingthmu ba kwah ban pynlong *election Municipal* ha Meghalaya ka long ban ioh tyngka development na ka Jawaharlal Nehru National Urban Renewal Mission ne (JNNURM). Ki Sorbah ka ri India ki ioh iarap tyngka na ki JNNURM bad kumjuh ki sor kiba rit. Ka shnong kaba bun briew tam ha India pat kat kum ka Census 2001 ka dei ka Mumbai bad ka don haduh 164.34 lakh ne 16 million tam u paidbynriew. Ka Shillong ka don tang 2.68 lakh u paid nongshong shnong. Katkum ki kyndon treikam ka sorkar India, kano kano ka shnong ka bym don 3 lak u nongshong shnong kam lah ban don ki Municipal Board. Lehse tang ki Town Committees la biang, kaba hap hapoh ka District Council kaba mut hapoh ka Dorbar Shnong.

U Rangbah Morningstar Jait Sumer ha ka jingthoh shaphang ka "Municipal ne Meghalaya" ba la shon ha u Mawphor 26 tarik u October 2010, utei u rangbah haneng u la thoh ba, "Katkum ka jingsngewthuh jong ngi naduh ka shi tarik u June 1994, ym dei ban don Municipal Ophis shuh ha Meghalaya, namar la don ki Article 243 ZF, kaba la khang pyrshah ia ka jingdon ki Municipal Board ha kane ka jylla hadien shi snem haduh ba la pynjari ia ka PART, IXA jong ka

Constitution. Kumta namar ba la pynjari ïa kane ka PART,IXA naduh ka shi tarik u June 1993 (vide S.O. 3346 (E) dated shi tarik u June 1993). Ka jingdon ki Municipal Board ka long be-aiñ noh. Kumta ka jingkylli ka mih kaei ka seng ne kynhun trei kam ka ban shimti naduh ka shi tarik u June 1994 ïa ka kam ba la bynshet ha ka Municipal Board.

Mynta ka Sorkar Meghalaya ka khiih khohreh kwah pynlong election Municipal ban loh tynka JNNURM Scheme? Kane kam dei ka MP Area development Scheme, MLA Area development Scheme, MDC Scheme kiba lah ban neh junom. Kane ka JNNURM kan neh tang hynñiew snem ei ei naduh kaba sdang ka snem 2005-06 lada ym pynbeit thymmai da kumwei pat.



# JI-HAJUR JO-HUKUM

*Rupang, 18 tarik Jymmang (May), 2016*

Katei ka kyntien haneng ka dei ka ktien Hindi kaba mut Oi-bah Oi-kong Oi-Mei Oi-Pa ngan leh beit kumba phi ong phi bthah bad hukum ia nga. Une u nongthoh u la iohi shiwat ia ka Film Phareng kaba ong - **"Yes Prime Minister Sir"**, kaba kdew ba u nongshakri paidbah u kylla long pynban u Kynrad ha ki paidbah nongjied Election ia u, kum u kynrad ne u kynja blei khyndew 5 snem ha ri Bilat. Tang shu ong ma u shi kyntien, kiei kiei ki shu long lut katba u dang don ha ka iktiar synshar, kam pher la u hukum ia kaba dei ne kaba lait hap ban shu kohnguh beit - Yes Sir, Ji-hajur Jo-hukum.

Ha ka jylli synshar paidbah ha Ri India, ka Sorkar kmie ha New Delhi ka don u khlieh nongsynshar uba ki khot u Prime Minister ne u Pradhan Mantri jong ka Ri. Ha ka liang synshar khaddar ha India u Prime Minister u kham donbor wat ia u President ka India uba long u khlieh duh jong ka ri. Kumta ki paidbah ki kham tur sha iing u Prime Minister la ka dei ha iing ne Ophis. Tang shu ong ei ei u Prime Minister, U President la shu hap kohnguh beit namar ym don lad da kumwei pat.

Kumjuh kane ka kyntien Prime Minister Sir, ne Yes Sir, ka long kaba ki ju pyndonkam bha da ki shakri sorkar, kam pher la ka dei ha Ri Bilat ne England ne ha India bad ha ki jylla ka ri India ki *ñiewblei* ia u Chief Minister. Te ka ju don ka jingiaknieh ban ioh long Prime Minister ne Chief Minister ha kylleng ka Ri bad jylla ka Ri India. Shisien ba la ioh shong shuki Prime Minister ne Chief Minister la i phuhmut



phuhmat. U paidbah u leit iatur rop rop sha ki, na ka bynta ka jingmyntoi la ka thaiñ ne wat ka jingmyntoi shimet.

Ngi kynmaw ha ka por u Prime Minister Jawaharlal Nehru 1950-62, u la long uwei na ki nongsynshar lahduh ha Ri India. Ka ktien bad ka hukum jong u ka long ka aiñ ba ym bit pynlah, shu ong beit Yes, Prime Minister Sir. Kumta haba la wan hiar thma u China ia ka Ri ha u October 1962, u Prime Minister Nehru, tip na kano ma ka daw um shym la ai hukum ia ki shipai suiñ ka India ne ka Indian Air Force ban bomb ia ki shipai China. Kumta ka Ri India ka la rem kput bad iap da ki hajar pa hajar ngut ki shipai jong ngi ha ka thaiñ Bomdila (Arunachal Pradesh). U Nehru u la khublei khadduh ia ka Assam da kaba ong "Farewell, my heart goes to Assam". U khublei leit suk bad nga pait dohnud ia ki briew ba shatei lam mihngi ka India. Hangta ruh ki shipai India bad ki paidbah India ki ong Ji-hajur Jo-hukum da kaba pyndem tdong ha khmat ki China.

U Prime Minister ba ar ka Ri India u dei u Lal Bahadur Shastri naduh 1962 haduh 1966. U long u Prime Minister uba shlur. U la ieng pyrshah ia u Ayub Khan, u Military Dictator bad President ka Pakistan. Haba ki shipai Pakistan ki wan hiar thma ia ka Kashmir, u Lal Bahadur Shastri u hukum ia ki shipai ban tur beit sha Lahore ha West Pakistan. Ki Pakistan ki ong - Wow rap, sngewbha iarap - map ia ngi. Kumta katba ong u Prime Minister ka India u Lal Bahadur Shastri, ka Pakistan ka pyndem wait noh ha khmat ka India kaba mut, **Ji-hajur Jo-hukum.**

Ka Prime Minister Indira Gandhi ka la pynbna ia ka Emergency ha ka snem 1975 ha ka ri India baroh kawei. Kane ka hukum ka long ka jingpynkheĩ ia

ka riti synshar paidbah. Hynrei ym don ba lait ang. Kat ia uba ang ka shyntur la shu kem bad thep sha phatok ne jail. Ka long ka aiñ leh bor hynrei kumba ong noh ba Ji-hajur Jo-hukum ka la ieng shipor, tad haduh ba ki paidbah ki ieng pyrshah bad pynrem ia ka ha ka Election M.P. 1977.

Haba phai pat ia ki jingsynshar ki Chief Minister Meghalaya naduh ka por Autonomous State 1970-72 haduh ka jylla pura mynta, ngi shem ba ki Chief Minister ki don la ki History (khana) ha ka jingsynshar donbor jong ki pyrshah ia ki paidbah, kiba jied pynlong nongmihkhmat ia ki MLA bad Chief Minister ha Meghalaya.

U Chief Minister Williamson Ampang Sangma u dei uba wanrah pynbuhai shnong ia ki Khar Garo sha Ri Khasi, hynrei ki Rangbah Khasi ha ka Meghalaya Cabinet ki mane blei ia u. Kumta Ji-hajur Jo-hukum, ki Minister Khasi kim nud leh pyrshah ia u Chief Minister W.A. Sangma ba tieng ioh duh long Minister. U Sangma u la wanrah ia ki Garo na Garo Hills bad Assam bad pynsah beit ia ki ha Ri Khasi naduh 1972 haduh ban da pynshong thait ia u da u Purno Sangma kum u Chief Minister.

Kum ban bteng biang, u Captian Sangma u la thaw ia ka Garo Model Village ha Ri Bhoi ha ka shnong Killing, hajan Khanapara da ka tyngka Sorkar Meghalaya. Ki paid Garo ki la seng ia ka Greater Garo Land Territory ha Ri Khasi. Ki nongthep Vote Garo ha Ranikor Constituency ki don mynta haduh 10603 ngut, ha Rambrai - Jyrngam Constituency ki nongthep vote Garo ki don haduh 8547 ngut. Ha Mawshynrut Constituency ki nongthep vote Garo ki don haduh 5596 ngut, ha Mawsynram Constituency ki nongthep vote Garo ki don haduh 6500 ngut. Ha

Jirang Constituency ki nongthep vote Garo bad dkhar ki don jyn haduh 14517 ngut katba ki Khasi pat ki don duna ia ki, kata ka long tang 13317 ngut.

U Captain Sangma u la thaw ia ka 40 percent ia ki Garo bad 40 percent ia ki Khasi Jaiñtia ha ka jingthep kam Sorkar ha Meghalaya, wat la ki Khasi ki kham bun paid. Hynrei ha ka liang ka thung kam ha Meghalaya, ki Minister Khasi ki sngap la ka sngap kim nud saham ia u Chief Minister W.A. Sangma.

Kiwei ki Chief Minister kiba hadien u W.A. Sangma ki long kumjuh bad leh donbor halor u paidbah uba shu sngap la ka sngap. U Rangbah Brington Huhai Lyngdoh u la pynrung ia ka Meghalaya Land Transfer Amendment (Regulation) Bill, 1990. Kane ka aiñ ka pynkylla baji ia ka jingthmu ka Meghalaya Land Tranfer Act 1971 bad ki Amendment ba hadien kum ha ka snem 1976 bad 1977. Katei ka Amendment Khyndew 1990 u Rangbah B.B. Lyngdoh ka la long aiñ ha ka snem 1991. Une u Rangbah u la sngewhun jrut ban pynlong kam ia ka Land Reform Commission 1974. Kane ka aiñ khyndew 1991 ka la pynduh lut ia ka jingpyrkhing die khyndew. La shah ia ki bar jylla la u dei u nong India ne bym dei nong India ban thied khyndew katba mon ha Meghalaya. Ia u dkhar la pyrkhing ban die khyndew shimet hynrei lada u thied ha ka kyrteng jong ka Company, Karkhana, Skul, bad ka Niam ym don jingkhong shuh. Kane ka dei kata ka Land Reforms kaba ka Sorkar Meghalaya ka pyrkhat sngewlem hun mynsiem na ka bynta ki bar jylla, ki paidbah ne Sengbhalang ha ki snem 1990 bad 1991. Ki paidbah ha kito ki por ki shu sngap beit bad kohnguh ia ka jingleh u Rangbah B.B. Lyngdoh da kaba ong ha mynsiem **Ji-hajur Jo-hukum Chief Minister Sir**, ia u.

U Chief Minister Salseng Sangma ka Meghalaya u la pynrung ia ka **Single Window Agency ha ka snem 1995** ha kaba wat ki MLA ne ki MDC ka Constituency kim donbor bad ong ei ei ne mynjur ia kano kano ka Karkhana ban tei ha ka thain ne Constituency jong ki. Ha ka snem 1997 u Salseng Sangma u la pynmih ia ka **Meghalaya Industrial Policy** ha kaba ka Meghalaya ka la theh lut ia ki jingkyrkhu ia ki Company haba ki wan seng Karkhana ha Meghalaya. La ai lut ia ki jingiarap ki Transport Subsidy, Tax holidays bad ki Tax liberation rukom pa rukom ia ki mynder ri.


**Ka Lafarge International Cement Company** ka la ioh jaka ha Nongtraï, ha kaba ka Company ka la ioh ban bynda ia ka khyndew ki War traï jaka sha ki Bank ai ram tyngka na bar Ri naduh ka por ba long Chief Minister u Dr. Flinder Anderson Khonglam. La iathuh ba u Chief Minister D.D. Lapang u la ai wai (lease) ia ka Office jong ka Shillong Municipal Board ha Jail Road ban seng Khaïi uwei u Kharkaia heh tyngka uba na Police Bazar. Jan baroh ki **Private Universities** bad ka **Regional Institute of Science and Technology** jong ki Khar Muslim na Assam la ai jingbit ha ka por utei u juh u Chief Minister. Nangta u Dr. Donkumar Roy u Chief Minister ka Meghalaya u la leit khap Ribbon ia katei ka Regional Institute and Technology ba long traï ki heh Muslim kaba ki la thied jaka kaba heh ha Baridua, Killing Road hajan Khanapara.

Ngi shem baroh ki Chief Ministers ka Meghalaya ki long kiba ieit ia ki bar jylla ban wan seng Khaïi na ka bynta ka jingmyntoi jong ki. Sa kawei de ki Chief Executive Member jong ka District Council jong ngi, ki sngew muja ban ai Trading License ia ki dkhar, wat la

kita ki business (kam khaii pateng) ki pyniap ia ki trai jylla bad ki khun samla seng kam la jong.

Kyntang iawai, ka sorkar u Mukul Sangma ba la synrop lang da ka Seng UDP bad HSPDP ki la **die duh ia ka jaka sorkar haduh 99 snem kaba don ka T.B. Hospital** mynta ha Upper Mawprem ban seng Skul Doctor bad Hospital. Da kane ka lad kin sa seng ia kata ka Private-Public-Partnership bad uwei u Khar Bengali na Kolkata. Ka jylla Meghalaya ka long kaba rit. Ha nga, nga sngew ba tang ka NEIGRHIMS bad ka Government College ha Tura ka la biang. Ha ka snem 1984, ka Meghalaya ka thmu ban tei ia ka State Homoeopathic College hynrei mynta kane ka scheme jong ka, ka la kylla jynhaw.

Ha Meghalaya bad katkum ka census 2011 don 2,964,007 ngut ki nongshong shnong. Hynrei katkum ka Website jong ka United Nations Educational Social & Cultural Organisation (UNESCO) ha u bnai April 7tarik 2012, ka la iathuh ba don tang **KHYNDALAK** ngut **u Paid Khasi ha Meghalaya**. U paid Khasi Baiar u long heh paid ha Shillong tang ha Mawkhar Pyllun, Mawlai, Jaiaw bad Malki. Ngi la duh ia ka Shillong ruh ngim sngew ei ei. Imat lada duh sa ia ka Bri u Hynñiewtrep ruh ym pyrwa. Haba kumne long hi ban shaniah ia ki Chief Minister die Ri bym don jingkitkhlieh na ka bynta ka lawei. Hato ngin shu hun beit ban ong Chief Minister Sir, Yes Boss, **Ji-hajur Jo-hukum**, ne kumno phin ia ong Para Ri?



# JINGMA KI AP SAWDONG KI KER İA NGI

*Mawphor, 16 tarik Jylliew (June), 2016*

**K**a Jylla Meghalaya ka long kaba rit kaba duk, kaba kheĩn sting bym salia ba aĩu kan jia ĩa ki longdien jong ka. La pynlong ĩa ka jylla Meghalaya da kaba pynkap lang ĩa ki artylli ki District haneng jong ka Assam kum ka Garo Hills bad ka United Khasi-Jaiĩtia. Mynta la tip ĩa ka kum ka Meghalaya naduh 1970. Ha ka Census of India jong ka snem 1911 kitei ki artylli ki District haneng ki don haduh 3,94,005 ngut ki nongshong shnong. Hadien ba ki phareng ki la phet noh na Ri India ha ka snem 1947, ka jingbun briew ha Meghalaya ha ka snem 1951 ka kiew sha ka 6,05,674 ngut. Ha ka snem 1971 ha ka por ba ĩoh ĩa ka jylla Meghalaya ka jingbun briew katkum ka census of India ka poi sha ka 10 lak 11 hajar bad 699 ngut. Mynta katkum ka census, 2011 ka Meghalaya ka la roi briew haduh 29 lak 64 hajar bad 7 ngut. Ka jingroi briew ha kine ki shispah snem naduh snem 1911 haduh snem 2011 ka la long haduh 25 lak 70 hajar bad ar ngut.

U Paid Khasi Baiar u don mynta tang KHYNDAL LAK ngut katkum UNESCO Website ha ka 7 tarik u April 2012. Mynta ngi la long nongwei ha la ka jylla Meghalaya, hynrei ngim pyrwa tangba ngi la ĩoh tyngka haba ĩoh die jaka da ki phew hajar akar sha ki Cement Company. Ki nongsynshar shnong, nongsynshar Raid, Elaka bad Hima haduh ki Sorkar District Council bad Sorkar jylla ki long kiba sted ha kaba ai No Objection Certificate da kaba die duh ĩa ka khyndew sorkar bad khyndew paidbah sha ki Company ha ka kyrteng ka roi ka par ne development.

U Riewkhrav ka Jaitbynriew u Babu Soso Tham u la sneng bad batai lypa naduh ka snem 1936 ia ka jingma kaba ap ia ka Ri. U la khlad noh tang ha ka snem 1940 ha ka por thma bah baar kaba sdang na Germany ha ka snem 1939. Khyndiat ki jingjia ba iasnoh bad kane ka thma. Ka Japan ka la tur thma ia ka America da kaba bomb ia ka Pearl Harbour ka Kad lieng American ha ka duriaw Pacific Ocean ha ka snem 1941. Ha ka juh ka snem ki Japan ki la knieh kynthet ia ka Singapore. Hadien kata pat ka la beh ia ki Phareng na Ri Burma. Ki la bom de sa ia Kolkata bad Madras ha ki snem 1942 bad 1943. Ka Nongbah Shillong ka la long ka Headquarters shipai ki Allies jong ka South East Asia Command naduh ka Wah Brahmaputra haduh ka Wah Mekong hapoh ka jinglong Commander In-chief u Lord Mountbatten uba la long u Governor General ka India haduh ka snem 1948.

Ki shipai Phareng, ki shipai Negro, ki shipai China ki la jei ha Shillong. La shem ba ki nong Mawsynram na Wahingdoh ki la ia phet shnong sha Mawsynram. Ki Nong Mawphlang na Umsohsun ki la iaphet shnong noh sha Mawphlang. Ki Nongwah Thapbru ki la leit phet noh sha Jowai. Uwei u rangbah nongialam na Qualapatty u la mih noh na Shillong ban leit noh sha America naduh u bnai April 1943. U la sah hangto haduh 2 snem shiteng. Ynda la wai ka thma bah ba ar u la wan phai biang sha la ka Ri bad poi tiap ha Shillong ha ka 3 tarik u November 1945. Ka jingiakhih laitluid ha India hapoh ka jingialam u Mahatma Gandhi bad u Mohammed Ali Jinnah ka la nang jur. Ki Hima Khasi 25 tylli ki la seng ia ka Federation of Khasi States ha ka 22 tarik u August 1946.

Katkum ka Cabinet Mission Plan (1946) la pynbeit ha kaba phiah ia ka Ri India da ka Niam. Kito kiba

ngeit ha ka niam Hindu bad bym dei Hindu hapoh ka jing'alam u Mahatma Gandhi kin ioh laitluid da ka Ri India. Kito kiba bud ia u Jinnah la ai noh da ka Pakistan da kaba phiah ia ka jylla Bengal bad Punjab. U Nathuram Godse u la bitar ia u Gandhi ba u mynjur ban phiah ia ka Ri India da ka Niam. Kumta u la siat iap ia u Gandhi ha ka 30 tarik u January 1948. Katkum ka rai ka Crown-in-Parliament la pass ia ka Indian Independence Act ha ka snem 1947.

La bthah ia ki hima Syiem kiba don kumba 500 tylli ba kin pyniasoh ia lade sha ka Ri India ne Pakistan ne im laitluid la ka jong. Ki hima Khasi State 25 tylli da ka jingbym banse ki la pyniasoh sha ka Ri India hapteng u December 1947 bad u March 1948. Ki sheptieng ban pyniasoh bad ka Pakistan ba ioh hap kylla niam Musulman lut ki Paid Hynñiewtrep. Haba ki Khasi ki la laitluid na ki Phareng ki la shah ngiat pynban sha Assam na ka kyrdan Khasi States ban hiar pynban sha ka kyrdan District hapoh ka Sixth Schedule. Katkum ba paw ha ka rai ka Khasi States Constitution Making Dorbar bad ka Annexed Agreement. ka thew ba ki angnud ia ka Article 370 jong ka Constitution ka Ri India ba la ioh ka Jylla Jammu & Kashmir mynta.

Katkum ka Section ba phra jong ka Indian Independence Act 1947 la ong ba dei ban don ka Constituent Assembly ban saiñ riti ia ka lawei ha Ri India. Ym don uwei u dkhot na ka Federation of Khasi States uba la ioh ban mihkhmat ha ka Constituent Assembly of India. Na ka bynta ka Hima Khasi la mihkhmat da u Mr. G.S. Guha u Lawyer Kharbengali na Tripura uba don iing ha Nongrim Hills, Shillong. Une u nongmihkhmat ba mihkhmat ia ki Khasi State, Manipur State bad Tripura State, um shym la iasaid





ne ang ka shyntur na ka bynta ka rai ka Khasi States Constitution Making Dorbar ha ka Dorbar jong Constituent Assembly of India. Ki dkhot ka Constituent Assembly na ka Assam Province ki don haduh 8 ngut kaba kynthup ia u Rev. J.J.M. Nichols-Roy. Hadien kata, la ngam jylop lut ki Khasi States hapoh ka Assam Province bad mynta ki don ha Meghalaya hapoh ka Khasi Hills Autonomous District Council.

Ka Sorkar Assam ha ka por ba long Chief Minister u Bishnuram Medhi ka la knieh ia ka Block -I & II na ka Jowai Sub-Division ha ka snem 1951 kaba heh haduh 1,543 sq.km. Hynrei ym shym la don jingiaxhih paidbah lait tang ka Note of dissent na u Ma Larsing Khyriem. U Khasi Minister jong ka Assam uba bat ia ka Jail Portfolio u sngap la ka sngap khlem ong ei ei. La pyniasoh ia ka Block - 1 & II sha ka Mikir Hills (Mynta Karbi Anglong) jong ka Assam. Ngi sngew phylla ruh de ba wat ki Waheh jong ka Jaiintia Dorbar ha ka snem 1951, kim shym la leh ei ei ha kaba dawa ia la ka jong ka hok. Ym shym la don Kiang Nangbah shuh ha Ri Pnar ha ka snem 1951.

Ki Khasi ki la shah lehbein ha ka por ka Assam wat ki Khar Bengali ki dawa ia ka Shillong ban don shabar na ka Jylla Ri Lum hapoh ka Union Territory lada jia ba la ioh Hills State. Ki la seng ia ka 'Shillong Citizens Committee' hapoh ka jingialam u Kiron Paul Chaudhury bad ki la ia leit Delhi ha u bnai January 1967 bad ai Memorandum sha ka Sorkar India. La soi ia katei ka Memorandum u Dhruba Nath Joshi, u Prof. B.B. Dutta bad u J.N. Bawri.

Hynrei tang shu la ioh Hill State Meghalaya ka sorkar Meghalaya, u Captain W.A. Sangma ka la ai licence plie karkhana nyngkong eh ia u J.N. Bawri uba pyrshah Hill State ha ka 12 Mile Byrnihat ia ka

Meghalaya Plywood Pvt. Don katto katne ngut ki Khasi kiba buh Share Holders ha katei ka Company kum u Rangbah Garland Royal Syiemlieh, Dr. H.W. Sten kiba la khlad noh. Dang sah mynta sa u Rangbah B. Nishan Wahlang uba ka Company kam ju ai jingtip shuh ia u. Toi haba ka Company ka la iap, dei ban pynphai noh ia ka khyndew sha ka Sorkar Meghalaya ha ka jingshisha.

Ki MLA Meghalaya ki leit sha ka Dorbar Thaw Aiñ ban thaw aiñ. La lynniar mynta ba ka khyndew jong ngi ka la nang kie berong sha ki bar jylla na ka daw ka jingplie lad ka Meghalaya Land Transfer Amendment (Regulation) Act - 1991. Hynrei mynta la thaw sa ia ka aiñ Meghalaya Land Transfer Amendment (Regulation) Act - 2012, kaba plie lad syndon ia ki Trai Khyndew Bar Jylla ha Meghalaya ba ki lah mynta ban ai sngewbha, ai pateng ym tang ia ki ba haïng hynrei ki lah ruh ban ai ia ki khun ting (adopted children) iano iano. Ngi lyngngoh ba ki MLA Khasi ha ka *Select Committee* jong ka Assembly ki luii ka jabieng bad king ka janor ha khmat u MLA ka *Greater Bengal* ha Mawprem.

Kynmaw lem ko Para voters ba ha ki Election wat jied shuh ia ki MLA samthiah bieij kiba ruma bad phohsniew ha iing Dorbar. U Deputy Chief Minister Bindo Mathew Lanong u la iathuh ba ha kane ka Assembly 2008-2013, la don haduh 4 ngut ki MLA ki bym ju lait syn-aw ban kren ha ka iing Dorbar Assembly. Don ka jingthmu ban pynduh jait ia ki Trai Jylla Hynñiewtrep ba kin kylla long ki Rit Paid ha Meghalaya. Ka jingplie lad ia ki Central Offices, ki Central establishments kum ki Shipai BSF, bad Indo-Tibetan bad ka jingai license Seng Karkhana ia kiba nabar, ka ktah shibun ia ki longdien jong ngi. Kane ka mut ka jingwan buhai shnong ki Khyllah

jait khlem iada shuh ia ka Ri bad ka Jaidbynriew hadien. Katkum ka Election Commission of India ka ong ba uno uno u nong India uba la sah 180 sngi ha Meghalaya, donkam ban ai ka EPIC Card ia u. Ia ka Pancard ruh la ai tang da ki Agents. Shano shuh ki bor shnong ki bor District Council ha kine ki por?

Ka Sorkar Meghalaya ka pdiang sngewbha kat ia uba wan poi sha ka Bri U Hynñiewtrep. Ym don jingkhong, ka ai lut bad briew bad khyndew ban shongkulai ki nongwei kam pher la u dei u khar riwthor ne khar riwlum kumjuh. La lut ka khyndew ha East Jaiñtia Hills, ha Ri Bhoi District bad ha Shillong la syntuid na ka kti ki trai Ri. Katkum ka Constitution (Scheduled Castes) order, 1950 Part XVI Meghalaya, kine harum ki long ki trai Jylla ha Meghalaya kiba lah ban thied jaka bad pdiang sngewbha da ka sorkar jong ngi. Ka kyrteng ki jaitbynriew Riewthor (Scheduled Caste) ki long:-

1) Bansphor (2) Bhuimali or Mali (3) Brittrial Bania or Bania (4) Dhupi or Dhobi (5) Dugla or Dholi (6) Hira (7) Jalkoot (8) Jhalo, Malo or Jhalo-Malo (9) Kaibarta or Jalya (10) Lalbari (11) Mahano (12) Mehtar or Bhangi (13) Muchi or Rishi (14) Namasudra (15) Patni (16) Sutradhar.

Nangta pat, katkum ka Constitution (STS) order (Amendment) Act 1987 (Act 43 of 1987) kine ki long ki riwlum ha Meghalaya kiba lah ban thied jaka katba mon ha Meghalaya. Ka kyrteng jong ki ka long kumne harum:-

1) Chakma (2) Dimasa (Kachari) (3) Garo (4) Hajong (5) Hmar (6) Khasi, Jaiñtia, Synteng, Pnar, War, Bhoi, Lyngngam). (7) Any Kuki tribes, including i. Biate or Biete, ii. Changsan, iii. Chongloi, iv. Douggal,

v. Gamalhou, vi. Gante, vii. Guite, viii. Hanneng, ix. Haokip or Haupit, x. Haolai, xi. Hangna, xii. Hongaungh, xiii. Hrangkhwal or Rangkhoh, xiv. Jongbe, xv. Khawchung, xvi. Khawwahhlang or Khothal-ong, xvii. Khelma, xviii. Khoihou, xix. Kipgen, xx. Kuki, xxi. Lengthar, xxii. Lhangum, xxiii. Lhoujem, xxiv. Lhouvun, xxv. Lhpheng, xxvi. Mangje, xxvii. Misao, xxviii. Rieng, xxix. Siarhem, xxx. Selman, xxxi, Singnci: xxxii. Sitlhou, xxxiii. Sukie, xxxi. Thado, xxxv. Thangrigeu, xxxvi. Uibuh, xxxvii. Vaiphei.

(8) Lakher (9) Man (Tai-Speaking) (10) Any Mizo Lushai) tribes (11) Mikir (12) Any Naga Tribes (13) Pawi (14) Synteng (15) Boro Kacharie (16) Koch (17) Raba, Rava.

Ka Sorkar Assam ka ithuh ĩa ki Khasi Jaiñtia kum ki Scheduled Tribes ha ka District Karbi-Anglong bad Duma Hasao (North Cachar Hills District) ba ki lah ban bat khyndew). Kumjuh ka jylla Khar Bengali Tripura ka ithuh ĩa ki Khasia Scheduled Tribe ha Tripura. Hynrei ki Jylla para riwulum kum ka Nagaland, Mizoram bad Manipur kim ithuh ĩa ngi ki Khasi kum ki Riewlum. Mangi pat ba dang sah ka mynsiem ieit para riwulum ngi ai lut ĩa ka khyndew ka shyiap la ka dei ha Happy Valley ne Ri Bhoi District. Ki MLA jong ngi 60 ngut ki dang ĩohthiah haduh mynta bad kim pat pynkylla ne khmih thymmai ĩa ka Scheduled Tribe bad Scheduled Caste List jong ka Meghalaya.

U Rev. John Roberts u la thoh bad rwai shaphang ka Ri Khasi ha ka Kitab Khasi Third Reader sla -79-80 ha ka snem 1884 kumne; Ha ka dkhot ba nyngkong la thoh

“Ri Khasi, ri Khasi, nga ieit ĩa pha,  
Ka ri kaba ieit u barim uba jah.  
Ki tymmen mynhyndai la ngam ĩohi shuh,  
Jingky nmaw ĩa ki kan ym duh”.


Ri, ri Nga ieit thoin-thoin la ka ri;  
Ngin kiew sha khlieh, shaphrang ngin mih,  
Umpohliew jingstad ngin iadih.

Ha ka dkhot kaba 6 u John Roberts u rwai biang  
kumne:

La wan ruh U Phareng, la kiw u Dykhar;  
Ka suk ka ri Khasi, kan shai ruh kydar  
Kan phet ka jingbiet, jingdum kam don shuh,  
Ki syntiw ka jingtip kin phuh.

Mynta pat imat ngin hap rwai kumne to tip para  
Ri.

“Mynta la phet u Phareng naduh snem 1947,  
La nang wan iai kiew u dkhar haduh bym lah n̄iew;  
La shong lyngngeit ka jingbieij, jingdum ka suh thied,  
Baroh bam tyngka Ri thlen kim lehraiñ, ki ieit”.



# NA LANGPIH SHA KHANDULI AÏU NGIN LEH NAMAR KA RI?

*Mawphor, 20<sup>th</sup> Nailur (Sept), 2016*

**K**a shnong Langpih ka don ha West Khasi Hills bad ka Khanduli ka don ha Jaiñtia Hills. Wat la kine ki shnong ki iajngai iwei ia iwei pat, hynrei ka kyrteng jong ki la ju iatip paidbah man ka teng. Ha baroh artylli kitei ki shnong, ka Assam ka pyndik ia ki briew jong ngi namar ki don ha khappud Assam bad Meghalaya. Ka Assam ka la pyndik ia ka shnong Langpih naduh ka snem 1979 ter ter. Ha ka por ba long Deputy Inspector General u Mr. K.P.S. Gill I.P.S. ka Guawati Southern Range u la leit tur thma sha Langpih ban pyndik ia ki briew jong ngi. Hadien pat une u juh u Officer Pulit u la ioh ban treikam kum u Director General of Police ha Meghalaya.

Ha ka por ba wan siat ia ki Langpih ba lui lui ka Sorkar Meghalaya ka buh ban long Director General of Police da u Khar Assamia. Ki pulit Assam ki la sngewshlur ban iasiat iap ia ki briew jong ngi ha Langpih ha ka 14 tarik u May 2010. Sawngut na ki Khasi ki ba iap hajuh ki long u Rangbah Columbus Jala (30 snem) na Umyiap, u Rangbah Denis Nongsiej (40 snem) na Mawsikar, u Rangbah Charles Lyngkhoi (40 snem) na Mawlong 'A' bad u Rangbah Demos Rani (55 snem) na Mawdiangsnam. Kine ki la long ki riewshlur kiba la shah iap ban im ka Ri bad ka Jaidbynriew.

Ar snem eiei hadien katei ki jingjia ba sngewsih, kum ka jaidbynriew ki bitar shla ia ka Assam. Hynrei ka Sorkar Meghalaya ka pyndem tdong bad kam nud

khiih pyrshah ia ka Assam. Na ka liang jong ngi, ngi shu ia shah jingit pynban kum u Mahatma Gandhi bad u Anna Hazare. Hynrei u Mahatma Gandhi um shym la shah jingit ha ka por ba phiah ia ka Ri India ha ka snem 1947. Ha ki por mynshuwa, ngi ju ong ka **Khariap ia u dkhar** ba u thmu ban nohiap ne pyniap ia lade tang shu pher tiak. Hynrei u Khasi te u ju kiar raimaw raidieng ia ka jingpyniap tyrud ia lade.

Ha u bnai July 2012 haba la shah pyniap saw ngut ki Khar Bodo ha Kokrajhar, Assam la khiih ka thma puk tang saw sngi hadien la ieng da ka wait ka stieh ban mait naphang ia ki nongthombor ia ki Bodo. La lynñiar kaw kiba leh bein ia ki Bodo haduh ba la wan hiar u Prime Minister, Manmohan singh ban tem ia ka jingiakhluit. Haba don ka **tension** (huri hura) te la ioh kloi ia ka **attention** (ka jingpyrkhat) hakdak na ka liang ka Sorkar India.

Mangi pat, wat la ngi la shah siat iap haduh 4 ngut ki rangbah ar snem tam mynshuwa, te ngi dang ia kyndit bynriew dier por haba ym don shuh kiba poi kynmaw. Ka jingieit Ri ha ngi, te imat ka long kaba jngai ka lynti. Haba wan u nongshun dei ban ialeh ban iada ban ioh im, ma ngi pat ngi khein riwshlur ia u ba shah jingit shah thngan khlem bam khlem dih.

Ha Khanduli ka la don ka jingiakhih kaba la slem naduh ki por ba long Revenue Minister u Rangbah Martin N. Majaw ha ka snem 1978 ha Meghalaya. Mynta ki pulit Assam ki la kem ha ka 28<sup>th</sup> July, 2012 ia u Samla Elis Susngi, u samla Lone K. Laloo, u Samla Constantine Thubru bad u Samla Peter Langstang bad sa uwei de u bym shym la tip kyrteng ha ki kam kiba iadei bad u pud u sam ka Khanduli. Da ka jingiarap ki Samla Karbi la lah ban sei noh ia

kitei ki san ngut kiba shah kem ha ki Pulit Assam ha ka sngi kaba bud

Kano kano ka jaidbynriew ha ka pyrthei kaba klet ĩa la ka jong ka History bad ka Geography, te ki la tih liewlep hi ĩa ki longdien ban long ki nongwei ha la ka jong ka Ri. ĩa ka Jylla Meghalaya la pynlong da ka jingiatrei lang ki Ar kynhun jaidbynriew ki Achik bad ki khun u Hynñiewtrep naduh ki por ĩaleh Hill State lyngba ki Election paidbah naduh 1957 haduh 1967. Ha ka snem 1962 ka District Congress Committee United Khasi & Jaiñtia Hill ka la ĩaleh **Khasi-Jaiñtia State** hapoh ka jingĩalam u **Rangbah Jerlie E. Tariang** bad u **Rangbah Maham Singh**. Ka District Congress Committee (U) K & J Hills ka la shah rem kput ha ka Election 1962. U paidbah um mon ĩa ka Khasi Jaiñtia State ha kato ka por, bad u paidbah u la pynjop ĩa ka Seng APHLC kaba ĩaleh Hill State. Kumta ka District Congress Committee ka la keiñ noh bad kam dawa state kyrpang shuh la ka jong.

Tang shu la ĩoh ĩa ki Autonomous Sub-State ha ka snem 1970 bad ĩoh Hill State ba pura ha ka snem 1972, ka Sorkar Meghalaya ka la pyrkhath kyrpang ĩa la ki para riwulum. Kumta ka Meghalaya ka la ithuh haduh 17 tylli ki jaidbynriew riwulum ha Meghalaya katkum ka **Schedule Caste bad Schedule Tribes Orders (Amendment) Act 1976 bad ka Constitution (Scheduled Tribes) order Amendment Act 1987**. Te kumta ka Meghalaya hadien ba ka ĩoh Hills State ka la ai bhah ĩa ki para riwulum ban long ki trai muluk jong ka Meghalaya. Tangba kitei ki para riwulum Mizoram, Nagaland, bad Manipur kim treh ithuh ĩa u Khasi kum u Schedule Tribe ha ka Jylla jong ki.

Lada ngi phai sha ki sla jong ka History naduh ka snem 1947 haduh 2012, ngi ĩohi ba ka ri jong



ngi ka la ïaid lyngba ki lynti kiba khohruh khohram suda. Ka Ri India ka la laitluid ha ka 15<sup>th</sup> August 1947 na ka kti ki phareng. Ngi lap, ba ki Hima Khasi 25 tylli ki la ïoh laitluid lang bad ka Ri India. Ki da don ka **lama Trai Ri la ka jong kaba don 25 tylli ki khlur**. U Governor jong ka Assam ha kato ka por u dei u Sir Muhammad Akbar Hydari u ba la wan jngoh sngewbha ïa ka Office jong ka Federation of Khasi State ha ka 16<sup>th</sup> u August 1947 ha Riatsamthiah, Shillong. Ki Khasi States ki la soi ïa ka Standstill Agreement ka ban neh 2 snem naduh ka snem 1947. U Hari Singh u Maharaja jong ka Jammu & Kashmir u la ïateh ïa ka Standstill Agreement bad ka Pakistan. Haba ka Pakistan ka la wan hiar thma ïa ka Kashmir te u Maharaja ka Kashmir u la pan jingïarap na ka Sorkar India bad u la hap ban ïasoi soksular lyngba ka Instrument of Accession ban ïasoh noh bad ka Ri India.

Ki Hima Khasi naduh ka 15<sup>th</sup> August 1947 ki la ïoh ïa ka bor hima laitluid (Sovereign Power). U Paiem Olin Singh ka Hima Khyrim u la long de u President jong ka Federation of Khasi States bad u Paiem Sati Raja jong ka Hima Myllem u la long u Vice-President jong ka Federation. U Rangbah Ajra Sing Khongphai u la long u Chief Judicial Officer jong ka Federation. Kane ka "Federation" ka la pynmih ïa la ka jong ka Kot Khubor Sorkar ka "State Gazette" la ka jong.

Hadien kane, kine ki hima laitluid jong ka Ri kim lah ban shan slem da ka jingïatynruh na ka diang bad na ka mon te ki hap rung sha ka Ri India hapteng ka 15<sup>th</sup> December 1947 haduh ka 19<sup>th</sup> March 1948 ha kaba u Paiem Sib Sing jong ka Hima Nongstoiñ u la pynïasoh bad ka Ri India lyngba ka Instrument of Accession ha ka miet 19<sup>th</sup> March 1948. U Syiem khynnah ka Hima Nongstoiñ u Wickliff - Phuh u la

leit shong noh sha pyrshah ka Hat Bagli jong ka Hima Nongstoiñ. Kane ka jaka ka la hap noh sha ka East Pakistan, mynta Bangladesh da ka jingpynbeit pud u Sir Radcliff ha ka snem 1947 hapteng ka Ri India bad ka Pakistan. U Governor Shri Sriprakasa, u Governor ka Assam u la leit plie ña ka Khasi States Constitution Making Dorbar ha Dinam Hall hajan Madan Student ha Jaiaw, Shillong ha ka 29<sup>th</sup> u April 1949. Hadien katei ka sngi, khru shi khru ki syiem ki myntri bad ki dkhot ka Khasi States Constitution Making Durbar ki la ñalong dorbar, ha kaba raikut ña ka lawei jong ka Ri bad ka Jaidbynriew ha kane **Ri Umsnam u Kñi u Kpa.**

Kane ka Khasi State Constitution Making Durbar ka la rai ha ka 21<sup>st</sup> July, 1949 ban don noh la ka jong ka State ba kyrpang ryngkat ki jingñasoi katkum ka Annexed Agreement kumba la ñoh ka Jylla ka Jammu & Kashmir ña ka Article 370 jong ka Constitution ka ri Inda ha ka **First Schedule** jong ka Constitution ka Ri India. Kim shym pan satia ña ka Sixth Schedule ka bym don bor ei ei. Hadien katei, ka Ri India ka la pynbna ña lade kum ka **"Republic"** naduh ka 26<sup>th</sup> u January 1950. Ña ki Khasi States 25 tylli la pynhap jubor shapoh ka Jylla Assam khlem ka mon ka jong ki.

Ynda haba la phet u Phareng ka Sorkar Dkhar Assamia ka la pyni dohksah ña ka ri jong ngi. Ka la weng noh ña ki ar tylli ki Block jong ka Jowai Sub-Division jong ka United Khasi & Jaiñtia Hills. Ka Assam ka la pynñasoh ña ktei ki Block ar tylli sha ka United Mikir bad North Cachar Hills District. U Chief Minister ka Assam ha kata ka por u dei u Shri Bishnuram Medhi M.Sc B.L. bad u Rev. J.J.M. Nichols - Roy u Cabinet Excise Minister ka Assam. U Rangbar

Larsing Khyriem u la pyrshah ĩa katei ka jingdkhat ĩa katei ka Block lyngba ka **Note of Dissent** jong u. Ngim tip ĩa ka daw balei ka Jaiĳtia Durbar kam shym ĩaleh pyrshah ĩa ka jingleh donbor ka Sorkar u Medhi.

Ka jingheh kitei ki Block ar tylli ha ka por ba la phiah ĩa ki, ka long, 596.0 sq.miles ne 1,543.6 sq.kms. **Ka Block I** ka don **143 tylli ki shnong** bad ka **Block II** pat ka don **213 tylli ki shnong** ha ka por ba ka knieh na ka Ri Jaiĳtia. Ka kyrteng ki Ilaka (Doloiship) ryngkat ka jingbun tylli ki shnong ha ka **Block I** ki long kumne:- (1) Ka Nartiang Doloiship (**30 tylli**) (2) Mynriang Sirdarship (**71 tylli**) (3) Lalung Nonglung Doloiship (**1tylli**) (4) Nongjngi Doloiship (**3 tylli**) (5) Jynthong Doloiship (**2 tylli**) (6) Shiliang Myntang Doloiship (**3 tylli**) (7) Nongphyllut Doloiship (**24 tylli**) (8) Raliang Doloiship (**8 tylli**) (9) Shangpung Doloiship (**1 tylli**).

Ka kyrteng jong ki shnong ha ka **Block-II** kiba la pynhap sha ka Mikir Hills (mynta Karbi Anglong) (1) Nartiang Doloiship (**15 tylli**) (2) Lalung Nonglung Doloiship (**60 tylli**) (3) Mynri Doloiship (**56 tylli**) (4) Nongjngi Doloiship (**2 tylli**) (5) Jynthong Doloiship (**79 tylli**) (6) Nongphyllut Doloiship (**1 tylli**)

La plie ĩa ka United Khasi & Jaiĳtia Hills Autonomous Council ha ka 27<sup>th</sup> u June, 1952 ha Dinam Hall. Jaiaw Shillong da ka jingĳakhih pyrshah ki samla pule hapoh ka jingĳalam u samla Hoover Hynĳiewta. La siat Tear gas ha surok Mawkhar bad la pynjaw snam ha katei ka sngi: 43 ngut la kem bad bun ngut la mynsaw bad da ki spah ngut ki la mad erbih.

Ka State Re-organisation Commission ne S.R.C. jong ka Sorkar India ka la wan sha Shillong ha ka

1 tarik u April 1954. Ka Khasi National Dorbar ka la leit ai Memorandum ba ka dawa Hill State. U Mr. A.Z. Phizo u President jong ka Naga National Council u la wan jngoh ia ka Shillong ha ka snem 1955. U Rangbah Hoover Hynñiewta u la jop ia ka Election M.P. 1957 na ka Seng **East India Tribal Union** (E.I.T.U). Hynrei u Captian Williamson Ampang Sangma M.L.A. na ka Garo National Council ba ialeh Hill State, u la leit iasoh pynban bad ka Sorkar Congress u Bimola Prasad Chaliha ka Assam Cabinet ha ka snem 1958. Ka jingialeh Hill State ka sdang kynjah bad pjah slam shipor. U Khasi u la shah shet ha u Garo. Ha ka snem 1960, ka Assam ka la pynrung ia ka ktien Assamia kum ka ktien Sorkar ha Assam. Kumta la kha ia ka A.P.H.L.C. ne ka All Party Hills Leaders Conference ban ialeh Hill State ban mih noh na Assam.

Ki rangbah APHLC ki la leit iashem ia u Prime Minister Jawahalal Nehru ha Gauhati Airport ha ka 10 tarik u June 1963 ban dawa Hill State. Hynrei u Nehru u la tyrwa ia ki da ka Scottish Pattern (ka Skad Patlun) ba ki ong ka jingsynshar ha la ka jong tangba ha Assam hi. Ha ka por ba long Chief Minister u Bimola Prasad Chaliha, ka Sorkar Assam ka la tab pud sha ka United Khasi & Jaiñtia Hills ha **ka iëw Die Masi ne Cattle Market** jong ka Hima Myllem ha ka snem 1965 ha Khanapara. Haba ym lah iabeit bad ki bor synshar ka Kamrup District, te u Syiem Franciswell ka Hima Myllem u la ai noh da ka case pyrshah ia ka Assam ha ka Assam bad Nagaland High Court.



# KA SHAD LAKHEMPONG KA VALENTINE'S DAY KA RI BHOI

*Mawphor, 17 tarik İaïong (April), 2017*

**K**a Shad 'Lakhempóng' ka dei ka shad İasnóh kti Ksoh syngkai nadien jong ki Theisotti bad ki Rang samla ha ka Shad sngewbha Lakhempóng. Ha kane ka İaluh samla haba shai haba paw ha ka lypung shad ksoh kti bym İadei kur, Dei tang ki samla paka ban İajied samla ban poi sha ka shongkha shongman. Ha kane ka sngi 7<sup>th</sup> - 8<sup>th</sup> tarik April 2017, la don ka Shad Lakhempóng ha ka shnong Nongnub Umpohwin, Raid Nongtung, Hima Khyrim, Ri-Bhoi District. Ka shad Lakhempóng ka dei ka shad lehkmén ki samla kynthéi shynrang ba İasnóh kti lum pyllun ha ka lypung shad. Kane ka shad ka jan İasyriem kum ka shad Mawja ha Riwar harum Pynursla ha ka Hima Khyrim.

U Paiem ka Raid Nongtung na ka Kur Shadap bad Lyngdoh Raid na ka Kur Lyngdoh Nongtung (kiba İadei kur bad ki jait Lyngdoh Myllichem). Kine ki la pynim İa kane ka kolshor pynneh riti ha ka shad ka kmén ki khun samla ha kine ki shiphew snem lynter. Tang ki khun samla kynthéi kiba dang sotti, kiba lah ban shim bynta ha kane ka Shad Lakhempóng. Katba ka pyrthei samla jong ka pyrthei shityllup ki İa sngewmuja leit khroh pah samla ha ka Valentine's Day 14 tarik u February man ka snem. Hynrei ha ka Ri-Bhoi Raid Nongtung, ka Valentine's Day jong ki ka la long ha utei u snem ha ka 7 bad 8 tarik u April ha ka shnong Umpohwin. Ki samla ki la don la ka jong ka pali ban jied İa la ki baieit ha ka Shad Lakhempóng. Hynrei

kam dei te ka “İaleh punk (pong)” ban riam khyllah ne ĩa rwai kyrkait ne pynĭeng shñiuh sha bneng, ban leh kynshleiñ ban pynbiej ĩano ĩano re.

İa katei ka Shad Lakhempong ha katei ka sngi, la wan sakhi da u Chief Adviser ka Sorkar Meghalaya u Dr. Donwa Dethwelson Lapang, u Rangbah Ronnie V. Lyngdoh Minister ki kam Arts & Culture ka Sorkar Meghalaya. Baroh arngut kitei ki Rangbah ki la ai jingkren ba don jingmyntoi sha ki paidbah. La suit la shor ĩa katei ka Shad Lakhempong da u Paiem Rangbah Ricky Nelson ka Hima Mylĭiem ba la synran ĩa u da uwei u Lyngskhor bad uwei u Basan na ka Hima Mylĭiem.

U Paiem ka Hima Mylĭiem, nyngkong eh u la leit hapteng ka lypung shad. Don uwei u dieng rnong ba ki buh dur ĩa ka dur u sim rynnĭaw. Nangta don u dieng Lasubon kaba mut ba dei ban shad tang ki thei sotti ha ka lypung. Harum khyndiat ha shiteng u dieng don ka RUH ba la shna da ki siej. Kane ka pyni ĩa ka jingĭateh song ĩa ka Raid Nongtung baroh kawei. Kumba ka long mynta ka Raid Nongtung ka hap shiteng ka Ri-Bhoi Khyrim, Meghalaya bad shiteng pat ka hap ha ka Block-II jong ka West Karbi Anglong. Hajan trai u dieng ba pynĭeng ha lypung, u don sa u dieng kynphroi ba i ieit ban peit da ki mat peit jong u paidbah nongpeitkai. Hadien ba U Paiem Ricky Nelson u la dep suit dep shor ban plie ĩa ka Shad Lakhempong. Ma u ruh u la ĩashad lang sawdong pyllun bad ki thei Nongtung, kaba pyni ba ka Hima Mylĭiem ruh ka sngewkmen ĩa ka Shad Lakhempong ba kan long kaba kmen. U Dumdar u pynĭaid ĩa ka shad ban peit ĩa ki samla ba kin ĩashad katkum ka riti bad dustur. Hapteng ki riewkhmat kiba ym shym la poi sha ka Shad Lakhempong Raid Nongtung, wat

haba la khot sngewbha (Invited) ia ki, kita ki long u Paiem ka Hima Khyrim u Dr. Balajied Sing bad ka Kong M.W. Nongbri kaba long ka Director jong ka Arts & Culture ka Sorkar Meghalaya. Ki paidbah ki la ap khmih lynti ia ki hynrei kim shym wan na ki daw bym lah tip.

Nalor u Syiem Nongtung na ka Kur Shadap bad u Lyngdoh Nongtung, kiwei pat ki Kur jong ka Raid Nongtung kiba iakitkhia ban pynlong ia ka Shad Lakhempong kaba jop ki long, (1) Lamarai, (2) Masharing, (3) Sten, (4) Saring, (5) Masynting, (6) Lamare, (7) Mapur, (8) Pale, (9) Makdoh, (10) Mujai.

Ka Shad Lakhempong ha ka snem 2016 ka la long ha ka shnong Ummat. Kane ka shnong ka long kaba rim tam ha ka Raid Nongtung. Ka shnong Ummat ka don shaphang mihngi shathie na Mawlasnai, Khyndew-so, Sabuda. Kane ka shnong Sabuda mynta ka hap ha ka West Karbi Anglong District Block-II jong ka Assam. Hajan kane ka shnong ka don ka lawkyntang jong ki Khadar Kur Raid Nongtung ha ka shnong Ummat. Haduh mynta don haduh khatar tylli ki Mawshyieng Mawbah jong kita ki Khadar Kur Raid Nongtung naduh mynkulong kumah. La ngeit ba ka mynsiem jong ki Khadar Kur ba la iap hyndai ki iai im, ki shong ki sah ha dwar U Blei Trai Kynrad. Ka longkur ba dang im, mynta ki iohi ba ki bor synshar ka Assam kim khein snep ia kitei ki Maw niam.

Ka Raid Nongtung ka don hapteng u pud bad ka West Karbi Anglong bad ka Ri-Bhoi District. Ka Assam ka leh donbor bad ki bried jong ka ki la thom bad lehbein ia ki paid jong ka Raid Nongtung. Ka Police Station jong ka Meghalaya kaba don ha Mawlasnai ka long kaba rit bad don tang khyndiat ki pulit. Te ka Sorkar Assam ka tab pud beit bad ka buh syndon

da ka Police Outpost jong ki ha ka shnong Sabuda Ri-Bhoi District. Ki pulit Meghalaya pat ba kim nud ban tur sha Sabuda haba wan tab pud ka Assam. Ki shnong kiba don ha ka Raid Nongtung Ri-Bhoi District mynta ki long (1) Umpowin, (2) Khlawblei, (3) Nongrim Umpowin, (4) Nongnub, (5) Lummushi, (6) Umsyai, (7) Mawlasnai, (8) Umjingktad, (9) Sohmatan (10) Tyrso pdeng, (11) Tyrso Nongtyllep, (12) Umtngam, (13) Byrsiej, (14) Umsu, (15) Khyndew-so.

Kiwei pat ki shnong jong ka Raid Nongtung kiba la hap mynta ha ka Block II, West Karbi Anglong District jong ka Assam ki long; (1) Ka It-Patung, (2) Khlieh Umwang, (3) Madan Umwang, (4) Umtlieh, (5) Umsarang, (6) Um-hi, (7) Umlaper, (8) Pdengblei, (9) Umkara-Umlaphing, (10) Ummat. Ka Block II ryngkat bad ka Block I jong ka Ri Jaiñtia ki la syntuid sha ka United Mikir & North Cashar District ka Assam naduh ka snem 1951; hadien ba la pynjari ña ka Constitution jong ka Ri India naduh ka 26 tarik u bnai January 1950.

Ka Sorkar Assam hadien ka jingkhlad noh u Gopinath Bordoloi ha ka snem 1950, la shimti da u Bishnuram Medhi kum u Chief Minister. Une u Myntri Rangbah kloi lan, u la thung artylli ki Boundary Committees ban pynbeit thymmai ña ki district ha Assam, kawei ka Committee ka dei na ka bynta ka Naga Hills bad ka Sibsagar District da ka jingthmu ban knieh noh ña ka shnong Dimapur na ka Naga Hills. Kumta haba ki dkhot jong ka Boundary Committee ki la hiar sha Dimapur. Ki shem ba u Mr. A.Z. Phizo uba long u President jong ka Naga National Council u la phah beh ña ki da ki samla shynrang Naga. Ki la beh krad ña kitei ki dkhot pynbeit pud ka Committee. Kumta kim banse ban ai ña ka Nil Report sha u Medhi.



Kawei pat ka Committee ka dei na ka bynta ka United Khasi-Jaiñtia Hills bad ka Nowgong District. Uwei na ki dkhot kane ka Committee u dei u Ma Larsing Khyriem MLA. Une u Waheh um ïahap jingmut ïa katei ka jingpynbeit pud bad u la ai **Note of Dissent** ban pyrshah ïa katei ka jingweng jong ka Block I bad Block II na ka United Khasi-Jaiñtia Hills. Um ïahap jingmut ïa ka jingthaw ïa ka District thymmai Mikir Hill and North Cachar Hills. U Secretary jong katei ka committee u dei u Shri. C.S. Booths uba long u Sub-Divisional Officer (Civil) jong ka Jowai Sub-Division ha katei ka por.

Katei ka Committee ka ai jingmut ban pynïasoh ïa ka Block I bad Block II jong ka Jaiñtia sha ka district thymmai hapoh Assam. Hadien kane la pynkiew kam ïa u Booths ba un long u Sahep Deputy Commissioner jong ka United Mikir & North Cachar Hills. Une u Officer u long uba ju sah ju shong ha ka shnong Malki Nongshiliang. Kaba phylla ka long ba ka Jaiñtia Durbar ka sngap ïa katei ka jingleh jubor ka Sorkar u Medhi. Kam shym la phah ïa ki Khynroo Jaiñtia ban ïeng pyrshah da ka wait u sum kumba leh u Phizo bad u Kiang Nangbah ban beh krad ïa ki nongshun.


Kiwei ki MLA na ri Khasi ha kito ki por ki long ka Kong Bonnily Khongmen ba mih khmat ïa ka Shillong Women Assembly Constituency ha ki snem 1946-51. Sa kawei pat u rangbah uba mihkhmat ïa ka Shillong Legislative Assembly u dei u Rev. James Joy Mohon Nichols-Roy naduh ka snem 1946-51. Une u nongmihkhmat u la long ruh de u Cabinet Minister jong ka Sorkar Assam. Lah ban ong ba dei ma u bad u Chief Minister ka Assam u Bishnuram Medhi kiba la ai jingmynjur lyngba ka cabinet ban thung ïa katei ka Committee phiah District. Kaba sngewkthang ka

long ba u MLA Jaiñtia u ai tang ka Note of Dissent. U khlem da lum paid ña ki KHYNROO Jaiñtia ban ñeng ñaleh pyrshah. Kumjuh ruh ki Waheh ka Jaiñtia Durbar ki kun tiaw khlem saham pyrshah ña u Medhi. Kumjuh ruh u Minister Khasi jong ka Assam Cabinet u Rev. J.J.M. Nichols-Roy um shym la kren, u shu sngap la ka sngap. Um shym la iehnoh kam (resigned) ruh na ka Sorkar Assam. Ka jingsngap jar jong u ña katei ka jingleh donbor ka Sorkar u Medhi kaba la dkhat haduh 1000sq. kilometer na ka Ri Jaiñtia.

Haba la ñoh Jylla 1970-72, ki rangbah Meghalaya bad ki paidbah Garo bad Khasi ki la ñashad kmen ba la ñoh Hill State shuwa ña kata ki paidbah ki pyrta jam ha ki surok bah ka Shillong ba **“No Hill state No Rest”**. Mynta pat ba la ñoh state ki shong lyngngeit (ne rest) junom. U Rangbah Brington Buhai Lyngdoh lei lei u la ong ba ym ju don ka jingñia kajia pud bad ka Assam. U la ai nuksa ba ka Meghalaya kam ju uxor ne ai mukotduma (Case) pyrshah ña ka Assam. Ka Sorkar Assam ruh kam ju ai mukot duma ña ka Meghalaya. Kumta kam ju don ka jingñiakajia pud bad ka Meghalaya bad Assam naduh ba ñoh Hill State. Ka ju don ka jingong ba haba ña lympat ki hati te la shah ñiom la shah ñuh bad shah kyrdem ei u phlang u kynbat. Hynrei ym tang kata, lada ñaleh ieit ma ki ruh uba shah lehbeñ ha ki dei hi u phlang u kynbat. Kiba jynjar mynta ha khappud ki dei tang ki paid knup paid trap kiba shong ha Sahsniang Jaiñtia Hills, ha lum Dorbar ha Mawlasnai ha Ri-Bhoi District bad ha Langpih ha West Khasi Hills.

Ka shnong Nongnub Umpohwin ka don mynta kumba sawspah ñing ei ei. Ka kynjang jong ka na ka sla duriaw Bay of Bangal ka long 850 meter (above sea level). Ai ba ka jingshad Lakhempong ha ka 7

bad 8 tarik u April, 2017 ha phyllaw iing skul jong ka Mangkathiang Makdoh Upper Primary School ha Umpohwin kan sei ia ki soh bathiang ha ki dohnud ki samla ka ri. Ka la dei shisha ka Valentine's Day jong ka pyrthei ha Ri-Bhoi. Lada ngi dang kynmaw ieit ia ka Geography ka History bad ka Culture jong ka Shad Lakhempong Raid Nongtung, te ka sngi ba phyrnai ka dang ap ia ki khun samla ban iapoikha tang para Khasi Hynñiewtrep. Ym dei ho ban ia ioh briew da ki khylla jait aü re?



# HANA TE SHISHA! NGI DEI KIBA IEIT DKHAR PALAT?

*Rupang, 28 tarik Jylliew (June), 2018*

**N**a ka ktien ba ki kren bad ka kam ba ki leh naduh ka snem 1972 haduh mynta, ngi lap ba ki khun U Hynñiewtrep ki la aili aimon palat ia u Khyllah jait ne u Dkhar. Une u la shongkulai bad kodom suwari la kum u trai ri. Ha ka jingshisha u dei tang u bar ri, ba u Phareng mynnor u wanrah ia ki ban shongshakri kum u Mushi, u nongshet dohblang, u nongtrei jied dak kum u Babu Pakhana ha Govt. Press. Ym tang katta u la wanrah kyrpang ia u Khar Bengali, Assamese bad Khar Muslim ban trei kam Chaprasi ne babu clerk. Nalor nangta de u la wanrah ia ki kharmetor ki Khar Sikh na Punjab ban khat jakhlia (scavenger) na paiñkhana na iing briew bad paiñkhana sorkari jong ka Shillong Municipal.

Ha ka snem 1976, la wan ki Professors bad samla pure Khar Sikh jong ka Punjab University ban ong ia ki khar Sikh ha Shillong ha Them Iewduh ba kin iehnoh ia katei ka kam khat jaboh jong ki ha Shillong. Ki ong ba ym ju don Khar Sikh ha ri India ba kin trei ia kitei ki jait kam bapoh lait tang ha Nongbah Shillong. Hynrei ki Khar Sikh ha Shillong kim treh ban iehnoh ia katei ka kam ba ki ju trei namar ka dei ka nongkynti ne monopoly jong ki. Hap phet iamrem ki Professors bad students ka Punjab University. Ki kharmetor ki trei ia kitei ki kam tad haduh ynda la pynsangeh ia ki da ka Shillong Municipality hadien.

U Phareng u la phet noh na Shillong bad na Ri India baroh kawei naduh ka snem 1947. Hynrei

ia kine ki dkhar kiba wanrah ma ki sha ka Bri u Hynñiewtrep, u iehnoh ia ki ha ka ri jong ngi khlem da pynphet shnong ia ki ba kin leit phai sha la shong trai. Mynta kitei ki dkhar la ki dei ki Khar Hindu, ki Khar Musulman ne Khar Khristan na South India ki la nangbun nangbun. Ki Khar Sikh lei kiba mynshuwa ki trei ia ki kam kiba poh, hynrei mynta ki la trei ia ki kam khaii pateng bad ki long kiba riewspah bha.

Ka jingkylli ka mih ba hangno ki khun u Hynñiewtrep ki don mynta? Ngì long kiba shu im lili penpen. Hato ngin kynnoh ia u Chief Minister, ia ki Ministers ne u Chief Secretary hana ba um iada ia ka ri bad ka Jaidbynriew? Kaei kane ka Ri bad ka Jaidbynriew? Ka Ri ka dei ka shnong, ka Raid ne Elaka bad Hima. Kynthuplang ia ki ngin ioh ia ka Bri u Hynñiewtrep. Lada ngi klet ia ka shnong trai, ngim tip shuh ia la ka jong ka Raid ne Ilaka bad ka Hima te ka Ri jong ngi ka lah ban syntuid sha ki dkhar ki ling. Kumjuh ruh lada ngi kduplang ia ki jait ki kur u Hynñiewtrep ngi ioh ia ka Jaidbynriew.

Haba ki Phareng ki la phet ha ka snem 1947, ki la shu iehnoh kumto ia ki Khasi ban shah patrong ha u Khla u Thlen. Ngì shem dei ki Nongtalam Khasi kiba ieit dkhar bad pynjah mynsiem ia ka Khasi State hynndai bad pynlong Khasi District ia ka (U) K & J. Hills naduh 1950. Haba kren shaphang ka jingsynshar ha kane ka ri, U Syed Muhammad Sa'adulla u dkhot jong ka Constituent Assembly bad uba long ruh u dkhot jong ka Drafting Committee, uba la bat teng ia ka kam Prime Minister ka Assam kum u Premier ba nyngkong ka Assam ha ka snem 1937. Hadien biang u la long Prime Minister ka Assam 1943-46; u la kren ha ka **Dorbar Constituent Assembly ha ka Constitution Hall** ha ka 21tarik u November 1949 ha

New Delhi. U Honourable. Dr. Rajendra Prasad u la long u **Khnonng Rynsan** (Chairman) jong katei ka sngi.

U Syed Muhammad Sa'adulla u la kren ha katei ka Dorbar da kaba ong "Sir, the Khasi Hills have been relegated to the Sixth Schedule for which Rev. Nichols-Roy is very thankful, but there is a constitutional anomaly. Although the Constituent Assembly is not to find a remedy for that, yet I must sound a note of warning that this small district of Khasi Hills embraced 25 Native States most of which had treaty rights with the Suzerain power in Delhi. They were asked to join the Indian Dominion in 1947. Instruments of Accession accompanied by an agreement were executed by these Chiefs and they were accepted by the Central Government. But though even this area has been included in the Sixth Shedule, up till now no agreement or settlement has been arrived at between the Constituent Assembly of the Federation of the Khasi States and the Assam Government or the Government of India, I do not know what will happen to these areas or people after 26<sup>th</sup> January, 1950. A deputation headed by the President of the Federation of the Khasi States came early this month to Delhi to press their grievances before the States Ministry as well as the Drafting Committee. The Drafting Committee met them and they had two simple requests to make. They are the most democratic of all democratic people. Their native chiefs are elected by all the people in their territory by adult franchise. The chiefs could be removed as well by the people. They want the system should continue. The second thing which is in the heart of all people in that art of the world is that these chiefs are only territorial chiefs. They have no right over the land. The land belongs to the people. This ancient sacred right to ownership of land in the

territories of their chiefs they want to preserve, but they are afraid that section 3 of the Sixth Schedule gives a loophole for doing away with that right. They want a simply provision that these two rights may not be disturbed by the District Autonomous Councils. (Draft Constitution) Vol. XI (14-11-1949 to 26-11-1949) sla -735.

Lai snem mynshwa, kata ha ka snem 1946 u Pandit Jawaharlal Nehru u la wan sha Shillong ban kren ha ka iing Khasi National Durbar, Mawkhari, Shillong. U Nehru u la batai shaphang ka jingsynshar la ka jong bad ka jingmyntoi na ka. U Chairman jong katei ka Meeting u la long u Kongor A. Macdonald. Haden ba la dep u Nehru, la kynthoh u Kongor A. Macdonald da kaba ong ngi ki Khasi te ngi kham shaniah ia u '*suid-lieh ban ia u suid-iong*' (We prefers a white devils than a black devils) bad u pynwai artad ia ka jingialang.

Shisha haba u paid Khasi baiar u la shaniah ha ki nongsynshar na Assam ha kaba la shah knieh lut ia ka Block - I & II Ri Jaintia, Khanapara, Musniang, Langpih ka urlong ka jingkynthoh u Kongor A. Macdonald hyndai ha Khasi National Dorbar. La ioh ia ka Hill State da ka Syep ki Khun ka Ri hapoh ka jingialam u Rangbah Hoover Hynniewta bad u Professor G.G. Swell, M.P. kiba la kyrhuh bad iasaid Hills State naduh ka por u Nehru, Lal Bahadur Shastri haduh ka Indira Gandhi.

Ynda la ioh Hill State u Captain W.A. Sangma u la long u Chief Minister ba nyngkong jong ka Jylla. Une u la leh bha ia ki dkhar da kaba u la ai jingbit ban tei ia ka Meghalaya Plywood Company Ltd, ha 12<sup>th</sup> Mile ha Byrnihat. Ki Khasi Minister ki la ia chorus lang ha kaba leh bha ia u Kharkaia Hehspah J.N. Bawri.

U Chief Minister uba lai jong ka Meghalaya u dei u Rangbah Brington Buhai Lyngdoh. Une lei lei u la pynkylla ïa ka Meghalaya Land Transfer (Regulation) Act 1971 ha ka por ba u Rangbah Martin N. Majaw um pat dei wat tang u MLA ha ka snem 1971. U Rangbah B.B. Lyngdoh u la pynduh bad khynra ïa ka jingthmu jong ka Land Transfer Act 1971 da ka Amendment Act 1991. U la shah ba ki dkhar, ki bar jylla ba wat ki bar ri ba ki lah ban thied jaka katba mon lada ki seng skul, college ne University, ban tei ïingmane bad seng Karkhana. Da kane ka Act la tei mynta ka ïingmane Kharmuslim baheh tam ha North East India halor ka Wah Umshyrpi ha Laban ba la plie da u Vincent Pala, Ex-Minister of State ka Ri India. La ong ba kane ka ïingmane la tei syndon halor ka Wah Umshyrpi kaba long trai da u Syiem ka Hima Myllem bad ka KHADC. Ngi sngewphylla ba katei ka ïingmane Madina Mosque (Masjit), ka la ïoh jingbit khlem ka jingpyrshah na ka liang u Syiem ka Hima Myllem bad KHADC.

Ki aiñ ba thaw ka Dorbar ka Meghalaya Legislative Assembly ki long ki bym lerkam kum ka Meghalaya Prevention of Benami Act haduh ka Meghalaya Compulsory of Marriage Act 2012, ki pynpaw ka jingtlot ka aiñ. Ha ka House of Representative ba ki ong ka American Congress don haduh 435 ngut ki MPs. Shi bynta na ka 3 bynta ki MP American ki dei ki Barrister ne Lawyers suda. Kumta ki thaw ïa ki aiñ kiba da kat ki aiñ na ka bynta ka jingmyntoi u paidbah. Ngi lyngngoh ba balei ki paidbah nongjied election ha Meghalaya ki phah sha ïingdorbar pynban kham bun da ki nongkhaï ki bym tip kaei ka aiñ?

La ud ki paidbah bad ki Sengbhalang ïa ki jingduna ka Meghalaya Land Transfer Act (Regulation) Act




1971. Hooïd, ka Meghalaya Land Transfer Amendment (Regulation) Act 1977 kaba la shon ha ka snem 1978, ka khang sbak ïa ki jingdie khyndew sha ki dkhar lada ki thied shimet. Hynrei ka Meghalaya Land Transfer (Regulation) Act 1991 bad ka Meghalaya Land Transfer Act 2012 ba la pass da ka Sorkar u Dr. Mukul Sangma ka prong ka kbong ïa ka Land Transfer Act 1971 khlem ka jingpyrshah jongno jongno ruh.

Dang shen ka Sorkar Meghalaya United Alliance (MUA) lyngba ka Urban affairs Department ka la pynthaw ïing Office ha Keating Road ïa ka Keating Road Welfare Organisation ba don haduh 99% da ki dkhar ba wan buhai shnong ha Shillong. La kyndang ïa ki lai tylli ki Dukan Sha ba die ki longkmie Khasi. Iwei na kita I dei I Kong Kris Lyngdoh na Mawlai Mawroh iba ju die Sha hangto naduh ka por ka Sorkar Assam. Kiba plie ki nongdiesha Khasi ki la shu hap phet khlem da don mano mano ban ai jingïarap ïa ki.

Ka Sorkar u Dr. Mukul Sangma ka la die duh ïa ka T.B. Hospital ha Upper Mawprem ba la shna da ka jingpyrshah u Syiem Sati Raja ka Hima Myllem ha ka snem 1943. Ka Sorkar Phareng ka la suspend ïa u Syiem Myllem ba u ïapyrshah. Hynrei mynta u Dr. Mukul Sangma u la die duh haduh 99 snem katkum ka Public Private Partnership ha uwei u khar Bengali na Kolkata. La pynbeit hana un ai jaka pule ïa ki Samla Riewlum Meghalaya haduh 40 ngut na ka Shispah. Phewse ka Sorkar Meghalaya ka shu pynbeit tang ban sngap jar ki paidbah bad sengbhalang ha Meghalaya. Ka la buhrieh ïa kawei ka aiñ ba la pass da ka Parliament kaba kyrteng 'THE CENTRAL EDUCATION INSTITUTIONS (Reservation in Admission). Amendment Act 2012. Lyngba kane ka Act thymmai ym don jingbuh tyngkai (reservation) ïa ki riewlum SC/ST wat ha ki Schedule Areas ka Meghalaya.

Mynta ym lah shuh ban leit pule skul Doktor, IIM, IIT, National Informatic ha Sohra lymda pass ia ka Common Admission Test. Kine ki skul haneng ki shu pynbieit ia ngi, ki long tang kum ka jingwan hiarthma ia ka Ri lyngba ka occupation army. Kine ki jingailad haneng ban wan seng skul, ka long tang kum ka lad ban pynbun ia ka EPIC Card ban buhai shnong ha ka Ri.

Hato ka dei mo shisha ba ki Khasi ka Meghalaya ki long kiba ieid dkhar palat. Kano ka Jaidbynriew ka bym kwah ban iada ia lade hapteng kat kine ki jingeh te kam donhok satia ban im ha ka pyrthei kaba dap da ki jingialeh ba man la ka sngi. Hato u Pa'em Tirot Singh, Kiang Nangbah bad u Babu Soso Tham kiba pyrsat mynsiem ba ngin husiar ba ioh ngi kylla nongtong um bad nongthoh dieng iano re kum ki nong Gebion hyndai. Ka Jaidbyntiew kaba shu sngap ka lah ban iap noh na ka sla pyrthei. Ieng joit para ri ngin kynmaw kyndiang ia la ka Ri manla ka sngi.



# U SYIEM WICKLIFFE

*Rupang, 17 tarik Risaw (Oct), 2018*

## U Syiem Wickliffe ha ka snem 1978

**U** Syiem **Wickliffe** u la khlad noh ha ka 21 tarik u October 1988. La dap laiphew snem pura mynta. La kha ïa u ha ka ïing ki Syiem Nongstoiñ ha Nongstoiñ ha ka 15 tarik u August 1909. Ka kmie jong u dei ka **Phuhsngi** bad u kpa dei u **Dor Sing Nongrem**. U la long u khun uba saw napdeng shipara. Ki hynmen jong u ki long ka Blissimaiphuh, Pretimaiphuh bad u Kromwellphuh. Ki para jong u ki long u Hookerphuh, u Kranwellphuh, u Rockerphuh bad u Nianderphuh.

U la pule nyngkong ha ka Lower Primary School ha la shnong. U sa kynriah skul noh sha Mawkhar Christian Middle English M.E. School. U la pyndep ïa ka M.E. School ha ka snem 1921. Haden kata, u la leit pule sa ha ka Shillong Govt. High School bad u la long u khynnah skul jong u Babu Soso Tham. La ong ba u ju ieit bha ïa u.

Haden kata u la leit pule ha ka Calcutta Engineering College ha ka Overser's Course bad u la jop ha ka First Divsion, ha ka snem 1934. Shuwa ban hiar sha Calcutta, u para jong u, u Hookerphuh u la don lypa ha ka Scottish Church College. Kiwei ki samla Khasi kiba don ha Calcutta ha ka por jong u ki long u Bah Bredin Hearge Jyrwa, Holing Diengdoh, Langstang Rynjah, Wellson Khongmen, George Lyngdoh bad u Hughlet Pariat.

Na Calcutta u Syiem Wickliffe, u la leit pule Engineer ha ka **Kala Bhavan College of Engineering**,

**Baroda**, kaba hap ha ka Bombay University. U la long uba minot bha ha ka pule kot. U la long ruh u khlur ha ka jingialeh kai Football bad Hockey. U la long u Captain jong ka Baroda College pyrshah ia ka Gackward Baroda State Railway ha ka jingialeh kai ha ka snem 1935.

U Syiem Wickliffe u la jop bad ioh ia ka Bachelor Degree ha ka Civil Engineering ha ka snem 1937. Kumta u la long u Khasi ba nyngkong ban ioh ia ka **Engineering Degree**. ne B.E. napdeng ki Khasi. U la don ka jingthmu ban leit sha England hynrei u kni u ba phah bad buh skul ia u, u Sib Sing Syiem Nongstoiñ, u la phah wan noh sha la shnong ba pang jur iwei i hynmen kynthei jong u.

Hadien kata u la shimti ia ki kam hima bad la thung ia u kum u Attorney General ka Hima Nongstoiñ naduh ka snem 1940 haduh 1948. Ha kito ki por ka thma bah pyrthei kaba ar ka la khie na Europe ha ka snem 1939 haduh 1945. Kumta U Syiem Wickliffe u la rung sha ka kam shipai lyngba ka Assam Civil Transports Corps (7<sup>th</sup> Porter ha ka snem 1942). Na ka thma u la wan on tep ia la ki kmie ha ka 23 tarik u December 1942. U sa leit phai biang sha ka thma tang arsnge hadien.

Hapoh katei ka 7<sup>th</sup> Porter Corps, ki don haduh 1000 (shihajar) ngut ki samla Khasi na Nongstoiñ, Lyngngam, Mawsynram, Sohra, Maram, Nongspung, bad Khadsawphra. Don sa shi Company ki Mikir ryngkat ki Garo kiba hap ha ka jingkhmih u Syiem Wickliffe. U la leit sha Lushai Hills (Mizoram) ha ki shnong Aijal, Chibungthang bad Kolasib. Ha u April 1944, u la ialam ia la ka kynhun sha ka shnong Tidim. Ynda u la poi ha u 96<sup>th</sup> Mile jong ka surok Imphal - Tidim u la wan phai noh sha Dimapur. Ka America

ka la pynhap Atom bomb ïa ka shnong Hiroshima ha Japan ha ka 6 tarik u August 1945, bad u Syiem Wickliffe u don ha kata ka por ha Dimapur.

Kiwei ki para Khasi ba leit ïaleh thma wat la kim ïakynduh iwei ïa iwei, hynrei ki la pyni ka jingshlur ha ka thma bah ba ar 1939-45. Uwei na kita u dei u **Sepoy Wellington Massar** une u la khlad, shah siat ïap ha ka 15 tarik u May 1944. U la pyni ïa la ka jingshlur ha ka **Battle of The Tennis Court, Kohima**. La ai khusnam ïa u hadien da ka **Indian Distinguished Service Medal**.

U shipai **Ernest Wood Swer** na Sawmer Upper Shillong u la shim bynta ha ka thma na sha ka thain Middle East. Hadien ka thma, la pynkiew kam ïa u ba la tip ïa u kum u **Brigadier Ernest Wood Swer**. Ka **Rank Brigadier** ka mut u hap ïalam thma ïa kawei ka Brigade ha madan thma. U long tang marwei napdeng ki Khasi uba la ïoh bat ïa ka **Rank Brigadier**, ha ka Indian Army haduh mynta. Kane ka long ka kyrdan **kaba saw** ha ka Indian Army.

Uwei pat u Khasi uba don ha ka Indian Navy ha ka thma bah pyrthei ba ar u dei u **Captain Hughbert Roy Shullai** na Mission Compound, Shillong. Kane ka dei ka **Rank kaba san** ha ka Navy, ba u la command ïa la ka Military Naval ship. Haduh mynta ym pat don uwei ruh u Khasi ban ïoh ïa ka nam Captain ha ka Indian Navy.

Ïoh ngi klet, la don sa arngut ki shipai Khasi ba la leit ïaleh thma ha ka thma bah pyrthei Ba ar. Uwei na kita u dei u shipai Hipshon Roy Kharshïing uba la leit ïaleh thma ha Palestine, Greece bad Italy na ka Indian Army. U la don ha Rome ha u bnai May 1945 ha ka por ba ki Nazi Germany u Adolf Hitler ki la pyndem wait.

Uwei pat u shipai Khasi u dei u shipai Darwin D. Pugh na ka Indian Navy. Une u la ñaleh thma pyrshah ña ki shipai Japan ha ka thain Madras ne Chennai mynta. La ong ba ki la ñoh siat bad pynhap ña ki aeroplane Japan ha ka Bay of Bengal 1944.

Hadien jong ka thma u Rangbah Darwin D. Pugh u la don ha Gauhati ha u snem 1947. Uwei u American uba kyrteng u Doctor Short uba khmih ña kawei ka hostel ha Gauhati; u la ong ña u Bah Darwin ba lada u nud ban jngi ña ka wah bah Bramaputra na shiliang sha shiliang kata na Pandu sha Amingaon un ai buskit 50 tyngka. U Bah Darwin u la jngi hangta hangta hi bad u la khwoit tang shipor u la poi sha Amingaon u Doctor Short uba bud ña u da ka lieng. Hangta u la ong biang ña u la u dang lah ban jngi biang sa shikylla. U Bah Darwin u la mynjur. La synran ña u da ki lieng bun tylli ñoh ba u ngam jyllop ha ka wah. Hynrei u la jop biang bad poi biang sa shi kylla sha Pandu (Maligaon). Kumta u la ñoh ña ka buskit 100 tyngka (shispah tyngka) namar ba u la jngi ar kylla. Katba lah ban tip dei ma u napdeng ki Khasi uba la lah ban jngi ha ka wah bah Bramaputra haduh mynta.

U la ju long u khlur ñaleh kai football ha Allahabad bad bombay (Mumbai). Kumjuh ruh u ju paw bha ha ka ñalehkai Badminton ha Assam bad New Delhi. Hadien kata u la leit hikai skul ha Basic School Malki, bad sha Garo Hills bad khatduh u la leit hikai skul ha Cherra Presbyterian High School ha Nongsawlia, Sohra. U la long ruh u Editor jong ka kot khubor ka Pyrta u Riewlum shipor ha ka por ba ñaleh Hill State.

U la bat ruh ña ka kam Joint Secretary jong ka APHLC Central body. Te, haba u la leit ñalap election sha Garo Hills u lekshor sha ki paidbah da ka ktien

Garo. Haba u leit sha Mikir Hills Assam ban ialap election Hill State u lekshor da ka ktien Karbi. U nang ban thoh bad kren haduh san tylli ki ktien, kum ka ktien Garo, Karbi, Khasi, English, Hindi bad da ka ktien Allahabad Hindi.

U la long u Chief Minister u ba ar jong ka Jylla Meghalaya, bad u Chief Minister Khasi banyngkong ha Meghalaya ha ka snem 1978.

Ka thma bah ba ar ka la wai ha Europe ha u bnai May 1945. Ha Asia pat u Japan u la pyndem thma ha u September 1945. Hynrei u Syiem Wickliffe u dang don sa kawei pat ka thma. Kumno un leh ban iada ia la ka ri bad ka jaidbynriew ynda ki Phareng kin sa phet noh. U Syiem Wickliffe ryngkat bad u kni jong u ki la aiti met bad mynsiem ban iada ia la ka ri bad ka jaidbynriew na ki nongshun.

Kumta u la thoh shithi sha uwei u paralok ha ka 20 tarik u July 1947 na Shillong da kaba ong kumne: Bah Wollington "Nga la ioh pat sa kawei ka shithi na Nongstoiñ kaba phi thoh kumba phi la pyntip ha kato kawei." Nga la mut ban phah ia katei kawei ka shithi ha I Syiem Atiar, i la leit kyrkieh, ngam lap shuh bad kumta nga pynbud sa kawei. Ba lada nga wan iaid na Nongsynrieh ruh ngam lah shah palat ia ka ar sngi, namar la donkam eh ba ngan poi sha Nongstoiñ namar ka lah ban don ka jingiamynsaw hapteng ki **Muslim League** bad **ki Khun ki hajar jong nga**, namar katba sngewthuh kin leh da ki policy ban pynbor ia ngi ki khasi tang ban rung sha Pakistan, namar kumba phi la tip ba ka Sylhet ka hap sha Pakistan.

To nang pynbeit lada phi lah bad lada phi donkam ia nga ngan don ha Nongstoiñ ha ka 1<sup>st</sup> Week August. Lada nga lah ngan iaid na shnong jong phi sha Nongstoiñ.

Tharai ngan mih nangne 24<sup>th</sup> ngam shym ioh leit Calcutta, namar ba don ka jingiapyniāp kaba jur hangto bad kata nga bunkam hangne. Khublei, Wickliffe.

Katkum ka census 1941, ka jingheh ka **Khasi State** 25 tylli ki hima ka long 3697 Sq miles. Ki nongshong shnong ha ka ki don tang 2,13,586 ngut ne ar lak tam. Ki hima ba kham bun paid ki don tang hynriew tylli. Kita ki long:

|                    |             |
|--------------------|-------------|
| (i) Hima Myllem    | 65,153 ngut |
| (ii) Hima Khyrim   | 48,467 ngut |
| (iii) Hima Maharam | 17,573 ngut |
| (iv) Hima Nongkhaw | 15,627 ngut |
| (v) Hima Nongstoin | 13,155 ngut |
| (vi) Hima Sohra    | 11,302 ngut |

Kum ban shu pynkynmaw ka ri India bad ki hima Khasi State ki la laitluid na ka jingsynshar ki phareng ha ka 15 tarik u August 1947. Ki Hima Khasi ki la ia khih ia ksaid hadien kata shaphang ka lawei jong ka ri bad ka jaidbynriew. Hynrei ki la hap rung sha ri India lyngba ka Instrument of Accession ha ka 15 tarik u December 1947. Ka Hima Nongstoin ka la rung khatduh sha ka ri India na ka Hima Khasi lyngba ka Instrument of Accession ha ka 19 tarik u March 1948. Shuwa ia kata ka Dorbar Hima Nongstoin ka la lum paidbah bad ka la rai shisur ha ka 13 tarik u January 1948 ban long Hima laitluid la ka jong shabar na ka ri India bad ka Pakistan. Ka Hima Nongstoin ka la kulmar thlim bad ki Khar Hajong na Pakistan ki la wan tur sha Moheshkhola Hima Nongstoin. Kumta u Syiem Wickliffe u la leit bad la ki briew ban tur



shata. Nangta kumjuh ruh u Sir Akbar, u Governor ka Assam Province u la pyndik ia u Syiem Sib Sing ka Hima Nongstoiñ da ki laiphew har rukom.

Haduh ka 31 tarik u December 1947 la don haduh 6 (hynriew) tylli ki Khasi States kynthup ia ka Hima Nongstoiñ, ki bym pat pyniasoh bad ka ri India . Te, u Sardar Vallabhai Patel uba long u Deputy Prime Minister ka ri India bad u long de u Minister in-charge ia ka Ministry of States, u la wan kyrkieh sha Shillong ha ka 2 tarik u January 1948. U la pynlong ia ka jingialang paidbah ha Lady Hydari Park, Shillong. U la kren paidbah bad u la ong, "Yours is a land for gods to live in, its air, its natural scenery, its pure atmosphere, its sweet water, would attract even gods if your hearts were pure."

Kaba mut u la iaroh ia kane ka ri Khasi ha ka liang ka pyrthei ka mariang kum ki lum ki wah, ka lyer kaba lah ban ktik, wat ia ki blei ban wan iuh kjat hangne. Tang ba phi dei ban long kiba khuid mynsiem ne em? Kane ka pynpaw lyngba ba lada phim leh kumba kwah ma u ban iasoh noh bad ka ri India, te u lah ban leh kumba u leh ia u Nizam ka Hyderabad. U la phah ia u Rangbah shipai ka India u General J.N. Choudhury u la leit hiar thma haduh saw sngi lynter bad sngi bad miet ia ka Hyderabad State hadien jong u bnai August, 1947. Hadien kane, u Nizam jong ka Hyderabad um banse ban pyniasoh bad ka ri India lyngba ka Instrument of Accession bad ka Instrument of Merger bad ka ri India. U Patel u ong pat ba katei ka jinghiar thma jong u ia ka Hyderabad ka dei tang ka Police Action. Nangta u ai bai bam tymmen ia u Nizam ka Hyderabad da ka Privy purse kaba da ki phew klur shi snem shi snem tad hadun ban da pynduh da ka Indira Gandhi hadien.

Ka Khasi States Constitution Making Dorbar hadien ka la pynlong dorbar ha Dinam Hall ha ka snem 1949. La pynñaid ïa kata ka dorbar da u Dr. H. Lyngdoh kum u Chairman. Katei ka dorbar ka la rai ha ka 21 tarik u July 1949 lyngba ka Amendment u Syiem Jirang u paiem Sirendro Wahlang uba la ïoh 46 votes, kaba kwah ïa ka Khasi States ba kan rung ha ka First Schedule jong ka ri India ryngkat bad ka Annexed Agreement shabar na ka Assam Province. Kiwei kiwei pat kiba kwah ban ïasoh hapoh Assam hapoh ka Sixth Schedule lyngba ka Resolution ki ïoh tang 40 votes.

Kumta kiba rem ha ka dorbar Khasi States Constitution Making Dorbar ki said heh pynban ha u bnai September 1949 ha Constituent Assembly bad ki ïoh pynban ban pynlong aiñ ïa ka motion kaba rem ha ka Dorbar K.S.C.M.D. Hynrei u Gopinath Bordoloi u Premier ne u Prime Minister ka Assam ha kato ka por u la leh khlieh shriei pynban. U la pynkylla ïa ka Khasi States tang kum ka Tribal Areas jong ka Assam bad u la shop ïa ka Khasi States bad pynhiar sha ka kyrdan district. U la pyniaryngkat kyrdan ïa ka Khasi States tang kum ka Garo Hills non-state, Naga Hills non-state bad Lushai Hills non-state. Lada ïoh Khasi States, kum ka Manipur State, ne ka Tripura State shabar ka Assam naduh ka snem 1950 te, ym donkam ban ïaleh Hill State shuh ban ïa milai khleh jaktung bad ka Garo Hill non-state naduh ka snem 1950.

Don sawngut ki Nongñalam ha ka ri kiba shet kylla ïa ka Khasi State ha kito ki por ba dang pynkhreh ban draft ïa ka Constitution jong ka Ri India ha ka Constituent Assembly ha New Delhi. Nyngkong eh u dei u Sir Akbar Hydari, u Governor ka Assam u ba

la pynbor ia ki Khasi State ban iasoh bad ka Ri India ha ka 15 tarik u December 1947 ha ka Government House ne Raj Bhawan ba mynta. Nangta u la phah ia u Dominion Agent u Mr. G.P. Jarman bad u Rangbah R. Tokin Rymbai kum u Assistant Agent ban leit sha ka shnong Nongstoin ha ka 18 tarik bad 19 tarik u March. 1948. Kitei ki arngut ki ophisar ki lah ban pynkohnguh da kaba pynbor ia u Syiem Nongstoin u Sib Sing Syiem. Une u Paiem da ka jingbitar bad khuslai u hap ban pyniasoh ia ka Hima jong u ka Nongstoin State sha ka Ri India ha ka miet 19 tarik u March, 1948.

U Sir Akbar Hydari u la khlad noh bad iap kynsan ha ka Wangjing Dak Bungalow ha ka shnong Waikhong, kaba don kumba 48 Kms ne 30 miles na ka Nongbah Imphal jong ka Princely State of Manipur. La ong ba u shu iap ieng bad kyllon iap hajuh ha madan (floor) jong katei ka Dak Bungalow haneng ha ka 28 tarik u December 1948. Une u la long u nongshet kylla ba nyngkong ia ka Khasi State.

Uba ar pat, u dei u Premier Gopinath Bordoloi jong ka Assam, uba long ruh u dkhoh ka Congress jong ka Constituent Assembly na Assam ha ka ri India. Une u la shet bad pynhiar kyrdan ia ka Khasi State sha ka District ha ka Constituent Assembly jong ka Ri India. Une u la khlad ha ka 5 tarik u August 1950. Uba lai pat u dei u Sardar Vallabhai Patel uba la thombor da ka bor lyngba u Governor ka Assam u Sir. Akbar Hydari ban niom beit ia ki Khasi State ban pyniasoh bad ka ri India. Une u Vallabhai Patel u la khlad noh ha ka 15 tarik u December, 1950.

Uba khatduh eh u dei, u ba la shet kylla ia ka Khasi State u la lip ka main long kynrem long lyndan naduh ka snem 1950 ter ter. Suki suki u la duh ia ka jinglong bhabriew kum u nai khatsaw synnia, bad

u la nang hiar arsut sha tbian. Khatduh u la poi sha ka ramia pyrthei aü khlem da lah khie khlieh shuh junom.

Ha ka por ba draft ia ka Constitution ha ka Constituency Assembly of India 1947-49, u nongmihkhmat jong ki, u dei u G.S. Guha ba mihkhmat ia ka Manipur State, Tripura State bad Khasi States. Une um shym kren wat tang shikyntien ruh shaphang ka lawei ki Khasi States ha ka Dorbar Constituent Assembly. Te u Syiem Olim Sing, Syiem Khyrim uba long de u President ka Khasi States Federation, Kong Mevis Dunn Lyngdoh Ex. MLA bad Minister b;a rim ka Assam bad u Ma Omil Harris Rease ki la leit iakynduh sha ki dkhoh ka constituent Assembly ka India ha u bnai November 1949 ha New Delhi. Hynrei kim shym la ioh jingiarap ei ei ruh.

Naduh ka 26 tarik u January, 1950 la pynkylla district pynban ia ki Khasi State. La thep ia ki hapoh jylla Assam ha ka kyrteng United Khasi-Jaintia Hills. Katba ka Manipur bad Tripura ki ioh ia ka Part 'C' State shabar na ka jylla Assam naduh 1950. Ka Assam ka la knieh na ka (U) Khasi-Jaintia Hills District ia ka Block I bad Block II jong ka Jowai Sub-Division sa 596 Sq. Miles ha ka snem 1951 bad ai sngewbha sha Mikir Hills Assam. Ki lai ngut ki MLA Khasi-Jaintia ryngkat uwei de uba long Cabinet Minister jong ka Assam, ki la shu sngap la ka sngap ha ka Assam Assembly. Ngim tip la ki ia shah ne iapyrshah ia ka jingleh donbor ka Sorkar Assam ruh ngim tip ei ei.

U Syiem Wickliffe um don shuh ha ka shnong Nongstoin naduh ka snem 1948 bad leit sah shipor ha pyrshah ka Hat Bagli jong ka Hima Nongstoin hi hyndai. U Sir Cyril Radcliff ha u July 1947 u la pynhap noh ia katei ka jaka u Syiem Wickliffe sha

Pakistan, ha ka por ba u pynbeit pud ïa ka Sylhet District bad ka Khasi State ha kito ki por. Hadien pat u la kynriah noh sha shnong Rajai kaba dei jong ka Hima Langrin hyndai. Hynrei ka la hap noh sha Pakistan naduh 1947.

Ka Shnong Rajai ka don ha syndah "0-line" hapteng ka India bad Pakistan (mynta Bangladesh). Ka jingjingai na Mawpyllun-Nolikata harum Ranikor ka long tang kumba ïaid kjat na Saw-lad Madan Rting sha Motphran. Bun bah ki Khasi kiba leit jngoh ïa u, kim ju shim pass port namar ka shnong Rajai ka don ha syndah u pud India-Pakistan.

U Syiem Wickliffe u la don khadar ngut ki khun na ki laingut ki menkmie bad bun ngut ki khun ksiew na i lok nyngkong, i la ïoh arngut ki khun kiba dei jait Malieh. Hynrei ita ila iehnoh ïa u, ba im treh ban leit bud Pakistan, ïa i lok iba ar i la ïakynduh ha Sylhet, East Pakistan na ki jait Kharbithai. Hynrei ita ruh i iehnoh ïa u bad i la wan phet noh sha India hadien ba la ïoh iwei i khun kynthai. I lok iba lai bad khatduh, i dei i Thei Lyngngam jait Sohlamar na East Pakistan bad la ïoh khyndiat ngut ki khun bad i. U Syiem Wickliffe u la sah ryngkat bad i haduh ki sngi khatduh.


Iwei na ki khun ksiew jong u na Bangladesh i sah mynta ha Laitumkhrach, Shillong. Ine i dang pan jingbit ban ïoh long nong India noh. Ka kyrteng jong i ka long "Mercy Lucky Sohlamar." Nga la ïakynduh ïa i shisien ha KJP High School Girl's Hostel ha Mission Compound, Shillong. Naduh kata ngam ju ïakynduh shuh. Lada long kaba lah, nga kwah ban contact ïa i lyngba ka phone jong nga No. 94361-05774.

U Syiem Wickliffe u la long u President jong ka **Seng Bhalang Khasi Bangladesh** haduh ban da khlad

noh. Mynta u paid Khasi ba iar ha Bangladesh u don haduh 85,120 ngut ka jingbun briew. Ha Assam ki Khasi ki don 15,936 ngut bad ha Meghalaya ki don 14,11,775 katkum ka Census 2011.

Ka jingbun briew ha Meghalaya ha ka snem 2018 ki don haduh 3 million shiteng ne 35 lak. U paid Khasi Khara u don tang 14,17,775 ngut. Ki dkhar ki kling ba wan buhai shnong sha Meghalay mynta ki la roi sha ka 11,51,729 ngut. Ki Garo ha Meghalaya ki don haduh 9,36,496 ngut. Kumta lada iatylli lang u dkhar bad Garo kin kot ka jingbun briew sha ka 20,88,225 ngut, katba u Khasi kumba la kdew haneng u don tang 14,11,775 ngut. Kumta wat mynta ruh ngi la long ki **minority ne rit paid** ha la ka jylla. Katkum ka Census 1981 ki dkhar ha Shillong ki la tam briew lypa ia ki Khasi ha Shillong. Ka shnong Shillong mynta ka long ka shnong dkhar ba heh tam ha Meghalaya. Kumta ngi ki Khasi ngi la long ki nongwei bad long mynder ha la ka ri. Ngi nang tang ka leh kmen leh sngewbha bad ka tamasa ngim tip satia ia ka jingma ka jaidbynriew hadien habud.

Ka jingkha ia u Syiem Wickliffe ha nongstoiñ ka la dap 109 snem mynta. Ka jingkhlad jong u ha Rajai, Bangladesh ha ka 21 tarik u October 1988 ka la dap laiphew snem pura. Ka la long ka sngi sah kynmaw ia u riewkhrav ba wat la u la iap noh, hynrei ka ai mynsiem ia ki longdien mandien ban im kum ba im ma u. Ka motto jong u ka long **“iaid shakhmat, ialeh tynggeh, bad wat ju pyndem tdong.”** Ngi angnud ia ka jaidbynriew Hynñiewtrep ban sei bad pynmih biang ia ki Nongialam ha ka ri kiba kum u **Statesman Wickliffe** sa shisien pat.



# KA THMA CHINA - INDIA 1962

*Rupang, 18 tarik Naitung (July), 2019*

**K**a Communist China ka la wan hiar thma pyrshah ia ka Ri India ha ka 20 tarik u October 1962 ka la dap san phew snem pura mynta. Shibun ki jingjia ba khlem poi pyrkhath ki la jia, hynrei ki la jia la ka jia bad mynta ki la rung sha ki sla jong ka history. Ka Ri India ka la ialeh san tylli ki thma naduh 1947 haduh 2012. Saw tylli ki thma ka India ka la ialeh pyrshah ia ka Pakistan bad ka la jop. Ka thma Kashmir ka la khie ha ka snem 1947-48, ha kaba ki Riewlum Pathan na Pakistan ki wan tur ban knieh ia ka Srinagar ka nongbah ka Kashmir. Hynrei ki shipai India ki la beh krad ia ki. U prime Minister Jawaharlal Nehru u la uxor sha ka U.N.O bad la phiah ia ka Kashmir lyngba u line of control ne L.O.C. Dang sah pongkding ia ka kam Kashmir bad ka Pakistan haduh mynta

Nangta pat ka china ka la knieh ia ka shi bynta jong ka Kashmir ha ka snem 1957 kaba ki ong ka Aksai Chin. Ka India ka sngap la ka sngap bad ka Communist China ka la pynlong ia ka lynti iaid jong ka sha ka jylla Singkiang Province, ka jylla ka bym pat don lynti mynshuwa na Ri China. Katei ka jingpyndem tdong ka India, ka pynshlur ia ka China ban khein jem bad ban hiar thma ia ka Ri India ha ka snem 1962.

Ka Thma kaba ar, ka India ka la ialeh thma bad ka Pakistan ka dei ha ka snem 1965 ha ka por ba long Prime Minister ka India da u Lal Bahadur Shastri. U Ayub Khan u Military Dictator ka Pakistan u la jem khnap ha ki Patton Tank ka India, kiba la rung ha

ka Nongbah Lahore ha west Punjab Pakistan da ka jingjop. Arngut ki shipai Khasi u Rangbah Hiskin Roy Hynñiewta na ka Indian Army bad u Rangbah November Sawkmie na ka Indian Army kum ki shipai iada ri, ki la long ki riewshlur ha ka thma India-Pakistan ha ka snem 1965.

Ka Thma kaba lai, ba ka India bad ka Pakistan ki la ialeh thma ka dei ha u December 1971. Ka India ka la jop ia ka Pakistan bad la bthat ia ka East Pakistan na ka Pakistan bad la pynkha ia ka Ri Bangladesh ba laitluid. La kyrshan nadien ia ka India da ka Soviet Union. ne ka Union of Soviet Socialist (U.S.S.R) lyngba ka Indo-Soviet Friendship. Kane ka jingiateh jutang ka ong, ba lada don ba ktah kti ne hiar thma ia ka ri India ka mut ka jinghiar thma ia ka ri Russia. Ka America ka la wanrah ia ka Seventh Fleet na Formosa Strait sha ka Bay of Bengal ban iashah sha ka liang ka Pakistan. Hynrei la dei ka por ba ka hap pyndem wait noh. U Communist China u la iehnoh ia u lok Pakistan bad u syier ia ka ri Russia ioh ka trei ia u najrong.

Ka Thma kaba saw, bad kaba khatduh ba la ialeh bad ka Pakistan ka dei ha u July bad August 1999, kaba ki ong kata ka 'thma Kargil.

Hangne ruh ka ri India ka la jop ia ka ri Masulman Pakistan shitklieh. Mynta ka Pakistan ka la pynrit ha khmat ka bor ramhah ka India. U shipai Khasi u Captain Clifford K. Nongrum u la long u khun dap shynrang ka jaidbynriew u bym riej. U la tur la ka tur pyrshah ia ka Pakistan ban im ka kyrteng sah ka nam ka jingjop ka Ri.

Hynrei sa kawei pat kaba ka Ri India ka la ialeh ka dei bad ka Ri Communist China. Ha kato ka por U Pandit Jawaharlal Nehru u khlem poi pyrkhat ba



u China u lok ieit thepmynsiem jong u, un tynrah kylla nadien ia u Nehru ha ka por bym poi pyrkhat. Shuwa ia kata, ka don ka jingsngew iaieit teh jingsuk lyngba ka "Panch Shilla" hapdeng u Nehru Prime Minister ka India bad u Chou En - Lai Prime minister ka Communist China. Ka jingiarwai lang bad iakynhoi "Hindi-China Bhai-Bhai" hapdeng ki ar ri ka la sawa jam naduh ka snem 1950 haduh 1960; hana ba iasngewieit sngewthoin para nong Asia, ba dang shu ioh laitluid na ka jingshah banbein ha ki dohlieh ia ki.

Shu kynsan kynsan bad khlem poi pyrkhat, ki shipai China kata **Ka Peoples' Liberation Army** ki la rung jubor da ki hajar ngut sha ka North East Frontier Agency (mynta Arunachal Pradesh) ha khappud ka Bhutan - India bad Tibet. Ki la shna biang ia ki jingkieng ba la pynduh ki shipai India. Kitei ki jingkieng ba la pynduh ki shipai India. Kitei ki shipai P.L.A ki la sam ei ha ki nyngkyndong ka thain Tawang da ki dur Poster jong u Chairman Moa Tse Tung. Ki pynsngewbha ia ki shnong ki thaw, ki khynnah khyllung da ki jingpynlong ia ki jingkhawai bamkhana sngewbha bad ki paidbah traishnong Ha kawei ka kyndong, ki brieve ki la iohsngew ia u wei u shipai India uba pyrta "Oye Lama" ia ki Monpa ka Tawang na Lawbniap. Kumta kine ki Monpa ki la ialam ia u Shipai sha iing bad ki la ai bam ai dih ia u. U la iathuh ba u khlem ioh ja, u la thiah jingit haduh 10-12 sngi eiei. U la bam khyndiat tang kat ban teh kpoh, bad u la phet noh. U la siew de shiphew tyngka ia ki brieve ba ai bam ia u.

Katba ha kawei pat ka liang ki shipai China, jling shi jling naduh ka 20 tarik u October 1962, ki la ther da ki ktang suloi kum ki Automatic Rifle bad ka Machine Gun pyrshah ia ka Ri India. Katba na ka liang ki shipai India pat ki bat tang ia ki suloi 3-0-3

bad ynda la jan wai ka thma la ai ia ki da ki suloi S-L-R (self loading Rifle). Haduh khyndai sngi lynter ki shipai China ki la khyrwit sngi la bad meit khlem sangeh pyrshah ia ki shipai India. Ki Shipai India ki iaaid tang da ki kjat suda. Ki shim por ban iaaid 2 sngi ban poi na Bomdila sha Sela. Kane ka jaka ka long kaba jrong 12,000 feet na sla duriaw bad ka long ka ba khriat tasam. Nangta pat ki shim por 4 sngi ban poi sha ka Madan Thma ha ka thain Tawang.

Ka jinglehkput ia ka Ri India ka long na ka daw ba U Jawahar Lal Nehru u la ai jaka rieh ia u Dalai Lama, uba la wan phet rieh na Lhasa sha India ha ka snem 1959. Ryngkat bad U Dalai Lama, kiba la wan phet rieh ki don haduh 1,40,000 ngut ki Nong Tibet. Napdeng kitei ki 40,000 ngut ki la leit sah rieh bad sakma kylleng sawdong ka pyrthei. U Dalai Lama u la sah duh mynta ha Dharamshala, Himachal Pradesh. U la seng ia ka sorkar phetwir (excile government) ha katei ka shnong. Haduh mynta ym pat don kiwei pat ki ri ha ka pyrthei kiba ithuh ia ka Sorkar jong u.

Ka Thma China ka sdang naduh ka 20 tarik u October 1962 bad ka wai noh ha ka 21 tarik u November 1962. Ka la long ka thma ba khlem ia pynbna iaaleh thma (un-declared war) bad u China u shu phet la ka phet hi khlem kren khlem iaathuh (unilateral ceasefire). U China ki ong haduh mynta u China u khlem pynsah kynmaw ia katei ka thma ha ki Museum. jong ki. Nangta ki khlem ai burom ne pynsah nam ia ki riewshlur jong ki. Ki la shu wan ai jingsneng ba u Nehru un thngad ba u pynrieh ia u Dalai Lama.

Katba katei ka thma ka dang shit bha ki nongialam ka pyrthei kum u President Nasser ka Egypt u la byrthen ia ka China ha ka Dorbar General Assembly

jong ka U.N.O La pynbud nia bad la khyrwt sa ir  
President Nkrumah jong ka Ri Ghana. Kumjuh u  
u Prime Minister Bandanaraike ka Ceylon (mynta  
Srilanka) u la pynrem jur ia ka China. Ka Ri India  
kaba ieng ialeh thma tang marwei khlem da don  
paralok.

Ka jingduh na ka liang ki shipai India ka long  
kaba shyrkhei rem. Ki shipai kiba la kyllon ha ka  
madan thma ha N.E.F.A ki la long haduh 3770 ngut.  
Kiba la shah siat iap ha ki shipai China tang ha ka  
Tawang- Bomdila Sector ki la long haduh 2436 ngut.  
Ki shipai kiba la mynsaw jur ki long 1047 ngut. Kiba  
shah kem im bad shah set byndi (Prisoners of war) ki  
don haduh 3968 ngut. Uwei na kita u ba la shah kem  
u dei u Brigadier J.P Delvi uba bat ia ka kam kum u  
Commanding jong ka Seventh Brigade. U Chief of the  
General Staff jong ka Indian Army u dei u General P.N  
Thapar U Minister of Defence ka ri India ha kato ka  
por u dei u V.K Krishna Menon. Une u la shah ther  
la biang ba um tbit ha ka kam. Kumta u la iehnoh ia  
ka kam minister of Defence hadien ba ka India ka la  
shah jop thma ha ka China.

Ym shym don shipai Khasi kiba la iap ha ka thma  
China 1962. Ka daw ka long ba u China u khlem leit  
hiar thma ia ka thaiñ Myomyong ha East Siang ban  
leit sha Tezu ba don ki shipai Khasi ha ka **Fourth  
Assam Regiment** hapoh ka jingialam u Lt. Colonel  
Thankhuma Sailo, uba la tip kum ka Brigadier T.Sailo.

Ki shipai Khasi kiba don ha Assam Regiment ha  
katei ka thaiñ ap ktem ialeh thma ki long u Subedar  
Teiyolis Mohon na Mylliem, Subedar Ornelson  
Nongkhlaw, Suberder Well Lakiang na Jowai, Naik  
Jedro Thabah. Mynta I sah ha Nongkseh Madan,  
Upper Shillong, Lance Naik Moti Jana, Nestar Thabah

(na Mawsmal) bad Nestar Marweñ na Mawkyrwat. Baroh ki dei ki shipai kieng atiar (Combatant) suda.

Haba ka lad kam plie, kumno yn lait ban kren, ong u SoSo Tham. Kumta ym shym la don ba ïoh medal ne ïap ha katei ka thma China napdeng ki shipai Khasi ha ka snem 1962. Ngi kynmaw ba ha ka thma pyrthei ba nyngkong (First World War 1914-18 ), ki shipai Khasi ne Labour Corps ki la ïaleit thma sha Ri France. ïa kiba ïap kat kiba tip la thoh kyrteng ha u Mot ha Motphran. Kiwei pat ki bym shym la don kyrteng jong ki ha ka jingtep ha u Motphran la thoh ïa ki kyrteng jong ki ha ka Jingtep ha Ri Europe ha ki hima Benelux kum ka Ri Netherlands bad Belgium ha u Lum Jingtep Khasi bad Garo hangto.

Kawei pat ka mem Spaniard na ri Spain ka la ïa kynduh ïa uwei u shipai Khasi ha Ri France. Kane ka mem ka la wan bud ïa u sha Shillong, bad ka la ïoh khun ïoh kti na u haduh ban da ïap tymmen.

Ha ki por ba synshar phareng hadien ba la wai ka thma bah ba nyngkong haduh ki snem 1938-39 ei ei, ki ju pynlong leh burom ïa ki shipai ba la ïap ha ri France ha Motphran, Shillong. Man ka snem u bnai ba 11, kata u bnai November, 11 tarik, 11 baje la ju leh burom ha Motphran kum ka jingkyrmaw ka sorkar ïa ki shipai ba la khlad ha Ri France. Mynta la sah satang ka shynrong Motphran bad ym ju pynlong jingleh kynmaw ei ei shuh ïa kitei ki shipai Khasi ba la khlad noh ha Ri France.

Ha ka thma pyrthei kaba ar ha ki snem 1943-45 bun ki rang samla Khasi ki la ïaleit thma sha ri Burma pyrshah ïa ki Japan. Ka kyrteng ki shipai kat kiba tip kiba leit ïaleh thma sha Burma ki long u shipai E.M Reade Syiem, Wing Commander Wickliffe Syiem, Brigadier Ronald Earnest Wood Swer bad u Sepoy

Wellington Massar. Une u shipai u la khlad ha ka 15 tarik u May 1944 hadien ba u la pyini ia ki kam shalur jong u ha ka battle of the Tennis Court ha Kohima. La ai nam ia u da ka Military Cross. Ha ka kot History of the Assam Regiment Vol-I, 1941-47 sla 98 la thoh kumne For the part he played in the gallant raid of 16<sup>th</sup> April and for his courage, he was awarded **The Indian Distinguished service Medal** and so became the First Other Rank of the Assam Regiment to be decorated for galantry in the Field.


Tang shu khie ka thma China, la iohi ba ka sorkar India ka la kem lut ia ki China kiba shong ba sah ha Shillong. La leit set ia ki sha Rajasthan bad sa pyllait pat hadien ia ki. Don kiba wan phai biang sha Shillong bad don kiwei pat ki ba ym shym wanphai shuh kum u Leong Tong ba buh Karkhana Furniture ha Police Bazar markhap bad ka Mirullah Building. Ngi ki khasi ngi la iaduh ka bam momo ar anna, kum u shaw dohsniang shipiah shiteng plate bad shiphew anna u shaw dohsyiar shiteng plate naduh ka snem 1962. Ka jingbam Restaurant ba bang ba shet ki Mem Beijing bad ki Sahep Hongkong ki la sah khyrdong mynta sa tang ha ki jingphohsniew jong ngi.

Une u nongthoh ha kato ka por u dang dei tang u khynnah skul uba pule klas-X ha ka Khasi Pnar Academy High School. (mynta) DNS Wahlang Memorial Secondary School) harud ka Madan Student's Field. Ki nonghikai jong ngi ki la iathuh ba ka communist China ka la wan hiar thma ia ngi. Kum ki khynnah ngi la iatieng bad par khriat. Hynrei ka Ri India ka la kwah ban ialeh bad bhorthi shipai thymmai. Te, I Babu Hiskin Roy Hynñiewta I la rung ha ka kam shipai ryngkew kum u 2nd Lieutenant ha ka Short Service Commision. Ha kito ki por la kem bikar lut ia ki Jeep

Bhoi na lad Quallapatty-Palton Bazar. Hadien kata ym lap syrngiew shuh ĩa baroh ki jeep American bad ki jeep jong nga ba kamai Bhoi, namar ki la ĩa leit kit jingkit lut' sha Tezpur bad Bomdila.

Nangta, ka shnong Tezpur ka la kylla long ka shnong jong ki snaiap (Ghost Town). Baroh ki briew ki la ĩaphet shnong lut. wat u Deputy Commissioner ka Darrang District ka Tezpur, u P.K Das u la ieh bad u la leit phet sha Calcutta ba u la leit on ĩa la ka tnga sha la shnong. U Manager jong ka State Bank of India u la phah khang lut ĩa ki Lut tyngka (Currency Note) ĩa ki pisa khutia la leit bret shapoh um. Ki Manager jong ki Bagan Sha ki la ĩaphet lut.

Katba ka thma ka la jur bha ha Bomdila baroh la ĩa khynñiuh lut ba ĩa sheptieng ĩa u China. U Prime Minister Jawaharlal Nehru u la kren khatduh lyngba ka **All India Radio Assam** ha kawei ka step, ba u la ai khublei khatduh (Farewell) ĩa ki nongshong shnong jong ka thaiñ shatei lam mihngi jong ka ri India da kaba ong, **My heart goes out to Assam**. Kane ka dei ka jingkren ĩamrem u Nehru ba um salia ĩa ngi ki paidbah shatei lam mihngi jong ka Ri India. Kynmaw para Ri ba ngi dei ban kynmaw kyndiang ĩa la ka ri man la ka sngi: bad ym dei ban kynmaw ĩa ka jingma tang shisien sansnem ha ki por Election.



# KA RI INDIA, KA DISTRICT COUNCIL BAD MA NGI

*Ka Kynjat Shai, 15 tarik Nailar (Aug), 2019*

**K**a ri India ka la ioh laitluid na ka kti Phareng ha ka 15 tarik u August 1947. Hynrei ka la shah phiah ar bynta bad sa mih ka ri Pakistan. Kane ka ri Pakistan ka la pait biang ha ka snem 1971 bad la kha pat sa ia ka ri Bangladesh. Ha ka por ba laitluid ka ri India, ki Hima khasi 25 tylli ki don ia ka kyrdan Princely States. Kim shym la hap hapoh ka British India kumba la jia ia ka ri Assam, Bengal ne Bihar. Katkum ka aiñ ba la pass da ka British Parliament ia ka India Independent Act 1946, ka la phiah ia ka ri India ha ki ar bynta kumba la ong haneng. Hynrei ki Hima syiem kum u Mysore, Hyderabad, Jammu & Kashmir bad ki Hima Khasi ki la ioh ia ka hok ban iasoh bad ka Ri India ne Pakistan, ne ban long ka hima laitluid lade khlem da shah synshar hano hano ruh. Ha kum kitei ki sngi ki por ba jakhom tam bad ka ri jong ngi ka don ha ka umsaw ba shyrkhei, ki rangbah jong ka ri jong ngi ki la iakhih iaksar bad ki khlem shongthait.

Ha kitei ki por ki Syiem Khasi ki la don hapdeng ka jingshaiong jingmut bad ka jinglynga mynsiem suda. Kumta ki la pyniasoh ia la ki hima jong ki bad ka ri India naduh ka 15 tarik u December 1947 ter ter haduh ka 19 tarik u March 1948. U Governor General jong ka Ri India ha kito ki por u dei u Chakravarty Rajagopalachari uba la mynjur ia ka instrument of Accession jong ngi ryngkat bad ka Annexed Agreement jong ki Hima Khasi ha ka 17 tarik u August 1948. Haba ngi kdat noh ia ka jingmut jingpyrkhat shaphang ka

jingwan ka jingsynshar ka Sorkar District Council, ngi shem ba la pynpun ĩa ka ha ka ' North East Frontier (Assam) Tribal Excluded Areas Sub-Committee hapoh ka jinglong Chairmanship u Gopinath Bordoloi. Kiwei pat ki dkhot jong ka ka dei U Rev J.J.M Nichols Roy, U Rupnath Brahma bad u A.V Thakkar. Katei ka Sub-Committee ka la phah ĩa ka jong ka report jong ka ha ka 28 tarik u july 1947 lyngba u Gopinath Bordoloi sha u Vallabhai J. Patel uba long u Chairman jong ka Advisory Commitee. U Vallabhai J. Patel pat, u la phah biang ĩa ka report jong u sha u President jong ka Constituent Assembly of India U Dr. Rajendra Prasad ha ka 4 tarik u March 1948. Ngı shem ba katei ka Advisory Committee, ka la shu mynjur beit ĩa ka jingai jingmut jong ka Sub- Committee, shaphang ka jingthaw ĩa ki Autonomous District Council ha ki jaka ri lum jong ka Assam Province mynnor lyngba ka Sixth Schedule, ka ban long kum ka Draft Constitution. Ki riewlum kum ki Garo, ki Mikir, ki Dimasa bad ki Lushai ne ki Mizo ki la ĩakmen ĩa kata ka jait jingsynshar District Council, namar kim pat ju ĩoh bat ĩa u lakam synshar ha ki por phareng. Tang u Naga uba la kyntait ĩa ka District Council naduh ba sdang. Hynrei ki Rangbah Khasi ha kito ki por, ki la sngew syier bad ki sheptieng ĩa ka lawei. Haba u Governor ka Assam U Shri Sriprakasa u la leit plie ĩa ka Dorbar saiñ riti ka Ri, Ka Khasi States Constitution Making Durbar ha Dinam Hall Jaiaw, Shillong ha ka 29 tarik u April, 1949, ki rangbah jong ngi ki la ĩa leit shim bynta da ka jingshithrem mynsiem kaba khraw. Khadduh, ki rangbah jong KA RAI DORBAR ha ka 21 tarik u July 1949, ka rai jong ki ka long ba ki ĩa pynskhem ĩa ka jingwan rung dkhot jong ki bad ka ri India. Ki ĩa angnud eh ban ĩoh ĩa ka jingsynshar khadar la ka jong, khlem da ĩadei eiei ruh bad kiwei ki



Province ne State jong ka ri India. Ki la phah ĩa katei ka rai jong ki sha u Governor jong ka Assam ha ka 30 tarik u july 1949. Ki Khasi ki ĩa angnud ban ĩoh ĩa ka kyrdan 'State' ha ka kyrdan First Schedule hynrei ym tip da ka jinglehduit jongno re, la pynsyntuid ĩa ki Hima Khasi sha ka Sixth Schedule bad kata ruh hapoh ka Assam Province. Kat kum ka instrument of Accession bad ka Annexed Agreement jong ka Hima Khasi mynnor, ka paw shai ba kim kwah ban ĩasoh bad ĩakhleh lang bad kiwei pat. Ka Article 370 jong ka Constitution of India ba la ĩoh da ka jylla Jammu & Kashmir mynta ka dei ka jingangnud jong ki syiem Khasi ha kito ki por. Hynrei katei ka jingkwah jong ki, ka la shu kylla mulot ei khamakha, namar ba ngim don la u jong u Nongmihkhmat ba kyrpang sha ka Dorbar Constituent Assembly of India. La leit mih khmat sha ka Constituent Assembly of India da u juh u briew U Mr G S Guha, uba la leit mih khmat lang ĩa ka Manipur State, ka Tripura state bad ki Khasi State 25 tylli. Katba na ka liang ka Assam Province kaba kham heh bad kaba bun paid, la leit mih khmat da u Gopinath Bordoloi, Rev J J M Nicols Roy, U Rohini Chaudhury bad kiwei kiwei de. Ngi shem ba ka Constitution of India ka la thep ĩa ka Manipur State bad ka Tripura State hapoh ka jingkhmih jong ki Chief Commissioners Provinces ha ka kyrdan part 'C' states. Ki la lait thiaw na ka jylla Assam. Tang ki khasi States kiba la shah kyrthom ha ki Member jong ka Assam, ba ki sa shah pynlyngkie (Submerged) sha ka Assam Province. La dep ĩatainia bad la passed ĩa ka jingwan long aĩn jong ka Sixth Scheduled (Second Reading) ha ka Constituent Assembly jong ka ri ha ka 5, 6 bad 7 tarik u September 1949.


Ki Rangbah Nongialam jong ka Federation of Khasi states ki sngew ba wat la ki tam khnam ha ka Dorbar

Khasi States Constitution Making Durbar, ki shem pynban ba ki la shah ngiat bad la shop bein̄ ia ka sha ka Sixth Schedule hapoh ka jylla Assam khlem ka mon ka jong ki. Kumta u Syiem Olim Sing jong ka Hima Khyrim kum u President jong ka 'Federation of Khasi States'. U Jor Manik Syiem kum u Secretary, ka Kong Mavis Dunn bad u Bah Omil Harris Rease ki la leit her kyrkieh sha New Delhi hadien katei ka Second Reading. Ki la leit iasaid bad ki la pynsngew ia la ka jingshah lehbein̄ bad ka jinḡeng jong ka 'Federation' ha ki Members jong ka Constituent Assembly of India. Ia ka United Khasi Jaiñtia Hills Autonomous District Council la leit plie da u Governor jong ka Assam U Shri Jairamdas Daulatram ha Dinam Hall, Jaiaw, Shillong ha ka 27 tarik u june 1952. La don ka jingiakhieh jong ki samla pule pyrshah ia ki dkhoh shu sieh (nominated) jong ka District Council ha Shillong ha kaba la kem ia U Bah Hoover Hyn̄niewta bad kiwei de ki samla shong skul. U Rangbah Josing Rynjah u la long u Cheif Executive Member ba nyngkong tam jong ka District Council United Khasi bad Jaiñtia Hills,. Ka sorkar Assam hadien pat lyngba ka Order No. TAD/R/64 dated 23 tarik u November 1964 ka la pynkha sa kawei pat ka District Council thymmai ha ka kyrteng jong ka Jaiñtia Hills Autonomous District Council. U Rangbah Edwingson Bareh u la long u Chief Executive Member ba nyngkong tam jong ka Jaiñtia Hills Autonomous District Council ha u snem 1967. Shisien ha kawei ka por, U Vice-Roy bad u Governor -General jong ka ri India U Right Hon'ble Freeman Thomas u Karl of Willingdon, u la wan jngoh ia ka nongbah Shillong ha ka 3rd u October 1933. Une u Vice-Roy u la leit jngoh kai de ia ka shnong Sohra ha kaba la pdiang sngewbha ia u da U Pa'iem Join Manik ka Hima Sohra. Ki syiem bad ki khlieh

Nongsynshar jong ki Hima Khasi ki la leit ia kynduh ia u Vice-Roy ha Shillong. Ki la ai ha u ia kawei ka Memorandum bad ka Address kaba la ong Kumne : Our country and our social customs are different from others and our administration is carried on according to very ancient customs and usages. We look to your Excellency Government to help us in preserving our individual rights as states wherever political changes may place in future. Mardor hangta hi, u Vice-Roy u la ai jubab ia ki kumne, I think it is true to say that the Vice-Roy of India as the official of his majesty the king Emperor, incharge of people of many races and of widely differing culture, but there is not place within our Indian Empire where wider diversity is found within smaller compass than in the upland of Assam where the Seims and Princely houses of the Khasi represent, perhaps, the oldest and certainly one of the most interesting of the ancient tribal migration. It is a proof of the stamina and virility and competence of your people, that, when greater empires in the east and the west have throughout the ages come and gone, you still maintain in your pleasant hills the freedom of your small republic, bases on the ancient ways of tenets of your race. Hynrei naduh ba dep soi ia ka Instrument of Accession ha ki snem 1947-48 ngi shem ba kiei kiei ki la kylla mulot lut nadong shadong.ka sorkar Assam ka la phah ia u Dominion Agent ha kaba la leit pynlong Election ha ki hima ha kaba la pyrshah ia ki syiem bad ki Hima Khasi ha ka snem 1948. Ha kane ka rukom ka sorkar Assam ka la lah ban pynduh syiem wat ha kito ki hima kiba la dep soi ia ka Instrument of Accession bad ka ri India, hana ba ki la duh ia ka jingshaniah jong u paidbah.

Da katei ka buit, ki la pynkheĩn ĩa u Syiem Atiar Sing ka Hima Mawiang, ĩa u Syiem Biion ka Hima Myriaw, ĩa u Lyngdoh Raibu ka Hima Lyngdoh Mawphlang, ĩa u Sordar Imohon Wanrap ka Hima Mawdon, ĩa u Syiem Elenson Sing Ka Hima Malai Sohmat bad ĩa u Syiem Borba Singh ka Hima Langrin. Haba kren shaphang ka jingsynshar ba thymmai ia kane ka ri, u Syed Muhammad Sa'adulla u dkhoh ka Constituent Assembly bad uba long ruh u dkhoh jong ka Drafting Committee, uba la bat teng ĩa ka kam Prime Minister ka Assam ha ka snem 1937-bad ha ka snem 1943-46; u la kren ha ka Dorbar Constituent Assembly ha ka Constitution Hall ha ka 21 tarik u Naiwieng (November) 1949 ha New Delhi. U Honourable Dr Rajendra Prasad u la long u Khnong Rynsan (Chairman) jong katei ka Assembly ha katei ka sngi. U Syed Muhammad Sa'adulla u la kren ha katei ka Dorbar da kaba ong; *Sir, the Khasi Hills have been regelated to the Sixth Schedule for which Rev. Nichols-Roy is very thankful, but there is a constitutional anomaly. Although the Constituent Assembly is not to find a remedy is not to find a remedy for that, yet I must sound a note of warning that this small district of Khasi Hills embraced 25 Native States most of which had treaty rights with the Suzerian power in Delhi. They were asked to join the Indian Dominion in 1947. Instruments of Accession accompained by an agreement were executed by these Chiefs and they were accepted by the Central Government. But though even this area has been included in the sixth Schedule, up till now no agreement or settlement has been arrived at between the Constituent Assembly of khasi State and the Assam Government or the Government of India. I do not know what will happen to these areas or people after 26th january 1950.* Ka jingmut jong katei ka jingkren ka

long ba u Syed Muhammad Sa'adulla u la ong Sir, ka Khasi Hills ka la shah tyndep ha ka Sixth Schedule bad u Rev Nichols Roy u la sngewnguh shikata hynrei don ka jingbe riti ha kane ka kam, Wat ka Constituent Assembly ñiuma, kan ym lah shuh ban tah kynbat pynkoit ña kane pynban la jar katta ruh nga dei ban ring da ka sur maham la ka jong kaba ap ña ine I District Khasi Hills iba rit iba don 25 tylli ki hima trai ri kiba kham bun na ki ki la ñateh kular bad ka Lahduh Nongpyniaid ka Delhi. Ha ka snem 1947 la bthah ña ki baroh ban ñasoh ña ka India Dominion. Kumta ki instruments of Accession ne ki Dulir ñateh Jutang ban rung, ba la ñateh da kine ki khlieh nongsynshar ne ki syiem la pdiang arti da ka Central Government. Hynrei, watla la pynrung ña ka Sixth Schedule (District Council), pynban ym shym ei ei ruh haduh mynta kano kano ka jingiãteh kyrmit ne jingiãkutnia ne jingiãpynbeit ei ei hãpdeng ka Constituent Assembly jong ka Federation Khasi States bad ka Sorkar Assam ne ka Sorkar India. Ngam tip shuh aũu keiñ kan jia ha kito ki thaiñ bad ki paid jong ka hadien ka 26 u Kyllalyngkot 1950.



## U MAW-SUM-SYIEM (PANBARI)

*Ka Lyngwiar Dpei, Nohprah (Dec), 1983*

**M**ynba ki Hima Khasi ki dang long ki kynrad ym tang ha kine ki lum, hynrei ha ki pyntha kba jong ka Brahma bad Surma, ki raiot ki dkhar ki burom ïa ki Nongsynshar jong ngi kat shaba ki ïaid. Ka Raid 12 Bangthai (12 Rangbah Shnong) jong ka Hima Shyllong ne ka 17 Parganas (17 tylli ki thaiñ) jong ka Hima Jaiñtia, Ki long ki artylli ki pyntha bah kiba ju long ka thiar kba ïa ka ri mynnor. U Syiem Bormanik II u ju smat ha kaba leit khmih ia ka raid ri dkhar sha thaiñ Sonapur. Mynta mynne ruh lada phi leit jngoh ïa ka shnong Panbari ha Kamrup district, te dang don ki sakhi shaphang ki sngi ba la leit noh.

Shi kynhun ki Khasi ki la leit jngoh sngewbha ïa ka shnong Panbari ha ka 26 tarik u Naiwieng 1983. Kane ka shnong ka don shaphang shatei na ka ïew Sonapur.

Ka shnong Chandrapur ka don shaphang sepngi bad ka Narengi pat sha mihngi na ka shnong Panbari. La pdiang sngewbha ïa katei ka kynhun da u Banthai ne Bangthe (Rangbah shnong) Ka Panbari bad u la kdew ha ki ïa uwei u maw lyngknep uba thiah lyngktop ha dong phyllaw.

Utei u Bangthai (Rangbah Shnong) u dei na ka jaitbynriew Amri Karbi ne Mikir bad u la ïathuh ba utei u mawsum jong u syiem Bormanik II. Ha ka por hyndai, une u maw u don ha rudnong Panbari ha ka jaka kaba lyngngop jong ka shnong kaba long ka jaka sum jong u syiem. Mynta la buh ïa utei u maw ha phyllaw ïing jong u Rangbah shnong (Bangthai) ka

Panbari. Ma ngi te ngim tip shuh hangno ka don ka wait pom blang u Bormanik II, hynrei ki Amri Karbi te ki dang tyngkai wat ãa u maw sum jong u Syiem Khasi.

Une u mawsum syiem u ãar pyllun lyur, u jrong 38.6 inches ka lynter bad ka jingrben 6.6 inches. La pruid lain sawdong ãa u. La ym da iphylla eh shaphang jong u bad ban peit ruh ym da i myllai; tangba u don ka history ha lyndet jong u. U ãa syiem dur ãa ki kynja mawlein bad um i dei ruh u kynja mawshyiap ne mawshun. Ka Raid 12-Bangthai (12 Rangbah Shnong) ka long ka jaka ba seisoh ha kaba ka don ha ka, da ki lyngkha kba ki bri kwai bri tympew bad ki kper slash.

Ka shnong Sonapur ka long sa kawei pat ka shnong ba kongsan ha 12-Bangthai (12 Rangbah Shnong). Sona ka mut ka ksiar bad pur ka mut ka Jaiñ ksiar. Harud jong ka shnong Sonapur ha syndah ka Wah Umtrew, ka don kawei ka jaka ha kaba ki Myllem ki ju leh niam ha kato ka thain. Kat shaba ngi phai ha ka jingiaid lynti na Jorabad Sonapur haduh Panbari., ngi iohi tang ãa ki pyntha kba kiba jlan haduh katta katta, jngai pat nangta ngi sngew shoh bieit haba khmied ãa ki lum rit ba ithiang. Katno ngi sngew jawdud haba kynmaw ãa ki sngi barim, ba ki long ki nongsynshar ha kato ka thain. wat la katta ruh, ka Panbari ka ãai pynkynmaw bunsien ãa ka Raid 12-Bangthai (12 Rangbah Shnong) ryngkat u MawSum Syiem jong u Syiem Bormanik II hyndai. Kiba la ãaleit sha Panbari ki long U Myntri Lebanon Kharkongor (Hima Myllem) Robin Kurbah, Santon Kharakor, Pyndaplang Khongwir, Romen Blah bad Rangbah Spiton Kharakor.



# KA JINGTEP U REV THOMAS JONES HA CALCUTTA

*Ka Dongmusa, 7 tarik Lber (March), 1986*

**K**a Dongmusa ha ka 21 tarik Rymphang, 1986 ka la pynmih ia ka jinglap dientrai ia ka jingtep jong u Rev Thomas Jones, u Kpa ka thoh ka pule jong ki khun u Hynñiewtrep, kaba don ha St Andrew's Church ha Calcutta. Ia kane ka jinglap kaba long ka jingshem kaba pynsah kynmaw pateng la pateng ha ka histori ka thoh ka pule Khasi, la pynnoh bhah da arngut ki radbah kiba thrang hir hir ha la ki dohnud ban shem ia ka tynrai. Kita ki long, u Bah L. Gilbert Shullai, u nongsdang nongsumar bad nongpynheh pynsan ia ka Shillong Records Collection Centre, bad u Bah David R. Syiemlieh, u radbah thwet jingstad histori uba hikai mynta ha North Eastern Hills University, Shillong.

Nalor kine ki rangbah jwat mon bad ki riewthrang ban tip ia ka tynrai, la pashat bhah sa u Bah Spiton Kharakor, uwei pat u rangbah nongthoh uba bang ban tih ia ka thymmei bad ka tynrai longbriew jong ki khun ki ksiew u Hynñiewtrep.

U Bah Spiton Kharakor u la leit sha Calcutta ban shondur ia kata ka jingtep jong u Rev. Jones, khnang ban ai jingmyntoi ia ki longdien bad ia kiwei pat ki para shnong para thaw ki bym ioh lad ban leit jngoh ia une u lum jingtep da lade hi. Kane ka jingtrei shitom kine ki rangbah ka long ka jingkyrkhu kaba khraw na ka bynta ki samla kiba pule ia ka histori jong ka thoh ka pule jong ki khun u Hynñiewtrep. Ia mynta hi bun ki nongpule ki bym iohi ia ka jingkordor jong kane ka jingshem ia une u lum jingtep bad ia ka jaka tep ia une u radbah bad u Kpa ka thoh ka pule u



khun Khasi. Ka jingkordor jong kane ka jingshem ka long ba ia ka jaka ba une u radbah u thiah junom la tip bad la iohi markhmat bad ia ka sngi jingiap kaba haduh ban da shem da ki jingthoh ki ba thikna, la shu mutdur bad la shu tharai lungleng ha ki snem kiba la dep.

U Bah Spiton Kharakor ryngkat bad u nongsumar ia une u lum jingtep, D. Caster ki la iashondur da kaba ieng ha syndah ka jaka tep jong u Rev. Thomas Jones ban pyni, ba la bun snem mynta ym shym la don mano ruh ba sumar sukher ia ka. Ka jaka ha kaba la tep ia ka met jong u Rev. Jones ka la tap da ki sla dieng, da ka khyndew ba rben bad ka bym lah shuh ban ithuh shi synpeit na jrong. Dei tad ynda u Caster u la wan rah da ka Map, ba la iawad bin pa bin ia ki snem bad ki jaka tep bad la lap ia ka.

Ka jaka ha kaba la tep ia u Rev. Thomas Jones ka long ha Scottish Cemetry, Calcutta, Serial No. 628.

Ha ka jingiakynduh ka Dongmusa bad u Bah David R. Syiemlieh, u la iathuh ba mynta u dang thwet ban shem sa ia ka jaka ha kaba la tep ia u Syiem Tirot Sing ha Dhaka, Bangladesh. U la iathuh ruh ba u la thoh sha arngut ki nonghikai rangbah kiba don ha skulbah Dhaka, ki ban iarap ia u ban shem ia ki kot ki sla kiba dei bad ka jingshah set byndi jong u Syiem Tirot Sing ha Dhaka ha kito ki por.

U Bah David u la iathuh ruh ba u la thoh sha London halor kane ka kam bad mynta u khmih lynti ban ioh jingpynshai na ki stad Histori nangto shaphang ka sngi iap ba thikna une u Syiem bakhraw jong ka hima Nongkhlaw. "Wat lada donkam ia nga ban leit sha Dhaka ne London na ka bynta kane ka phang thwet jingstad, ngan sa leit," la kren kut jingmut u Bah David. Kumba ka long mynta, "nga sngew ba ka

mynsiem jong nga ka rhem da ka jingkyrmen ban  
shem sa ãa jaka tep jong u Syiem Tirot Sing," u la  
ong.

U Bah David R. Syiemlieh, u la ãathuh ruh ba ka  
paw na ki jingthoh jong uwei u nongthoh Bilat, ba u  
Tirot Sing, u la ãap imat ha ka snem 1836 ym 1833  
kumba la ãa ngeit baroh shikatta. "Hynrei ãa kane dei  
ban leh suki jai haduh ban da shem ãa ka tynrai"  
kumba ka long mynta "Kan ym long kaba slem ban  
shem ia ka jingshisha. "U la kren da ka jingkyrmen  
dap mynsiem.


*(Kane ka dei ka Khubor ba la lum bad pynmih da  
U Dongmusa)*





U Nongtrei Balang ka Balang Scottish Church, Kolkata, hadien ba u la sei da ka 'Map' ia ka Burial Plot No., ba la tep ia u Thomas Jones; u la kdew da ka kti ia ka jaka tep ia u Thomas Jones ha "Scottish Church Cemetery", Kareya Road, Kolkata. U la khlad noh na ka pyrthei ha ka 16 tarik u Nailur 1849. La tep khlem da tei mot ia ka jingtep jong u tad haduh ka snem 1989.

Ka la shim por haduh 140 snem eiei ban tei mot ia u. La shon dur ia katei ka jaka tep bym pat tei mot da u Bah Spiton Kharakor ha u bnai Rymphang 1986.



U Nongtrei ka Balang Scottish Church, Kolkata (kadiang) bad u Bah Spiton Kharakor (kamon), ki iaah shondur lang, harud ka jaka tep ia u Thomas Jones ha Scottish Church Cemetery, Kolkata ha u bnai Rymphang 1986. La dep shon bad pynmih tang ia katei ka dur ha ka kotkhubor Khasi barim mynshuwa "U Dongmusa" 7<sup>th</sup> Lber 1986.